

## Tí tan jína chrónka ch'ín Lucas

### *Tíhi mé xrankíxixín tí xroon i*

<sup>1</sup> Nchónhya chojni tjinkaon chrókjin sín ntoá kaín xín nkehe nkexrí kónhen k'uátsínka Ìnchéni tí k'uéjóni. <sup>2</sup> Éxí kjuakoheni tí sín tsík'ikonxín kon sín tí xrankíxixín nkehe k'uátsínka ch'án la ntá k'uáyéhe sín tí xra sákjuíchronka sín tí tan jína <sup>3</sup> a ntá janhan kjaxian kjuánchánkiá jína kaín nkehe k'uátsínka tí xrankíxixín. Ntá nòna jína ikjian kaín tíha éxí tsíkónhen ntá tsochr'anhan jaha Teófilo kixin imá tjuaha <sup>4</sup> kixin ntá jaha tsonoha jína tí nkehe chaxín tsíkjakoha sín.

### *Ijnko ángel mé chrónka kixin tsokjíhi Juan Bautista*

<sup>5</sup> A ntá tí ch'ín rey Herodes k'uetōan ch'án tí estado Judea la ko ntiha kjuák'e injnko nchāt'á mé it'in Zacarías. Jehé ch'án mé kuènte tí sín tsík'axrjeníxin tí ch'ín Abías.\* A ntá ichjién ch'án mé it'in Elisabet. Jehé tjan mé tsík'axrjeníxin tjan tí nchāt'á Aarón. <sup>6</sup> Yóí sín na mé jína sín kixin éxí tjinkaon Dios la mé kjuínchexiteyéhe sín kaín nkehe k'uetōan ch'án. Méxra ninkexró chrók'uekahya jie tí jehé sín. <sup>7</sup> A ntá jehé sín chóntahya sín xjeen sín kixin ó jehí tsíkitoenhya tjan Elisabet kixin sich'éna tjan xjan la ko ntá jie la ó táda ch'án la ko ó nána tjan.

<sup>8</sup> A ntá injnko yaon tónhen tocar ch'ín Zacarías la ko tí í so sín tjejóko ch'án sich'e sín xra nchāt'á

---

\* 1:5 1 Crónicas 24.10

kuènte Dios. <sup>9</sup> A ntá xikaha kuènnen tí sín nchat'á a ntá jie ch'ín Zacarías mé kónhen tocar ts'ixenhen ch'án tí cuarto tjóá kuènte ninko tsjak'e ch'án chjincō chrítaón tí altar kuènte Dios. <sup>10</sup> Ntá kjuák'e ch'án ntiha kjuak'e ch'án tí chjincō la nachrohe kaín tí chojni k'uéjó sín ntója nixjehe sín Dios. <sup>11</sup> Ntá xríñahya k'uíkon ch'ín Zacarías ijnko ángel kuènte Dios tjexín toté ch'án nánko chjina tí altar tjak'exin sín chjincō. <sup>12</sup> A ntá tió k'uíkon ch'ín Zacarías tí ángel la imá kóxakonhen ch'án la ko imá chrakon ch'án. <sup>13</sup> A ntá ntáchro tí ch'ín ángel kíxin:

—Zacarías, chrakonhya jaha. Ó kuínhin Dios tí nkehe tjanchehé ch'án la ntá ichjián Elisabet sich'éna tjan ijnko xjan ntoa na mé sinchek'ian xjan Juan. <sup>14</sup> Jaha la tsocháha má la ko itsjé chojni tsochéhe sín kíxin tsokjíhi xjan <sup>15</sup> kíxin imá tjetoan tsjak'e tí xjaan éxí tóxrjínhin Dios. Ninkehó xran vino la ko ninkehó í jnko xran ts'ihya ch'án. Tsochónta ch'án kjuachaxin kuènte Nchakuen Dios kjónté naxa tokjéhya ch'án. <sup>16</sup> Jehe ch'án mé tsjakōhe ch'án tí chojni nación Israel a ntá itsjé sín tsokjan sín tsinkáchónki sín Ìnché sín Dios. <sup>17</sup> Jehe ch'ín Juan tsítaón ch'án ntia tsixin Ìnchéni. Éxí k'uékjako ch'ín Elías ósé mé tsjako ch'án la ko tsochónta ch'án kjuachaxin éxí k'uéchónta ch'ín Elías kíxin tí sín it'é xjan la mé jina ts'ejóko xjeen sín la ko kjaxin tí sín titekakonhya mé tsitekaon sín. Mé xikaha tsonixjehe ch'án chojni kíxin ó itsi Ìnchéni la chrókuinkáchónki sín tí jehe ch'án.

<sup>18</sup> A ntá tí ch'ín Zacarías kjuanchankíhi ch'án tí ch'ín ángel ntáchro ch'án kíxin:

—¿Nkexrí chrókónòna kíxin chaxín chrókónhen tíhi? Janhan la ó tádana la ko tí chjin chonta la kjaxin ó nána tjan —ichro ch'án.

<sup>19</sup> Ntá kjuátēhe tí ch'ín ángel ntáchro ch'án kíxin:

—Janhan mé Gabriel la mé t'ahā xrā Dios. A ntá jehe ch'án mé k'uetuanna k'uinka tsonixjaha tsoxrjanka tí nkehe jína tsonhen. <sup>20</sup> A ntá jie kuítekákonhya tí nkehe xrjanka a ntá tsonósian jaha xitjahya tsonixja jaha tsoxitjajia tí yaon tsokjíhi tí xjaan. Mé xíkaha tsoxiteyá kaín tíha —ichro ch'án.

<sup>21</sup> A ntá tí í so sín ntiha k'uejóchónhen sín ntója nínko kíxin ts'axrje ch'ín Zacarías, ntá kóxakonhen sín kíxin imá sé kóxrjenhen ch'án nkaxenhen nínko.

<sup>22</sup> Ntá tió k'uaxrjexín ch'ín Zacarías tí nkaxenhen nínko la í xitjahya nixja ch'án. Ntá kónohe sín kíxin ichrén kjuaxroan kuente Dios tsík'ikon ch'án tí nkaxenhen nínko. Ntá itja ch'án ó tjakoxin ch'án tí nkehe chróntáchro ch'án kíxin í xitjahya nixja ch'án.

<sup>23</sup> A ntá tió kjuixin tí yaon kjuích'e ch'ín Zacarías xrā nínko ntá sákjuí ch'án ntōe ch'án. <sup>24</sup> A ntá chr'éxin ntá kjuák'eyá tí ichjién ch'án Elisabet. Ntá ntōe tjan ó kuitohe tjan in'ó nitjó kjuenkayáxin tjan kíxin: <sup>25</sup> “Mé xíkaha ijnko kjuaxroan kjuanjon Ìnchéni kíxin chrók'uántaxíenhyani chojni kíxin ó tsochóntani xjeenni jie chrókjuikosáyeheni sín”, ichro tjan.

### *Ijnko ángel chrónka kíxin tsokjíhi Jesús*

<sup>26</sup> A ntá k'uátsínka injon nitjó ntá Dios k'uetuēnhen tí ch'ín ángel Gabriel kíxin sátsji ch'án ijnko chjasin estado Galilea mé it'in Nazaret,

<sup>27</sup> sátsji nixjēhe ch'án ijnko tjan tjarisoá naxa

kuákjahya tjan chojni ntoá mé it'in tjan María. Jehé tjan mé tsíkja<sub>t</sub>ehé tjan kíxin tsotehe tjan ijnko ch'ín mé it'in José, mé tsík'axrjeníxin ch'án tí ch'ín rey David. <sup>28</sup> A ntá tí ch'ín ángel k'uíxenhén tí tjan tjan ntá ntáchro ch'án kíxin:

—K'uinka nixjaha jaha kíxin Dios kjuínkítsa tí jaha. Ìnchéni Dios tjekoa tí jaha. A ntá jaha imá kjuíntayavan ch'án ntá tí í so chojni chjin la kénhyó —ichro ch'án.

<sup>29</sup> Kjánchó tió k'uíkon tjan tí ch'ín ángel na mé kóxakonhen tjan kjuenkayáxin tjan kíxin nkekuènte xíkaha nixjeheni ch'án, ichro tjan. <sup>30</sup> A ntá ntáchro tí ch'ín ángel kíxin:

—Chrakonhya, María. Dios la imá tjetjinkítsa tí jaha. <sup>31</sup> A ntá jie la tsjak'èyá jaha, tsochonta ijnko xjan ntoá la ko sinchek'ian xjan Jesús. <sup>32</sup> Imá ts'etoan ch'án la ko its'in ch'án Xjeen Dios nkaya nkajní. Ìnchéni Dios mé tsjanjon ch'án kjuachaxin ts'etoan ch'án éxí ijnko rey éxí k'uetoan ch'ín David, tí nkexro ts'axrjeníxin ch'án. <sup>33</sup> Jnkochrín tsjak'e ch'án ts'etuñhen ch'án tí sín nación Israel, la mé tsjejhya tí kjuachaxin ts'etoan ch'án —ichro tí ch'ín ángel.

<sup>34</sup> Ntá kjuanchankíhi tjan María tí ch'ín ángel kíxin:

—¿Nkekuènte kíxin xíkaha chrókónhen kíxin jahan la naxa chontahya chojni ntoá? —ichro tjan.

<sup>35</sup> Ntá kjuatehe tí ch'ín ángel, ntáchro ch'án kíxin:

—Tí Nchakuen Dios mé ts'inkajin éxí ijnko tjuí la ko tí kjuachaxin kuènte Dios mé tsjak'etja tí jaha, a ntá ts'óna tí xjan. Mé xíkaha tí xjan tsokjíhi la mé tjóá xjan la mé its'in xjan Xjeen Dios. <sup>36</sup> La

ko kjaxin tjan Elisabet kjéhya jaha kjónté ó nána tjan la mé tjejá tjan. Senó la k'uéchóntahya tjan xjan, a ntá jie la ó injon nitjó tjejá tjan. <sup>37</sup> Kíxin tí kjuachaxién Dios la tsjacha tsonhen kain xín nkehe —ichro tí ch'ín ángel.

<sup>38</sup> Ntá ntáchro tjan María kíxin:

—Janhan mé t'ahá Ìnchéni Dios xra. Ó nchoxon tí nkehe k'uetóan ch'án sintaxiteyáha ch'án éxí chronka jaha —ichro tjan.

A ntá kjuixin chrónka tí ch'ín ángel ntá sákjuí ch'án.

### *Tjan María sákjuitsjehe tí tjan Elisabet*

<sup>39</sup> A ntá ijnko yaon tí tjan María tjan sákjuí tjan ijnko chjasin tjan tí jna estado Judea. <sup>40</sup> Ntá kjuíji tjan tí chjasin ntiha ntá k'uíxehen tjan ntoe ch'ín Zacarías la ntá nixjehe tjan tí tjan Elisabet. <sup>41</sup> A ntá tió kuínhin tjan Elisabet nixja tjan María ntá chrika tí xjan nkaya tsee tí tjan Elisabet. Ntá antsí k'uáyéhe tjan kjuachaxién Nchakuen Dios <sup>42</sup> ntá itsen nixja tjan ntáchro tjan kíxin:

—Dios imá kjuíntayavan la ntá tí í so chojni chjin la kénhyó la ko kjaxin kjuíncheyaon ch'án tí xjaan. <sup>43</sup> ¿Xá nkexro tí janhan kíxin kjuínixjana iné Ìnchéni? <sup>44</sup> Tió kuínhan nixjana ntá tí xjan la chrika xjan nkaya tseña kíxin chéhe xjan kjuiha. <sup>45</sup> Ntá jaha la cháha kíxin kuítekávan kíxin Ìnchéni Dios sinchexiteyá tí nkehe ntáchro ch'án —ichro tjan.

<sup>46</sup> Ntá ntáchro tjan María kíxin:

A senná imá tjikosáyehe Ìnchéni Dios

<sup>47</sup> la ko chéhe asenná kíxin Dios sinchekaáni ch'án.

48 Kíxin Dios ikuá kuentá ijnko tí chojni chjin nëé ch'exón xra kuènte ch'án.

A ntá ijie la ko jnkochrín tsontácho chojni kixin náxrjón tjèn janhan, tsixro sín.

49 Kíxin Dios chóna kaín kjuachaxin ntá janhan mé kjuasixínna ch'án ijnko kjuaxroan jié; imá tjóá tí ihnié ch'án.

50 Jnkochrín tsikonóehé ch'án kaín tí sín tjikosáyehe sín ch'án.

51 Tsíkjasin ch'án itsjé kjuaxroan jié; kuakitsjehe ch'án tí kjuachaxin chóna tí sín nchehnke.

52 Kuakitsjehe ch'án tí kjuachaxin chóna tí sín t'etóan,

A ntá tí sín nòa k'uék'etuñhaya senó la mé jie chjéhe ch'án kjuachaxin ts'etóan sín.

53 A ntá tí sín t'enxín kjinta la kjuanjón ch'án kaín nkehe tsicháxinhin sín, a ntá tí sín rico xráxin jehó tja sín sákjuí sín.

54 Kjuínkítsa ch'án tí sín nación Israel kixin tjejóch'ehe sín ch'án xra;

k'uitjáyenya ch'án tí jehe sín kuikonóehé ch'án sín,

55 éxí k'uéchenka ch'án tí sín k'uaxrjeníxinni k'uéjé sín ósé,

na mé tí ch'ín Abraham la ko kaín tí sín naxa ts'axrjeníxin ch'án —mé xíkaha ichro tjan María.

56 A ntá tjan María kuítóeko tjan tí tjan Elisabet iní nitjó la ntá chr'éxin xíkjan tjan ntóe tjan.

### *Kokjíhi ch'ín Juan Bautista*

57 Ntá xétja tí yaon sinchekokjíhi tjan Elisabet tí xjeen tjan, a ntá kjuínchekokjíhi tjan ijnko xjan ntoa. 58 A ntá tí sín chjinaxón ntóe la ko tí sín kjéhya

tjan mé kjuíjitsjehe sín kixin tsochéheko sín tjan kixin kuínhin sín kixin Dios imá tsíkikonóehe tí jehe tjan. <sup>59</sup> Ntá tí yaon jnixin ikui sín sincheka sín xjan tí xroye kuente tí sín judío. Ntá chrókjuinchek'in sín xjan Zacarías éxí it'in it'é. <sup>60</sup> Kjánchó ntáchro ìné xjan kixin:

—Náhi. T'ichjánxin its'in xjan Juan —ichro tjan.

<sup>61</sup> Ntá ntáchro sín kixin:

—¿Nkekuènte kixin xikaha chrók'uin xjan? Kohya nkexro naxa kjéhya xikaha it'in —ichro sín.

<sup>62</sup> A ntá kaín tí sín kjéhya kjuakoxin sín tja sín kjuanchankíhi sín tí it'é xjan kixin nkexrí tjinkaon ch'án chrók'uin tí xjan. <sup>63</sup> A ntá tí it'é xjan mé kjuanchia ch'án ijnko ntachiso ntsí tsokjin ch'án ntá kjin ch'án kixin: “Ihnié xjan mé Juan.” A ntá kaín tí sín tjejó sín ntiha la chrakon sín kuínhin sín xikaha kónhen. <sup>64</sup> A ntá xrínahya ch'ín Zacarías kjuankixin ch'án nixja ch'án inaá kjuanchehe ch'án Dios kjuasáya. <sup>65</sup> A ntá kaín tí sín chjinaxón ntoe sín mé chrakon sín. La ntá nkuíxín tí jna kuente estado Judea mé kjo sín kichó sín chrónka sín kixin xikaha tsíkónhen. <sup>66</sup> A ntá kaín tí sín kuínhin mé kjuenkayáxin sín kjuanchankíhi sín kichó sín kixin:

—¿Xá nkehe tí xra tsíkítonhen tí xjan i? —ichro sín.

Kixin chaxín Ìnchéni Dios tsíkjincheyaon ch'án tí xjan.

### *Tí ch'ín Zacarías itsje ch'án*

<sup>67</sup> A ntá it'é tí xjan mé ch'ín Zacarías, mé antsí k'uáyéhe ch'án kjuachaxin kuente Nchakuen Dios ntá xikaha nixja ch'án itén Dios ntáchro ch'án kixin:

- 68 Imá jína Ìnchéni, na mé tí Dios kuènte tí naciòn Israel,  
kíxin ikui ch'án tí tjejóni kjuínchekaá ch'án naciòn kuènténi.
- 69 La ko kjuanjon ch'án ijnko nkexro t'etəon sinchekaáni ch'án na mé ijnko nkexro k'uaxrjeníxin tí ch'ín David, tí nkexro k'uékjich'ehe Dios xṛa.
- 70 Éxí k'uéchronkaxín tí sín kjueyá Dios k'uéchronka itén Dios ósé,
- 71 k'uéchronka Dios kíxin sinchekaáni ch'án kíxin ntá tsjachahya kaín tí sín nínkakhenni,
- 72 tsikonóehē ch'án tí sín k'uaxrjeníxinni ósé, ts'itjáyenhya ch'án tí nkehe tsíchronka ch'án tsoxiteyá.
- 73 Tíhi mé tsíkjo Dios tí ch'ín Abraham ósé kíxin nkehe chaxín tsoxiteyá chr'èxìn
- 74 kíxin sinchekaáni ch'án kíxin kohya nkehe sich'ehe ni tí sín nínkakhenni kíxin jína sich'ehe ni ch'án xṛa tsochrakonhyani,
- 75 la ntá jína ts'ejóni sinchetjóáni ch'án kaín yaon tí naxa tjejóhónni.
- 76 A ntá jaha xjeenni mé tsontáchro Dios kíxin jaha ijnko nkexro tsochrónka itén Dios tjen nkaya nkajní.
- Jaha tsítónxian ntia tsixìn Ìnchéni la ko jaha tsjásiyóxian ntia tsixìn ch'án.
- 77 Jaha tsjákohé tí chojni chjasintajni nkexrí tsjìn tí jie chóna sín, ntá tsaá sín.
- 78 A ntá Dios mé tjuèhēni ch'án la ko kuíkonóehēni ch'án, kíxin nkajní kuixìn ijnko xrohi nixin ts'inkaséyanxín tí yaon nixin.



79 Tíha mé tsikao tí xrohi ts'inkaséyénxín tí sín tjejó sítié la ko tí sín chrók'uitjáyan, la ko ts'ikónxínni tí ntja tsjanjon kjuaxróxin.

Na mé kaín tíhi chrónka tí ch'ín Zacarías.

80 A ntá tinkák'ánkí tí xjan a la ko Dios kjuínchek'ánkí tí kjuaxrexinkaon kuènte xjan kíxin antsí tsonohe xjan nkexrí tjen Dios. A ntá kjuák'e xjan nteje k'uánkí xjan kjuixrakájia tí yaon kjuankíxin kjuakohē ch'án tí chojni nación Israel.

## 2

### *Kokjíhi ch'ín Jesús*

*(Mt.1.18-25)*

1 A ntá tí yaon a na mé tí ch'ín imá t'etōan mé it'in Augusto César na mé k'uētoan ch'án kíxin ts'ínixín ihnié kaín xín chojni síin tí chjasin t'etōan ch'án kíxin tsonohe ch'án nkekjaín chojni síin.

2 Tí xrankíxixín k'uínixín ihnié sín tió Cirenio mé k'uégobernador k'uētoan estado Siria. 3 Kaínxín chojni t'ichjánxín sátsji sín chjasén sín kíxin ntaha ts'ínixín ihnié sín. 4 Mé xíkaha ch'ín José kjaxin k'uaxrjexín ch'án tí chjasin Nazaret estado Galilea ntá sákjuí ch'án tí estado Judea na mé sákjuí ch'án chjasin Belén tí tsíkokjíexín tí ch'ín rey David kíxin jehe ch'ín José mé tsík'axrjeníxin ch'án tí ch'ín David. 5 Sákjuí ch'án chjasin Belén sákjuíko ch'án tí tjan María kíxin ntiha ts'ínixínko ihnié ch'án tjan kíxin jehe tjan tsíkjatehe kíxin tsotehe ch'án. A ntá jehe tjan na mé ó tjejá tjan. 6 A ntá xíkaha kónhen nachrohe k'uéjó sín chjasin Belén, ntá kjuixraká tí yaon tsokjíhi xjeen tjan María. 7 A ntá ntiha kokjíexín tí xjeen tjan sao. Ntá kjuínchek'ísímá tjan xjan ka, a ntá kjuak'enkaya tjan ijnko nta neyá

iko kixin jehe sín la k'uitjahya sín nchia xranka ts'ok'èxín sín mé kjónté ntiha k'uéjó sín.

*Tí sín ángel la ko tí sín k'uáyakonhen kolélo*

<sup>8</sup> Kjaxin chjinaxón tí chjasin Belén tjejó iso chojni nteje ó la ntá ntahó titohe sín tí tie a kixin t'ayakonhen sín kolélo. <sup>9</sup> A ntá titàya k'uíkuèn sín ijnko ángel kuènte Dios la ko nkuíxín tí tjejó sín la k'uínkaséyan kixin tí kjuachaxin jié kuènte Dios kuikao ch'án. Ntá jehe sín la imá chrakon sín. <sup>10</sup> A ntá tí ch'ín ángel ntáchro kixin:

—Chrakonhyará jahará. Ijie k'uinka tsotjonkará nkehe jína nixin kixin tsochéhe kaín xín chojni <sup>11</sup> kixin ijie tí chjasén ch'ín David kokjiéxín tí nkexro tsaáxinrá jahará na mé Ìnchéni Cristo tíha. <sup>12</sup> Ntá tsoñoaxínrá jahará kixin tí xjan a kixin ika tjechr'ísímá xjan la ko ijnko nta neyá iko mé tjetsínkayá xjan —mé xikaha chrónka tí ch'ín ángel.

<sup>13</sup> A ntá titàya k'uíkuèn sín kixin nchónhya sín ángel kuixín nkaya nkajní tjejóko tí ch'ín ángel tjejótsje sín tjanchehe sín Dios kjuasáya, ntáchro sín kixin:

<sup>14</sup> Kjuasáyé Dios tjen nkaya nkajní kixin imá chónka ch'án kjuachaxin. Ntá chjasintajni ts'ixin kjuaxróxin tí tjejó tí sín sinchexiteyéhe ch'án. Mé xikaha ichro sín.

<sup>15</sup> A ntá tí sín ángel xíkjan sín nkaya nkajní, a ntá tí sín t'ayakonhen kolélo ikjo sín kíchó sín ntáchro sín kixin:

—Íntá sátsjini tí chjasin Belén tsjitsjeheni tí nkehe tsíkónhen kixin Ìnchéni k'uetoan kui tí nkexro kjuínchenoheni —ichro sín.

16 Ntá t̄j̄an sákjuí sín ntiha la k'uitja sín tí tjan María la ko tí ch'ín José la ko tí xjan a t̄j̄etsínkayá nta neyá iko. 17 A ntá tió k'uíkon sín x̄ikaha ntá chrónka sín tí nkehe tsíchrónka tí ángel k̄ixin nkexrí t̄jen tí xjan a. 18 Ntá chrakon kaín tí sín kuínhin k̄ixin x̄ikaha chrónka tí sín k'uáyakonhen kolélo. 19 K̄j̄ánchó tí tjan María la asén tjan ó xraxinkakonxín tjan kaín tíha. 20 A ntá tí sín k'uáyakonhen kolélo la sákjuí sín nt̄ia kuinkákjanchehe sín Dios kjuasáya k̄ixin kaín tí nkehe tsíkinhin sín la ko k'uíkon sín k̄ixin ó xiteyá kaín nkehe éxí tsíchrónka tí ángel.

*Sákjuiko sín tí xjan Jesús tí n̄inko Jerusalén*

21 A ntá tió xétja tí ijní yaon ntá kjuíncheke sín xjan xroye kuènte tí sín israelita ntá kjuínchek'in sín xjan Jesús éxí tsíntáchro tí ch'ín ángel chénka tí tjan María tí nax̄a kjuák'eyáhya tjan.

22 A ntá tió kuit̄ohe tjan María jína éxí chrónka ley kuènte Moisés \* ntá sákjuiko sín tí xjan tí chjasin Jerusalén k̄ixin tsochjéhe sín Dios kjuasáya.

23 Éxí ntáchro tí xroon ley kuènté Ìnchéni Dios k̄ixin: “A ntá kaín xjan ntoa tsokj̄ihi saoxín la mé tsochjéhe sín Dios tí xjan a sich'ehe xjan xr̄a Dios.”†

24 Ntá x̄ikaha sákjuí sín k̄ixin ntaha tsjanjon sín iko ts'enxín ntiha tsochjéxín sín Dios kjuasáyé éxí t'et̄oan tí ley kuènte ch'án na mé yaá kontóá najni o yaá kontóá nteje chrókjuanjon sín.

25 A ntá tí yaon a kjuák'e chjasin Jerusalén ijnko ch'án ó táda ch'án mé it'in ch'án Simeón. Jehe ch'án ijnko chojni jína la ko jnkochr̄ixín xraxinkaon

\* 2:22 Levítico 12.1-8 † 2:23 Éxodo 13.2,12

ch'án Dios la ko kjuák'echónhen ch'án kixin itsi tí nkexro tsaáxin tí nación Israel. Tí Nchakuen Dios tjeko tí ch'ín Simeón <sup>26</sup> tsíkjinchenohe ch'án kixin naxa ts'enhya ch'án ts'ikonjia ch'án tí nkexro Cristo, na mé tí nkexro tsochr'án Ìnchéni Dios. <sup>27</sup> A ntá tí Nchakuen Dios kjuínchexraxinkaon tí ch'ín a kixin sátsji ch'án nínko. A ntá tió kui tí ìné la ko it'é xjan Jesús k'uixenko sín xjan nkaxenhen nínko kixin sinchexiteyéhe sín tí nkehe t'etqan tí ley <sup>28</sup> ntá ch'ín Simeón kuakja ch'án tí xjan a kjóa ch'án ntá kjuanchehe ch'án Dios kjuasáya ntáchro ch'án kixin:

<sup>29</sup> Ijie jaha Ìnchéni Dios, tsjánjuan kjuachaxin kixin kjuaxróxin its'én janhan

kixin jaha ó kjuínchexiteyá tí nkehe tsíntáchrua

<sup>30</sup> kixin ó k'uíkonxin kuán tí nkexro tsaáxinni,

<sup>31</sup> mé xikaha kjuich'e kixin ts'ikon kaín xín chojni.

<sup>32</sup> Jehe ch'án mé tí xrohi ts'inkaséyanxín ntje tí sín jehya kuènte Israel,

la ko jehe ch'án tsjikosáyehe ch'án tí chjasín kuèntá Israel,

mé ichro ch'ín Simeón.

<sup>33</sup> Ntá ch'ín José la ko tí ìné ch'ín Jesús la chrakon sín kixin xikaha kuínhin sín ntáchro ch'ín Simeón kixin nkexrí tjen tí xjan. <sup>34</sup> Ntá ch'ín Simeón kjuíncheyaon ch'án sín ntá chénka ch'án tí tjan María mé tí ìné xjan Jesús kixin:

—Tí xjan i tsíkikao itsjé xra la itsjé tí sín Israel tsitekakuenhya sín xjan la tsítóhe sín la ko itsjé sín tsitekaon sín antsí tsonohe sín la ko nchónhya chojni tsotjinkakonhya tsinhin sín tí nkehe tsjako ch'án. <sup>35</sup> Mé xikaha tsonoxín nkexrí tjenkayáxin jnkojnko asén chojni. Kjánchó kaín tíha tsoyóhe

éxí ijnko chica espada chróchr'áte asán na mé tsoxakonhan la ko ts'avá má —ichro ch'án nixjehe ch'án tí tjan María.

<sup>36</sup> Kjaxin ntaha kjuák'e ijnko tjan chrónka itén Dios mé it'in tjan Ana, it'é mé it'in Fanuel, la mé tsík'axrjeníxin ch'án tí ch'ín Aser. Jehe tjan la ó nána tjan. Tí naxa k'uétjarisoá tjan la kótehe tjan. Ntá yatokoá nánó kjuák'eko tí xì tjan <sup>37</sup> ntá jie ochenta y cuatro nánó tsíkók'án tjan. Kuítóehya tjan tí xra kuènte nínko la mé ntahó tjen tjan ch'ehe tjan Ìnchéni Dios xra nchakotjin la ko tie la jnkoyaxón nehya tjan kíxin jína tsonixjehe tjan Dios. <sup>38</sup> Ntá kóchjina tí tjan Ana tí yaon, a ntá kjuixin kjuanchehe tjan kjuasáyé Dios ntá kjuankíxin chrónka tjan nkexrí tjen tí xjan Jesús nixjehe tjan kaín tí sín tjejóchónhen kíxin itsi nkexro sinchekaá tí chjasin Jerusalén.

### *Ntá kjan sín chjasin Nazaret*

<sup>39</sup> Na ntá tió kjuixin kjuínchexiteyá sín kaín nkehe t'etōan tí ley kuènte Dios ntá kjan sín estado Galilea na mé chjasén sín chaxín Nazaret. <sup>40</sup> A ntá tí xjan a mé k'uánkí xjan la ko tsanka xjan la ko imá kónohe xjan kíxin Dios imá tjinkitsa tjencheyaon xjan.

### *Tí xjan Jesús kjuák'e xjan tí nínko Jerusalén*

<sup>41</sup> Tí it'é la ko ìné tí xjan Jesús xráxín k'uékji sín kaín nánó tí chjasin Jerusalén kíxin tí kia pascua. <sup>42</sup> A ntá tió xetjehe ch'ín Jesús tí teyó nánó, ntá sákjui sín kaín sín tí chjasin Jerusalén kíxin xikaha kuènnen sín kíxin tí kia a. <sup>43</sup> A ntá kjanxin sín ntiha sáchrókjui sín chjasén sín tió k'uátsínka kia

la tí xjan Jesús ó tsíkitohe xjan Jerusalén ntahó, kjánchó ìné xjan la ko ch'ín José xraxinkakonhya sín kixin kohya tí xjan. <sup>44</sup> Jehe sín mé kjuenkayáxin sín kixin ách'e tí sín kuichréhe mé kuikao sín xjan la ntá xikaha chjina ijnko yaon ó tjejóyá sín ntia tsíkji sín. A ntá kjueyá sín xjan tí tjejó tí sín kjéhya la ko tí sín chóxin sín <sup>45</sup> kjánchó k'uitjahya sín xjan. Ntá kjan sín tí chjasin Jerusalén kixin tsjeyá sín xjan ntiha.

<sup>46</sup> Ntá k'uaátsínka iní yaon ntá k'uitja sín xjan la mé nkaxenhen nínko ntiha tjetjaxin xjan jnkosiné tí tjejó tí sín maestro tjako tí ley la tjetinhin xjan tí nkehe ntáchro sín la ko tjetjanchankíhi xjan tí jehe sín. <sup>47</sup> Ntá kaín tí sín tjejóntaxin tjejótinhin sín mé chrakon sín kixin xikaha imá nohe xjan la ko xikaha tjatehe xjan kaín nkehe tjanchankíhi sín xjan. <sup>48</sup> Ntá tió k'uíkon ìné la ko it'é la chrakon sín. Ntá ntáchro ìné kixin:

—Xjeenni, ¿nkekuènte xikaha kjuich'e? It'á la ko janhan imá kóxakönhenni kjueyáni tí jaha —ichro tjan.

<sup>49</sup> Ntá ntáchro ch'ín Jesús kixin:

—¿Nkekuènte tjeyá tí jeheni? ¿Á noahya jaha kixin tóxakönhenni kixin tí xra kuènte It'éni? —ichro ch'án.

<sup>50</sup> Kjánchó kíenxínhya sín nkexrí t'axrjexín tí nkehe ntáchro ch'án.

<sup>51</sup> Ntá kjan sín chjasin Nazaret. A ntá ntiha naxa kuítekakohen xjan tí jehe sín. A ntá tí ìné la ntá asén tjan xráxín ó nohe kixin xikaha kónhen. <sup>52</sup> La ko naxa k'uánkí xjan kónteto xjan la ko k'uánkí tí kjuaxrexinkaon kuènte xjan la ko Dios kóxrjínhin

nkexrí kjuínchexiteyá xjan la ko kja\_xin kaín chojni kó\_xrjínhìn sín kixin jína tjen xjan.

### 3

*Ch'ín Juan Bautista kjuák'e nteje kjuako itén Dios (Mt. 3.1-12; Mr. 1.1-8; Jn. 1.19-28)*

<sup>1</sup> A ntá quince nánó k'uék'etōan ch'ín Tiberio tí xra gobierno, la ko tí ch'ín Poncio Pilato k'uégobrador tí estado Judea, la ko tí ch'ín Herodes k'uégobrador tí estado Galilea, la ko tí kichó ch'án Felipe mé k'uégobrador estado Iturea la ko estado Traconite, la ko ch'ín Lisantias k'uégobrador tí estado Abilinia. <sup>2</sup> A ntá ch'ín Anás la ko ch'ín Caifás k'uéchonta sín xra nchat'á t'etōan. A ntá Dios mé kjuanjon kjuachaxin k'uáyéhe ch'ín Juan itjen ch'án nteje tsochrónka ch'án itén Dios. Ntá jehe ch'án it'é ch'án Zacarías. <sup>3</sup> Ch'ín Juan k'uátsínka ch'án kaín tí chjasin chjino tí ntarío Jordán kjuakōhe ch'án chojni ntiha kixin chrókjuinkí sín tí nkehe tjenkayáxin sín chrókuítóhe sín tí ijié sín ntá chrókuikite sín kixin xikaha mé chrókjuin ijié sín. <sup>4</sup> Mé xikaha kónhen éxí k'uéchronka la ko tsíkjin ch'ín Isaías, mé tí nkexro k'uéchronka itén Dios ósé kixin: Tsinhin sín itén ijnko nkexro tsjak'e nteje ts'èya tsontácho kixin:

“Tóxakonhanrá ncheyóxinrá ntia tsixin Ìnchéni Takítjehérá ijnko ntia ntoí.

<sup>5</sup> Kaínxín tsaka mé tsoyóxin,  
la ko kaín xín jna la ko kaín xín itjo tsitohe yóxin,  
la ko tí ntia tsíxrèya mé tsoxrentoá,  
la ko kaín tí ntia yóxinhya la mé tsoyóxin;

<sup>6</sup> Xikaha mé kaín xín chojni chjasintajni mé ts'ikon  
sín kixin Dios mé chrókuaáxin sín.”\*

Mé xikaha ichro itén Dios.

<sup>7</sup> A ntá tió kjuíji chojni ntiha kixin ch'ín Juan  
chrókuikite ch'án sín ntá ntáche ch'án tí jehe sín  
kixin:

—Jahará tsík'axrjeníxinrá konche. ¿Xá  
nkexro kjuíntanohará kixin chrókuinkeherá tí  
kjuanínkaon kuente Dios ó tsi? <sup>8</sup> T'ichjánxin  
kixin chrók'uejorá jnkojína chrókjuákoxinrá kixin  
chaxín kjuitoxinhínrá tí nkehe tjenkayáxinrá.  
Jahará nchehnerá ntáchrórá kixin k'uaxrjeníxinrá  
ch'ín Abraham. Janhan ntáxrjan kixin kjónté tí  
xro i la Dios tsjacha chrókjuich'éna ch'án chojni  
k'uaxrjeníxin ch'ín Abraham. <sup>9</sup> Kixin tí chica  
hacha ó tjechónhen tsochrínjinxín tí nta. A ntá kaín  
xín nta t'ónahya to jína mé tsochrínjin kixin tsoche  
—ichro ch'án.

<sup>10</sup> A ntá tí chojni mé kjuanchankíhi sín ch'án  
kixin:

—A ntá tí xikaha, ¿a ntá jeheni nkehe tí  
chrókjuich'eni? —ichro sín.

<sup>11</sup> Ntá kjuátehe ch'ín Juan kixin:

—Tí nkexro chóna yaá camisa la  
chrókjuinchekitonhen tí nkexro chóntahya. La  
ko tí nkexro chóna nkehe sine chróchjéhe sín tí  
nkexro chóntahya nkehe sine —ichro ch'án.

<sup>12</sup> Kjaxin ikui iso tí sín nchekjènkí kixin  
chrókuikite sín. Ntá kjuanchankíhi sín tí ch'ín  
Juan kixin:

—Maestro, ¿nkehe chrókjuich'eni jeheni? —ichro  
sín.

\* 3:6 3.4-6 Isaías 40.3-5



13 Ntá ntáchro ch'ín Juan kixin:

—Jehó éxí tí tsík'ítuanhanrá chrókjuinchekjènkirá —ichro ch'án.

14 Kjaxin iso sín soldado kjuanchankíhi sín ch'án kixin:

—¿Kjaxin jeheni nkehe chrókjuich'eni? —ichro sín.

Ntá kjuátehe ch'án kixin:

—Teéhyará ninkexró tí chichakoen sín la ko ninkexró sich'énéhyará kjuach'ia la ko kjónté tí chichaon tjachará ó la kjuaxróxin chrók'uejorá —ichro ch'án.

15 Kaín tí chojni chjasin k'uejóchónhen sín tóxakonhen asén sín tjinkaon sín tsonohe sín kixin á tí ch'ín Juan mé tí Cristo. 16 Kjánchó chénka ch'ín Juan kaín tí sín tjejó a kixin:

—Janhan mé ìntà tikítexián chojni. A ntá tí nkexro itsi chr'éxin mé tsikítexínrá tí Nchakuen Dios la ko xrohi. Antsí t'etōan ch'án a ntá janhan la kánhyó. Méxra chrókósuàna chrókjuasintankaha ch'án tí correa tí tokaté ch'án. 17 Jehé ch'án la ó tjexraá ch'án pala sinchetjuáxin ch'án noatrigó kixin tí ntachjiji trigo la ókjé tsjejo ch'án a ntá tí noatrigó la tsjenájín ch'án la ts'enkachjina ch'án. A ntá tí ntachjiji trigo la tsjakaxín ch'án ijnko xrohi ts'ankahya jnkochrín —mé xikaha ichro ch'ín Juan.

18 Mé xikaha chronkaxín ch'án la ko itsjé í so nkehe kjuínchexraxinkaon ch'án chojni mé xikaha kjuakōexín ch'án sín tí tan jína. 19 Kjaxin kjuentuéhe ch'án tí ch'ín Herodes kixin chóna ch'án tí tjan Herodías, mé tí ichjién kichó ch'án Felipe, la ko kjuentuéhe ch'án tí ch'ín Herodes kixin tí í so nkehe

jínahya tsíkjich'e ch'án. <sup>20</sup> Kjánchó ch'ín Herodes ántosén ch'án kjónté kuínhin ch'án la kjuínchek'ánkí ch'án tí ijíé ch'án inaá kíxin kjuak'echjina ch'án tí ch'ín Juan tí ntqechiso.

*Kuíkite ch'ín Jesús*

*(Mt. 3.13-17; Mr. 1.9-11)*

<sup>21</sup> A ntá naxa kuènhya tíha naxa kjuák'e ch'ín Juan kuíkite ch'án chojni ntá kjaxin ch'ín Jesús mé kuíkite ch'án. A ntá tjenixjehe ch'án Dios ntá xitjehe nkajní <sup>22</sup> ntá k'uínkajin Nchakuen Dios éxí ijnko kontóá tsjehe la kjuák'e chrítaón kja ch'án. Ntá xrínahya kuínhin sín itén nkexro nkaya nkajní ntáchro kíxin:

—Jaha mé xjanna la tjuaha tí jaha. Imá chàna kíxin nchexiteyána tí jaha.

*Tí sín tsík'axrjeníxin ch'ín Jesucristo*

*(Mt. 1.1-17)*

<sup>23</sup> Ch'ín Jesús k'uéchóna ch'án chjino treinta nánó tió kjuankíxin kjuako ch'án. Ntá kjuenkayáxin sín kíxin it'é la mé ch'ín José. Ntá it'é tí ch'ín José la mé ch'ín Elí. <sup>24</sup> A ntá it'é tí ch'ín Elí la mé ch'ín Matat; a ntá it'é tí ch'ín Matat la mé ch'ín Leví, a ntá it'é tí ch'ín Leví la mé ch'ín Melqui; a ntá it'é tí ch'ín Melqui la mé ch'ín Jana; a ntá it'é tí ch'ín Jana la mé ch'ín José. <sup>25</sup> A ntá it'é tí ch'ín José la mé ch'ín Matatías, a ntá it'é tí ch'ín Matatías la mé ch'ín Amós, a ntá it'é tí ch'ín Amós la mé ch'ín Nahum, a ntá it'é tí ch'ín Nahum la mé ch'ín Esli; a ntá it'é ch'ín Esli la mé ch'ín Nagai, <sup>26</sup> a ntá it'é tí ch'ín Nagai la mé ch'ín Maat, a ntá it'é tí ch'ín Maat la mé ch'ín Matatías, a ntá it'é tí ch'ín Matatías la mé ch'ín Semei, a ntá it'é tí ch'ín Semei na mé ch'ín

José, a ntá it'é tí ch'ín José na mé ch'ín Judá, <sup>27</sup> a ntá it'é tí ch'ín Judá na mé ch'ín Joana, a ntá it'é tí ch'ín Joana la mé ch'ín Resa, a ntá it'é tí ch'ín Resa na mé ch'ín Zorobabel, a ntá it'é tí ch'ín Zorobabel na mé ch'ín Salatiel, a ntá it'é tí ch'ín Salatiel na mé ch'ín Neri, <sup>28</sup> a ntá it'é tí ch'ín Neri na mé ch'ín Melqui, a ntá it'é tí ch'ín Melqui na mé ch'ín Adi, a ntá it'é tí ch'ín Adi na mé ch'ín Cosam, a ntá it'é tí ch'ín Cosam na mé ch'ín Elmodam, a ntá it'é tí ch'ín Elmodam na mé ch'ín Er, <sup>29</sup> a ntá it'é tí ch'ín Er na mé ch'ín Josué, a ntá it'é tí ch'ín Josué na mé ch'ín Eliezer, a ntá it'é tí ch'ín Eliezer na mé ch'ín Jorim, a ntá it'é tí ch'ín Jorim na mé ch'ín Matat, <sup>30</sup> a ntá it'é tí ch'ín Matat la mé ch'ín Leví, a ntá it'é tí ch'ín Leví na mé ch'ín Simeón, a ntá it'é tí ch'ín Simeón na mé ch'ín Judá, a ntá it'é tí ch'ín Judá na mé ch'ín José, a ntá it'é tí ch'ín José na mé ch'ín Jonán, a ntá it'é tí ch'ín Jonán na mé ch'ín Eliaquim, <sup>31</sup> a ntá it'é tí ch'ín Eliaquim na mé ch'ín Melea, a ntá it'é tí ch'ín Melea na mé ch'ín Mainán, a ntá it'é tí ch'ín Mainán na mé ch'ín Matata, a ntá it'é tí ch'ín Matata na mé ch'ín Natán, <sup>32</sup> a ntá it'é tí ch'ín Natán na mé ch'ín David, a ntá it'é tí ch'ín David na mé ch'ín Isaí, a ntá it'é tí ch'ín Isaí na mé ch'ín Obed, a ntá it'é tí ch'ín Obed na mé ch'ín Booz, a ntá it'é tí ch'ín Booz na mé ch'ín Salmón, a ntá it'é tí ch'ín Salmón na mé ch'ín Naasón, <sup>33</sup> a ntá it'é tí ch'ín Naasón na mé ch'ín Aminadab, a ntá it'é tí ch'ín Aminadab na mé ch'ín Aram, a ntá it'é tí ch'ín Aram na mé ch'ín Esrom, a ntá it'é tí ch'ín Esrom na mé ch'ín Fares, a ntá it'é tí ch'ín Fares na mé ch'ín Judá, <sup>34</sup> a ntá it'é tí ch'ín Judá na mé ch'ín Jacob, a ntá it'é tí ch'ín Jacob na mé ch'ín Isaac, a ntá it'é tí ch'ín Isaac na mé ch'ín Abraham, a ntá

it'é tí ch'ín Abraham ná mé ch'ín Taré, a ntá it'é tí ch'ín Taré na mé ch'ín Nacor, <sup>35</sup> a ntá it'é tí ch'ín Nacor na mé ch'ín Serug, a ntá it'é tí ch'ín Serug na mé ch'ín Ragau, a ntá it'é tí ch'ín Ragau na mé ch'ín Peleg, a ntá it'é tí ch'ín Peleg na mé ch'ín Heber, a ntá it'é tí ch'ín Heber na mé ch'ín Sala, <sup>36</sup> a ntá it'é tí ch'ín Sala na mé ch'ín Cainán, a ntá it'é tí ch'ín Cainán na mé ch'ín Arfaxad, a ntá it'e tí ch'ín Arfaxad na mé ch'ín Sem, a ntá it'é tí ch'ín Sem na mé ch'ín Noé, a ntá it'é tí ch'ín Noé na mé ch'ín Lamec, <sup>37</sup> a ntá it'é tí ch'ín Lemec na mé ch'ín Matusalén, a ntá it'é tí ch'ín Matusalén na mé ch'ín Enoc, a ntá it'é tí ch'ín Enoc na mé ch'ín Jared, a ntá it'é tí ch'ín Jared na mé ch'ín Mahalaleel, a ntá it'é tí ch'ín Mahalaleel na mé ch'ín Cainán, <sup>38</sup> a ntá it'é tí ch'ín Cainán na mé ch'ín Enós, a ntá it'é tí ch'ín Enós na mé ch'ín Set, a ntá it'é tí ch'ín Set na mé ch'ín Adán, a ntá Dios mé xjeen ch'ín Adán.

## 4

### *Ch'ín Tsochren chrókjuachroe tí ch'ín Jesús (Mt. 4.1-11; Mr. 1.12-13)*

<sup>1</sup> A ntá ch'ín Jesús imá chón̄ta ch'án kjuachaxién Nchakuen Dios ntá kjanxin ch'án tí ntarío Jordán. Ntá tí Nchakuen Dios sákjuiko ch'án nteje. <sup>2</sup> Ntaha kjuák'e ch'án cuarenta yaon na ntá tí ch'ín Tsochren tjinkaon chrókjuachroe tí jehe ch'án. Kjónehya ch'án ninkehó tí cuarenta yaon a, a ntá chr'éxin ntá xrinahya ik'uén ch'án kjinta. <sup>3</sup> Ntá ntáchro tí ch'ín Tsochren kixin:

—Tí chaxín jaha Xjeen Dios la ntáche tí xro i kixin chrók'óna niotja.

<sup>4</sup> A ntá kjuátēhe ch'ín Jesús ntáchro ch'án kixin:

—Náhi. Ntáchro xroon itén Dios kixin: “Jehya niotja ó chrók'uejóchónxin chojni. Náhi. Kaín tí tan nixja Dios tjejóchónxin chojni”<sup>\*</sup> —ichro ch'án.

<sup>5</sup> Ntá sákjuiko ch'ín Tsochren tí ch'ín Jesús ijnko jna imá noi ntá kjuako tí Jínahya kaín tí nación síin chjasintajni. <sup>6</sup> Ntá ntáchro tí ch'ín Tsochren kixin:

—Janhan tsotjaha kaín tí kjuachaxin la ko kaín tí nkehe tje te chóna kaín tí nación a. Janhan na k'uayáha kaín tíha la ntá jie tsotjaha tí nkexro tjínkavan tsotjaha. <sup>7</sup> Tí tsjak'éxian tóch'ian tsjikosáyana tí janhan ntá kaín tí nkehe la ts'óna kuéntá —ichro ch'án.

<sup>8</sup> Ntá kjuátehe ch'ín Jesús ntáchro ch'án kixin:

—Sátjia Satanás, kixin xroon itén Dios ntáchro kixin “Chrókjuikosáyehé Inchéni Dios la jehó ch'án chrókjuich'ehé xra”<sup>†</sup> —ichro ch'án.

<sup>9</sup> A ntá ch'ín Tsochren mé sákjuiko ch'ín Jesús tí chjasin Jerusalén la sákjuiko ch'án tí chrítaón tí kja njnko, a ntá ntáchro ch'án kixin:

—Tí chaxín Xjeen Dios jaha la títóhé t'anótjenxian tí noi ntihi <sup>10</sup> kixin ntáchro xroon itén Dios kixin:

Dios mé ts'etuenhen tí sín ángel kuènte ch'án kixin ts'ayakonhan sín.‡

<sup>11</sup> Tsotsé sín itjá

kixin tsotéhya totá ts'itja xro tí ts'anótjen§

—mé xikaha ichro ch'ín Tsochren.

<sup>12</sup> Ntá kjuátehe ch'ín Jesús ntáchro ch'án kixin:

---

<sup>\*</sup> 4:4 Deuteronomio 8.8    <sup>†</sup> 4:8 Deuteronomio 6.13    <sup>‡</sup> 4:10 Salmo 91.11    <sup>§</sup> 4:11 Salmo 91.12

—Náhi. Kjaxin ntáchro xroon itén Dios kixin: “Chjinihya chrókjuásixián kjuaxroan kjuachaxin kuènte Ìnchéni Dios”<sup>\*</sup> —ichro ch'ín Jesús.

<sup>13</sup> Mé xikaha tió kjuachahya tí ch'ín Tsochren kaín nkehe chrók'uētuenhen tí ch'ín Jesús ntá k'uaxrjenta ch'án iso yaon.

*Ch'ín Jesús kjuankixin ch'án tí xra kuènte ch'án estado Galilea*

*(Mt. 4.12-17; Mr. 1.14-15)*

<sup>14</sup> Ntá ch'ín Jesús xikjan ch'án estado Galilea inaá na imá chóna ch'án kjuachaxin kuènte Nchakuen Dios. Ntá tjejóto sín nkuixín ntiha kixin nkexro tí jehe ch'án. <sup>15</sup> Kjuakoxin ch'án tí ninkoe sín kaín chjasin la ko kaín xín chojni kjuanchia sín kjuasáya kixin kóxrjinhin sín tí kjuako ch'án.

*Ch'ín Jesús kjuák'e ch'án chjasin Nazaret*

*(Mt. 13.53-58; Mr. 6.1-6)*

<sup>16</sup> Ntá ch'ín Jesús sákjuí ch'án chjasin Nazaret na mé tí chjasin tsík'ánkixin ch'án. Ntá tí yaon t'ok'éhe sín mé k'uixenhen ch'án ijnko ninko Israel kixin xikaha kuènen ch'án. Ntá kjuák'exín toté ch'án kixin sinchekuáxin ch'án tí xroon itén Dios. <sup>17</sup> Chjéhe sín ch'án tí xroon kuènte tí profeta Isaías. Ntá kuakitjehe ch'án tí xroon ntá k'uitja ch'án nketí nixja xikihí:

<sup>18</sup> Tí Nchakuen It'éni Dios tjetjinkitsana má, kixin kjueyána ch'án kixin tsoxrjanka tí tan jína kuènte Dios tsjakohá tí sín nòa.

K'uētuanha ch'án kixin sintakitohá jína tí sín t'ává asén kixin chónahya sín nkerí tsaáxin sín, la ko tsjakohá tí sín tjejóchjina kixin nkexrí tsaá sín,

<sup>\*</sup> 4:12 Deuteronomio 6.16

la ko s̄intak'ikuān tí s̄ín t'ikonhya,  
 la ko s̄intakaá kaín tí s̄ín tjejóťjasóte kohya nkehe  
 tsaáxin s̄ín,

19 la ko tsoxrjanka k̄ixin ó kjuixraká tí yaon k̄ixin tí  
 nkexro tsitekaon la tsaá s̄ín.†

20 A ntá ch'ín Jesús kjuixin kjuínchekuáxin ch'án  
 tí xroon, a ntá chjéhe ch'án tí ch'ín tjink̄itsa tí  
 xra n̄inko ntá kjuák'etjāxin ch'án. Ntá kaín tí s̄ín  
 tsíkójnkotsé ntiha n̄inko naxa tjejókomá s̄ín tí jehe  
 ch'án. 21 Ntá kjuank̄ixin chronkaxín ch'án ntáchro  
 ch'án k̄ixin:

—Ntá ijie la ó xiteyá tí nkehe kjuintakuáxian tí  
 xroon itén Dios kuínhínrá —ichro ch'án.

22 Ntá kaín s̄ín kóxrjinh̄in s̄ín tí kjuako ch'ín Jesús  
 la ko chrakon s̄ín k̄ixin náxrjón tí nkehe nixja ch'án.  
 Ntá kjuanchank̄ihi s̄ín k̄íchó s̄ín ntáchro s̄ín k̄ixin:

—¿A jehya xjeen ch'ín José tíhi? —ichro s̄ín.

23 Ntá kjuátehe ch'ín Jesús ntáchro ch'án k̄ixin:

—Kjá tsontáchrórá k̄ixin janhan ijnko chojni ch'e  
 xroan chrókjuintak̄itohā jína asenná senó, la ko  
 tsontáchrórá k̄ixin tí nkehe kuínhínrá kjuít'a tí  
 chjasin Capernaum xikaha chrókjuít'a ntihi ch-  
 jasenná, tsixrorá —ichro ch'án.

24 Naxa tjenixja ch'án ntáchro ch'án k̄ixin:

—Ijnko nkehe chaxín tsotjonkará k̄ixin tí s̄ín ch-  
 jasén ijnko nkexro chrónka itén Dios la mé xráxín  
 chóntehya s̄ín kjuasáyé tí nkexro a. 25 Chaxín  
 ntáxrjan k̄ixin k'uéjó itsjé chojni chjin tsíkók'án  
 tí nacióon Israel tió kjuák'e ch'ín Elías tí nkexro  
 k'uéchrónka itén Dios la ntá í k'uániáhya chrin iní  
 nánó ko t'ó la ko imá kókjinta nkuíxín chjasin  
 ntiha. 26 Kjánchó Dios la k'uetuenhya ch'ín Elías

† 4:19 4.18-19 Isaías 61.1-2

sáchrókjuitsjehe ch'án nijnko chojni chjin tsíkók'án tí nación Israel. Náhí. Dios k'uetuenhen ch'án kíxin sátsjitsjehe ch'án ijnko chojni chjin tsíkók'án itjen chjasin Sarepta chjino chjasin Sidón.‡ 27 Kjaxin nación Israel k'uejó nchónhya chojni chóna chinlepra tió kjuák'e ch'ín Eliseo chrónka ch'án itén Dios, kjánchó nijnko sín kuítóehya sín jína la mé jehó ch'ín Naamán kjuixin ch'án nación Siria mé kuítóhe ch'án jína§ —mé xikaha ichro ch'án.

28 A ntá tió kuínhin sín xikaha ntáchro ch'ín Jesús la ntá kaín tí chojni k'uejóxenhen ninko la mé imá kónínkaon sín. 29 K'uínkatjen sín itsé sín ch'án sákjuíko sín ch'án tí ikon chjasin la sákjuíko sín ch'án chrítaón tí tjo tí tjen tí chjasin a chrókjuinчек'anótjenxin sín ch'án tí tjo a. 30 A ntá ch'ín Jesús k'uátsínka jnkosiné tí siín tí jehe sín la sákjuí ch'án.

*Ijnko chojni chóna ijnko nchakuen tí jínahya  
(Mr. 1.21-28)*

31 A ntá ch'ín Jesús sákjuí ch'án tí chjasin Capernaum na mé ijnko chjasin estado Galilea, na ntá ntaha kjuankíxin ch'án kjuakohé ch'án chojni tí yaon t'ok'éhe sín. 32 Chrakon sín kíxin nkexrí kjuako ch'án kíxin kjuakoxin ch'án kíxin chóna ch'án kjuachaxin.

33 A ntá nkaxenhen ninko kjuák'e ijnko ch'ín chóna ijnko nchakuen tí jínahya k'óyakoxín itén tí ch'ín a, ntáchro kíxin:

34 —Títóhéni; ¿nkekuénte tjiaté tí jeheni kaín ni, jaha Jesús kjuíxian chjasin Nazaret? ¿Á k'uinka

‡ 4:26 4.25,26 1 Reyes 17.9;18.1 § 4:27 2 Reyes 5.1-14



kíxin sinček'itjáyanni? Ó tjátsoan tí jaha la ko nòna kíxin jaha mé tí nkexro tjóá kuènte Dios —ichro tí nchakuen tí jínahya.

<sup>35</sup> Ntá ch'ín Jesús jiehe k'uetuēnhen tí nchakuen tí jínahya ntáchro ch'án kíxin:

—Táníá. T'axrjéxian tí ch'ín a —ichro ch'án.

A ntá tí nchakuen tí jínahya kjuáka tí ch'ín a kjuítsínka ch'án nonte jnkosiné tí siín sín la k'uaxrje tí nchakuen tí jínahya la kohya ninkehó kónhen tí ch'ín kjuítsínka. <sup>36</sup> A ntá kaín sín chrakon sín itjo sín kíchó sín kíxin:

—¿Xá nkexrí kíxin xíkaha nixja tí ch'ín i? Jhehe ch'án chón̄ta kjuachaxín kíxin k'uetuēnhen ch'án tí nchakuen tí jínahya k'uaxrjexín tí nkexro i —ichro sín.

<sup>37</sup> A ntá nkuíxín ntiha ikjo sín kíchó sín kíxin nkerí kjuaxroan kjuích'e ch'ín Jesús.

*Ch'ín Jesús kjuínčekitohe jína tí tjan ich'ee ch'ín Simón Pedro*  
(Mt. 8.14-15; Mr. 1.29-31)

<sup>38</sup> Ntá ch'ín Jesús k'uaxrjexín ch'án tí n̄nko la ntá k'uíxēnhen ch'án nt̄oē ch'ín Simón. A ntá tí tjan ich'ee ch'ín Simón mé níhi tjan chón̄ta tjan ijnko sóa jié ntá chronóēhe sín ch'án kíxin chrókjuínčekitohe ch'án tjan jína. <sup>39</sup> Ntá k'uísén ch'ín Jesús tí tjan tjan ntá k'uetuēnhen ch'án tí sóa a ntá kjuìn. Ntá tuénxín k'uàya tjan la ntá kjuanjon tjan nkehe sine sín.

*Ch'ín Jesús kjuínčekitohe ch'án jína itsjé chojni níhi*  
(Mt. 8.16-17; Mr. 1.32-34)

<sup>40</sup> A ntá kuétaón yaon ntá kaín tí sín chón̄ta sín s̄inn̄íhi chón̄ta sín nchón̄hya clase chin mé kuik̄ao sín tí t̄jen ch'ín Jesús. Ntá k̄juak'et̄ja t̄ja ch'án̄ j̄nkojn̄ko tí jehe sín a ntá x̄ikaha kuítóhe sín j̄ina.

<sup>41</sup> La ko nchón̄hya chojni níhi chón̄ta nch̄akuen tí j̄inahya la mé k'uaxr̄je tí nch̄akuen tí j̄inahya la k'óyako la ko ntáchro kíxin:

—Jaha mé X̄jeen Dios —mé ichro tí nch̄akuen tí j̄inahya.

Kjánchó ch'ín Jesús k'uet̄uēnhen ch'án̄ tí nch̄akuen tí j̄inahya la k̄juanj̄onhya ch'án̄ k̄juachaxin kíxin t̄sonix̄ja kíxin ó nohe tí nch̄akuen tí j̄inahya kíxin jehe ch'án̄ na mé tí nkexro Cristo.

*Ch'ín Jesús k̄juako ch'án̄ tí estado Galilea  
(Mr. 1.35-39)*

<sup>42</sup> A ntá tí kóyaon k'uínkaséyan ntá ch'ín Jesús k'uaxr̄jenta ch'án̄ ch̄jasin sák̄juí ch'án̄ nteje. A ntá kaín tí chojni k̄juík̄jeyá sín ch'án̄ la k'uit̄ja sín tí t̄jen ch'án̄. T̄jinkaon sín chrók̄juinch̄exr̄jenhen sín ch'án̄ kíxin sáchrók̄juíhya ch'án̄ ókjé. <sup>43</sup> Kjánchó k̄juátehe ch'ín Jesús ntáchro ch'án̄ kíxin:

—T'ich̄ján̄xin kíxin sáts̄jia kaín ch̄jasin ókjé t̄soxr̄j̄anka tí tan j̄ina kuēnte Dios kíxin nkexr̄í tí k̄juachaxin t'et̄oan Dios, kíxin xr̄a ó mé k'uinka —ichro ch'án̄.

<sup>44</sup> A ntá x̄ikaha k'uáj̄ik̄jako ch'ín Jesús kaín tí n̄inko Israel tí estado Galilea.

## 5

*K̄juaxroan itsé sín koche  
(Mt. 4.18-22; Mr. 1.16-20)*

1 Ntá ijnko yaon kjuák'e ch'ín Jesús chrínta ntayaon Genesaret ntá kóchjina nchónhya chojni na mé k'uíxitja kíchó sín kixin tjinkaon sín chrókuinhin sín itén Dios. 2 Ntá k'uíkon ch'ín Jesús kixin tjejó iyó ntabárcō jehó chjino chrínta ntayaon. A ntá tí sín itsé koche mé tsík'axrjexín sín ntiha la k'uéjō sín tjentoá sín la ko tjejótonemá sín tí nchísén tséya sín koche. 3 Ntá ch'ín Jesús k'ujt'ótjen ch'án ijnko tí ntabárcō ntiha na mé ntabárcō kuènte ch'ín Simón na ntá chronóehe ch'án tí ch'ín Simón kixin sátsjiko ch'án ntabárcō ijnko chrínta ntá kjínhya. Ntá ntahó kjuák'enkáya ch'ín Jesús tí nta kjuák'etjaxin ch'án kjuakohe ch'án nchónhya chojni siín chrínta ntá. 4 A ntá tió kjuixin nixja ch'án ntá ntáche ch'án tí ch'ín Simón kixin:

—Tjíkōa ntabárcō tí tjiá ntá ninka ntá itérá tí nchísén tseyará koche —ichro ch'án.

5 Ntá kjuátehe ch'ín Simón ntáchro ch'án kixin:

—Maestro, kjuích'eni xrā kuenté tie la tséhyani ninkehó koche. Kjánchó tí jaha xikaha kuétueñhenni la mé tsochr'ánni tí nchísén inaá —ichro ch'án.

6 Na ntá xikaha kjuích'e sín la ntá nchónhya koche tsítsé tí nchísén la ntá tí nchísén kjuankixin tinkák'ichje. 7 Ntá k'uèyaxin sín tja sín kixin chróxrakoa tí sín ch'eko sín xrā tjejóxehen tí í jnko ntabárcō kixin tsjinkitsa sín. Ntá xráko sín ntabárcō kuènte sín ntá kjuínchekaón sín yóí tí ntabárcō ntá chrókjuachahya tí ntabárcō na tjinkaon chrók'uániánkí ntá. 8 Ntá xikaha k'uíkon ch'ín Simón Pedro ntá kjuák'exín toch'in ch'án nkayakon ch'ín Jesús ntá ntáchro ch'án kixin:

—T̄itohéni Ìnchéni kíxin jeheni ijnko chojni chón̄ta j̄ie —ichro ch'án.

<sup>9</sup> Mé x̄ikaha ichro ch'ín Simón kíxin chrakon ch'án la ko k̄j̄axin chrakon tí í so sín t̄jejóko ch'án kíxin x̄ikaha kónhen xrenáj̄ín nchónhya koche.

<sup>10</sup> La ko ch'ín Jacobo la ko ch'ín Juan, x̄jeen ch'ín Zebedeo, na mé j̄nkokoá ch'eko sín x̄ra ch'ín Simón, la k̄j̄axin chrakon sín. K̄j̄ánchó ntáche ch'ín Jesús tí ch'ín Simón kíxin:

—Chrakonhya. Senó la koche k'uét̄se la nta j̄ie la náhí la mé chojni tsjéyá —ichro ch'án.

<sup>11</sup> Ntá tió k̄juj̄iko sín tí ntabárc̄o tí chr̄inta nt̄a la kuítóhe sín kaín nkehe kuénte sín ntá chr̄eh̄e sín sák̄juíko sín tí ch'ín Jesús.

*Ch'ín Jesús k̄juínchekit̄oh̄e ch'án j̄ina ijnko chojni chón̄ta chinlepra*

*(Mt. 8.1-4; Mr. 1.40-45)*

<sup>12</sup> K̄juák'e ch'ín Jesús ijnko tí ch̄jasin, ntá kui ijnko chojni níhi chón̄ta chinlepra. Ā ntá tió k'uíkon ch'án tí ch'ín Jesús ntá k̄juák'exín toch'in ch'án chrónógh̄e ch'án j̄nkoj̄ina ntáchro ch'án kíxin:

—Ìnchéni, tí t̄j̄inkávan jaha la j̄ina chrók̄juínchekit̄oh̄eni j̄ina —ichro ch'án.

<sup>13</sup> Ntá ch'ín Jesús k̄juéntoá t̄ja ch'án ntá k̄juak'et̄ja t̄ja ch'án chr̄ítaón tí s̄j̄inníhi ntáchro ch'án kíxin:

—Méx̄ra x̄ikaha t̄j̄ínk̄avan. Ntá j̄ie s̄j̄intakit̄oha j̄ina —ichro ch'án.

Ntá x̄ikaha ichro ch'án ntá tí chinlepra tuénx̄ín k̄juínhin tí s̄j̄inníhi. <sup>14</sup> Ā ntá k'uét̄uēnhen ch'ín Jesús tí ch'ín a kíxin chróchenkahya ch'án ninkexró. Ntáchro ch'án kíxin:

—Sátjia tjítsjehé tí nchaṭ'á la tsjánjuan tí nkehe tsík'et̄oan ch'ín Moisés ts'áyéhe Dios\* kixin ntá t̄soṇoexín kaín xín chojni kixin ó kuít̄oha jína —ichro ch'án.

<sup>15</sup> Kjánchó aṅtsí k'uíxikónohe sín nkexrí tí kjuaxroan kjuasin ch'ín Jesús, ntá nchónhya chojni k'uíxikóchjinehe sín ch'án kixin tsinhin sín nkehe tsjako ch'án, la ko tsit̄oexín sín jína tí chin chónṭa sín. <sup>16</sup> Kjánchó ch'ín Jesús la k'uaxrjenta ch'án tí kohya chojni la ntaha nixjeexín ch'án Dios.

*Ch'ín Jesús kjuínchekit̄ohe ch'án jína ijnko ch'ín tsík'en toté*

*(Mt. 9.1-8; Mr. 2.1-12)*

<sup>17</sup> A ntá ijnko yaon kjuák'ekjako ch'ín Jesús na ntá ntiha k'uéjót̄jaxin iso sín fariseo la ko iso tí sín tjako tí ley, tsík̄jixin sín kaín tí chjasin ntsí estado Galilea la ko kaín tí chjasin ntsí estado Judea la ko tí chjasin Jerusalén. Ntá tí kjuachaxin kuènte Dios kjuak̄oxin ch'án kixin sinchekit̄ohe ch'án chojni jína. <sup>18</sup> Ntá kui iso chojni tinkátsénkí sín ijnko ch'ín tsík'en toté tjenkáya ijnko kania. Ntá tjinkaon sín chrók'uixenko sín ch'án tí nchia kixin chrókjuak'e ch'án tí tjen ch'ín Jesús tjetjako ch'án. <sup>19</sup> Kjánchó xitjahya ts'ixenhen sín kixin nchónhya chojni síxenhen nchia. Ntá k'uit'ót̄jen sín tí chrítaón nchia, ntá kjuak̄jin sín iso teja la ko tí nta sít'ó ntá ntiha kjuinkajinxin sín tí ch'ín níhi tjenkáya kania ntoí tí tjen ch'ín Jesús. <sup>20</sup> Na ntá tió k'uíkon ch'ín Jesús kixin imá tinkáchónki sín ch'án ntá nixjehe ch'án tí ch'ín níhi, ntáchro ch'án kixin:

---

\* 5:14 Levítico 14.4-8

—Jaha, ó kjuixin kjuìnhan tí jië chonta —ichro ch'án.

<sup>21</sup> A ntá tí sín maestro tjako tí ley la ko tí sín fariseo kjuankíxin sín kjo sín asén sín kixin: “¿Xá nkexro tíhi ch'ia ch'án ncheyóhë ch'án asén ch'án Dios? Ninkexró xitjahya tsjakjìn ijie kixin jehó Dios mé chóna kjuachaxin tsjatsen ijie chojni”, mé xikaha kjuenkayáxin sín.

<sup>22</sup> Ntá ch'ín Jesús la ó nohe ch'án tí nkehe tjenkayáxin sín ntá ntáchro ch'án kixin:

—¿Nkekuènte kixin xikaha tjenkayáxinrá?

<sup>23</sup> ¿Nkehe antsí xrahya chróntátjan ch'án? ¿Á antsí xrahya chróntátjan ch'án kixin ó kjuixin kjuìnhan ch'án tí ijie yámá ch'án, o á antsí xrahya chróntátjan ch'án kixin chrók'uínkatjen ch'án sáchrókjui ch'án?

<sup>24</sup> Méxra ijie tsjákoxian kixin tí Xjeen Dios K'óna Chojni mé chóna kjuachaxin ntihi chjasintajni tsjakjìnhan ijie chojni —ichro ch'án.

Ntá k'uetuenhen ch'án tí ch'ín tsík'en tote ntáchro ch'án kixin:

—Jaha tétuanhan t'inkatjen tjatsíyan kaniãa la sátjia ntoã —ichro ch'án.

<sup>25</sup> Ntá tuénxín k'uínkatjen tí ch'ín tsík'en tote nkayakon kaín tí sín siín a la kuákja ch'án kanieë ch'án k'uékjak'eták'á ch'án ntá sákjuí ch'án ntoë ch'án la kjuanchehe ch'án Dios kjuasáya. <sup>26</sup> Ntá kaín sín imá chrakon sín la kjuanchehe sín Dios kjuasáya kjónté chrakon sín la ntáchro sín kixin:

—Ijie mé k'uikonni antsí má kjuaxroan jie —ichro sín.

*Ch'ín Jesús k'uíyehë ch'án tí ch'ín Levi  
(Mt. 9.9-13; Mr. 2.13-17)*

27 Ntá chr'éxín ntá ch'ín Jesús k'uaxrjexín ch'án nchia ntá k'uíkon ch'án ijnko ch'ín nchekjènkí mé it'in ch'án Leví tjetjaxín ch'án tjech'e ch'án xra nkaxenhen tí nchia ntsí tí xenkaxín chichaon a. Ntá ntáchro ch'án kixin:

—Chrèhé tí janhan —ichro ch'án.

28 Ntá ch'ín Leví mé tuénxín k'uínkatjen ch'án la ntá kuítóhe ch'án kaín xín nkehe ntá chrèhé ch'án tí ch'ín Jesús.

29 Ntá chr'éxín ch'ín Leví chóna ch'án ijnko kia jié ntoe ch'án kjuikosáyehe ch'án tí ch'ín Jesús. Kjaxín k'uéjé itsjé tí sín nchekjènkí la ko itsjé í so chojni chóna jié k'uéjótjaxínko sín tí ch'ín Jesús chjino tí mesa a. 30 A ntá tí sín fariseo la ko tí sín maestro tjako tí ley la mé kjuankíxín sín tjonta sín tí sín k'uájiko ch'ín Jesús ntáchro sín kixin:

—¿Nkekuènte ntekoará la ko t'ikoará tí sín nchekjènkí la ko tí sín chóna jié? —ichro sín.

31 A ntá kjuátèhe ch'ín Jesús ntáchro ch'án kixin:

—Tí chojni níehya t'ichjánxienhya sín nkexro sich'e xroan. Náhí. Jehó tí sín níhi mé t'ichjánxínhin sín nkexro sich'ehe sín xroan.

32 Janhan la k'uinkahya ntihi kixin chrók'uíyaha tí sín jína tjejó. Náhí. Janhan k'uinka kixin ts'iyaha tí sín chóna jié kixin chrókuítóhe sín tí ijíé sín ntá chrókjuinkí sín tí tjenkayáxín sín —ichro ch'án.

*Tjanchankíhi sín tí ch'ín Jesús kixin á chrókjónehya sín tíó tsonixjèhé sín Dios*

*(Mt. 9.14-17; Mr. 2.18-22)*

33 A ntá kjuanchankíhi sín tí ch'ín Jesús kixin:

—¿Nkekuènte kixin tí sín k'uék'ajiko ch'ín Juan jnkoyaxón nehya sín na nixjèhé sín Dios, la ko

kjāxin xīkaha ch'e tí sín xriko tí sín fariseo, a ntá tí sín xrikoa la ine sín la ko it'i sín? —ichro sín.

<sup>34</sup> Ntá kjuátēhe ch'ín Jesús kíxin:

—¿Xá chrókjuachará chrókuétuēhenrá kaín tí sín tsík'íyēhe sín tsíkóchjina tí tjejó tí sín tsíkótehe kíxin chrókjónehya sín tí naxa tjejóko sín tí ch'ín tsíkótehe? <sup>35</sup> Kjánchó tsjixraká tí yaon itsi chojni tsotsé sín tí ch'ín tsíkótehe sátsjiko sín ch'án. Ntá tí sín tsíkóchjina la ts'ává sín la í sinehya sín —ichro ch'án.

<sup>36</sup> Kjāxin kjuíncheyóēxin ch'án ntáchro ch'án kíxin:

—Ninkexró chrókuaté ijnko camisa nīxin ntá chrókjuak'eniēhe ijnko camisa ntāxin kíxin xīkaha chrókjuich'e sín ntá chrók'uitjāyan tí camisa nīxin la ko kjāxin tí t'ō ka k'uaxrjēxín tí camisa nīxin tsoyóēhya tí camisa ntāxin.

<sup>37</sup> Kjāxin chrókuikīahyará xranvino nīxin ijnko tjuaxran ntāxin kíxin tí xīkaha chrókjuich'erá la chrók'uichje tí tjuaxran ntāxin ntá chrók'uitjāyan tí xran la ko chrók'uitjāyan tí tjuaxran. <sup>38</sup> A

ntá tí xranvino nīxin chrókuikia ijnko tjuaxran nīxin kíxin yóí la chrók'uitjāyanhya. <sup>39</sup> La ko kjāxin ninkexró tió tsík'i tí xran ntāxin naxa chrókóxrjínhīn chrók'ui xran nīxin. Náhí. Tsontáchro ch'án kíxin íchá jína tí xran ntāxin, tsixro ch'án —mé xīkaha ichro ch'ín Jesús.

## 6

*Tí sín k'uájiko ch'ín Jesús mé k'uín sín iso noatrigo  
ijnko yaon t'ók'éhe tí sín israelita*

*(Mt. 12.1-8; Mr. 2.23-28)*



<sup>1</sup> Ijnko yaon t'ok'éhe sín la ch'ín Jesús k'uátsínka ch'án iso nonte t'óna noatrigo. Na ntá tí sín k'uájiko ch'án mé ik'uín sín iso noatrigo la kjuankíxin sín nkaya tja sín ó k'óntajinyá sín tí noa ntá kjóne sín.

<sup>2</sup> Ntá iso tí sín fariseo kjuanchankí sín kíxin:

—¿Nkekuènte kíxin tjejoch'erá xr̄a jie? La mé kohya kjuachaxin tsonhen xr̄a tí yaon t'ok'éheni —ichro sín.

<sup>3</sup> Ntá kjuátehe ch'ín Jesús kíxin:

—¿Jahará á kjuínchekuáxinhyará tí xroon chrónka nkehe kjuích'e ch'ín David la ko tí sín k'uájiko ch'án tió k'uén sín kjinta? <sup>4</sup> Na mé jehe ch'án mé k'uíxenhén ch'án ntóe Dios la kjóne ch'án tí niotja tsíkóyaon, la ko kjaxin chjéhe ch'án tí niotja tí sín k'uájiko ch'án kjónté jehó síin kjuachaxin sine tí sín nchat'á\* —ichro ch'ín Jesús.

<sup>5</sup> Kjaxin ntáchro ch'án kíxin:

—A ntá tí Xjeen Dios K'óna Chojni mé chóna kjuachaxin ts'etóan nkexrí tsonhen tí yaon t'ok'éheni —ichro ch'án.

*Ch'ín Jesús kjuínchekitohe jína ijnko ch'ín tsíxámá tja*

*(Mt. 12.9-14; Mr. 3.1-6)*

<sup>6</sup> A ntá íjnko yaon t'ok'éhe chojni ntá k'uíxenhén ch'ín Jesús ijnko nínko Israel la ntá kjuankíxin kjuako ch'án. A ntá ntaha kjuák'e ijnko ch'ín tsíxámá tja ch'án chjina. <sup>7</sup> Na ntá tí sín tjako tí ley la ko tí sín fariseo tjejó sín tsáyehe sín tí ch'ín Jesús chrók'uikon sín á sinchekitohe ch'án chojni jína tí yaon t'ok'éhe sín kíxin ntá chrók'ueka sín ch'án jie. <sup>8</sup> Kjánchó jehe ch'án ó nohe ch'án

\* 6:4 6.3-4 1 Samuel 21.6; Levítico 24.5-9

nkehe tjenkayáxin asén sín ntá nixjehe ch'án tí ch'ín tsíxámá tja ntáchro ch'án kixin:

—T'ínkatjen, tjak'e jnkosiné ntihi —ichro ch'án.

Ntá k'uínkatjen tí ch'ín a kjuák'exín tote ch'án.

<sup>9</sup> Ntá nixjehe ch'ín Jesús tí í so sín ntáchro ch'án kixin:

—Tsjánchánkíhára ijnko xra. Tí yaon t'ok'éheni la, ¿á jína chrókjuich'eni ijnko nkehe jína ní o á chrókjuich'eni ijnko nkehe jínahya? ¿Á chrókjuinchekitoheni chojni jína ní o á chrók'óyánni chojni? —ichro ch'án.

<sup>10</sup> Ntá ch'ín Jesús komá ch'án kaín tí chojni síin ntiha ntá nixjehe ch'án tí ch'ín níhi ntáchro ch'án kixin:

—Tjéntoá tjá —ichro ch'án.

A ntá tí ch'ín a xikaha kjuích'e ch'án ntá kuítóhe tja ch'án jína. <sup>11</sup> Kjánchó tí sín fariseo tjejó mé kónínkaon sín mé ntá kjo sín kichó sín kixin tjinkaon sín chrók'óyán sín tí ch'ín Jesús.

*Ch'ín Jesús kjueyá ch'án tí teyó sín ts'ajiko ch'án  
(Mt. 10.1-4; Mr. 3.13-19)*

<sup>12</sup> A ntá ijnko yaon ch'ín Jesús sákjui ch'án ijnko jna kixin ntaha tsonixjeexín ch'án Dios la ntá ntahó kjuák'e ch'án kuenté tie tjenixjehe ch'án Dios. <sup>13</sup> A ntá tí k'uínkaséyan a na mé k'uíyehé ch'án tí sín chréhe sín ch'án ntá kjueyá ch'án teyó sín kixin ts'óna sín apóstol ts'ajiko sín ch'án. <sup>14</sup> A ntá tí sín í mé xikihi it'in sín. Na mé ch'ín Simón la ntá ch'ín Jesús kjuínchek'in ihnié ch'án Pedro kjaxin; la ko kichó ch'án ch'ín Andrés; la ko ch'ín Jacobo la ko ch'ín Juan, la ko ch'ín Felipe, la ko ch'ín Bartolomé, <sup>15</sup> la ko ch'ín Mateo, la ko ch'ín Tomás,

la ko ch'ín Jacobo la mé it'é mé it'in Alfeo; la ko í jnko ch'ín Simón na mé tí ch'ín a mé k'uék'aji tí partido cananista; <sup>16</sup>la ko ch'ín Judas la kíchó ch'án mé it'in Jacobo; la ko ch'ín Judas Iscariote tí ch'ín kjuínchekji tí ch'ín Jesús.

*Ch'ín Jesús kjuakohe ch'an nchónhya chojni*  
(Mt. 4.23-25)

<sup>17</sup> Ntá ch'ín Jesús la ko tí jehe sín k'uínkajinxin sín tí jna ntá k'uéjó sín nonte yóxin jehe ch'án la ko tí sín kjueyá ch'án. Kjaxin k'uixikóchjina nchónhya chojni kjuixin nkuíxín estado Judea la ko chjasin Jerusalén la ko tí chrínta ntayaon tí siín tí chjasin Tiro la ko tí chjasin Sidón. Ó kjui sín kixin tsinhin sín tí nkehe tsjako ch'ín Jesús la ko tsitohe sín jína. <sup>18</sup> A ntá tí sín kjuaxróxinhya k'uéjó k'uéchónta sín nchakuen jínahya na mé kuítóhe sín jína kjaxin. <sup>19</sup> Kaín chojni tjinkaon chrókuákóxin sín tí ch'ín Jesús kixin kjuínchekitohe ch'án jína kaín xín chojni kixin jehe ch'án chónta ch'án kjuachaxin jíé.

*Tí kjuachéhe la ko tí kjuaxróxinhya*  
(Mt. 5.1-12)

<sup>20</sup> Ntá komá ch'ín Jesús tí sín k'uájiko ch'án ntá ntáchro ch'án kixin:

—Náxrjón tjejorá jahará nòará kixin chontará kjuachaxién Dios.

<sup>21</sup> 'Náxrjón tjejorá jahará t'énxinrá kjinta ijie kixin chr'éxin sinterá jína.

'Náxrjón tjejorá jahará tsjanará ijie kixin chr'éxin tsjanorá.

<sup>22</sup> 'Náxrjón tjejorá jahará nínkakonhanrá chojni la ko ts'inkítíará sín sátsjirá ókjé, la ko t'ántaxínhanrá sín la ko t'ákjénxin sín ihniará éxí ijnko nkehe

jínahya kíxin tinkachónkirá tí Xjeen Dios K'óna Chojni. <sup>23</sup> Tsocháhará má la ko imá tsochontará kjuachéhe tí yaon a kíxin ts'ayéherá nkehe kuènte nkaya nkajní. A ntá xíkaha tí t'áchrii tí sín jínahya ch'e la mé ósé kjuate sín tí sín k'uéchronka itén Dios.

<sup>24</sup> 'A ntá jahará rícorá kjuaxróxinhya ts'ejorá chr'éxin kíxin ó kjuixin k'uayéherá kaín nkehe.

<sup>25</sup> 'A ntá jahará kjónterá jína, kjuaxróxinhya ts'ejorá chr'éxin kíxin ts'énxinrá kjinta.

'A ntá jahará tjanorá jie, kjuaxróxinhya ts'ejorá chr'éxin kíxin ts'avará la ko tsotsjankará.

<sup>26</sup> 'Kjuaxróxinhya ts'ejorá tió kaín chojni tsjikosáyahará sín kíxin xíkaha tí t'áchrii sín kjuikosáyehe tí sín ntoáhya k'uéchronka itén Dios ósé.

*Tsotjuèheni tí sín nínkakhenni  
(Mt. 5.38-48; 7.12)*

<sup>27</sup> 'A ntá jahará tjejotinhínrá mé tjéxrjanka kíxin chrótjuéherá tí sín nínkakhannrá la ko jína chrókjuínkítsará tí sín tjinkakhonya tí jahará.

<sup>28</sup> Jína nixjehérá tí sín t'ántaxínhanrá la ko tjancheherá Dios kíxin tsjinkítsa ch'án tí sín chónkíhará sín. <sup>29</sup> Tí chjéhe ijnko nkexro ijnko tuaanrá chrókjóka tí í jnko nánko kíxin chróchjéhe sín tíha kjaxin. La ko tí siín ijnko nkexro tjinkaon sín tsakítsjaha sín tí chamara tjín t'ínkayate na mé títóhé kíxin kjaxin sátsjiko sín camisá kjaxin.

<sup>30</sup> Tí jnkojín nkexro tjanchaha nkehe chonta la chjehé sín. A ntá tí tsakja sín nkehe kuéntá la tjanchehya sín kíxin naxa ts'ókjanhan sín. <sup>31</sup> Méxra chrókjuíkosáyehérá kíchuará éxí yóhe

nkexrí tjinkáonrá chrókjuikosáyahará tí jehe sín kjaxin.

<sup>32</sup> Tí jehó tjuèhérá tí nkexro tjuàhará la tí xikaha la kohya ninkehó tsjachahyará. Kjónté tí sín jínahya tjasin jie la xikaha ch'e sín. <sup>33</sup> Antá tí tjikosáyehérá jehó tí sín tjikosáyahará la kohya ninkehó tsjachahyará xikaha. Kjónté tí sín jínahya tjasin jie mé kjaxin xikaha ch'e sín. <sup>34</sup> La ko tí nchekjenrá chichaon jehó tí sín tjenkayáxinrá kixin ts'ókjanhanrá sín tí chichaon, la tí xikaha kohya ninkehó tsjachahyará. Kjónté tí sín jínahya tjasin jie xikaha ch'e sín nchekjen kichó sín chichaon la ko chónhen sín kixin tsokjan tí chichakoén sín inaá. <sup>35</sup> Kjánchó jahará chrótjuèhérá tí sín nínkakonhanrá la ko jína chrókjuich'eherá sín xra la ko chrókjuincheckjenrá sín chichaon la chróchoénhyará kixin chrókjan tí chichakoanrá inaá. Mé xikaha chrókjuich'erá la imá tsjachará la ko ts'ónará xjeen Dios nkaya nkajní kixin jehe ch'án ch'ehe ch'án jína tí sín chóntehya ch'án kjuasáya la ko tí sín jínahya. <sup>36</sup> Chrókjuikonóehérá kichuárá éxi yóhe It'ará nkaya nkajní tikonóehé ch'án chojni.

*Chrók'uántaxíenhyani kichó ni  
(Mt. 7.1-5)*

<sup>37</sup> 'Chrókuékahyará jie ókjé chojni kixin ntá Dios chrókjuanchahya ch'án jie tí jahará. Chrókuétuanhyará kixin chrókjuasóte í jnko chojni kixin Dios kjaxin chrókjuincheckjasótiahyará ch'án tí jahará. Chrók'uitjáyanhanrá ichrén jie kjuasinhanrá í jnko chojni kixin ntá Dios chrókjuincheck'itjáyanhanrá ch'án tí jie kjuásinrá.

<sup>38</sup> Chjehérá í so sín tí nkehe ts'áyéhe sín kixin ntá Dios tsotjáhará ch'án nkehe jína kjaxin, tjetóxin ijnko medida jína chrókjuanjon ch'án, icha tsík'enka ch'án kixin tsík'ótsjéyehe ch'án tí nkehe tsíkjachroayá ch'án tjetóxin tsjanjon ch'án. Dios tsotjáhará xikaha yóhe éxí tsíchjehérá í so chojni.

<sup>39</sup> Ntá kjuíncheyóexin ch'ín Jesús ntáchro ch'án kixin:

—¿Xá á chrókójína ijnko chojni t'ikonhya chrókjuiko í jnko chojni t'ikonhya? Tí xikaha la yóí sín chrók'uanótjenyá sín ichrén tòye. <sup>40</sup> Ijnko nkexro xrakohe la noehya éxí tí nkexro tjako. Kjánchó tió tsjixin tsoxrakohe ch'án ntá tsonohe ch'án éxí nohe tí nkexro kjuakohe ch'án.

<sup>41</sup> '¿A ntá nkekuèté tsjehé tí chjinínó ntsí tjenkánkí ikon tí kichuá, tí naxa ántosán tí nta jié tjenkánkí ikuan? <sup>42</sup> ¿Mé xikaha nkexrí kixin chróntáche kichuá kixin chrókuítóhe ch'án kixin chrókuakitsjenkíhí ch'án tí chjinínó ntsí tjenkánkí ikon ch'án tí naxa ántosán tí nta jié tjenkánkí ikuan? Jaha la ntoáhya tjenkayáxian ch'ia jaha. Senó chrókuakitsjenkiá tí nta jié tjenkánkí ikuan kixin ntá chrók'uikuan chrókuakitsjenkiá chjinínó ntsí tjenkánkí ikon tí kichuá.

*Tí nta mé tjatsoanxínni tí to tsík'óna  
(Mt. 7.17-20; 12.34-35)*

<sup>43</sup> 'Kohya nta jína chrók'óna to jínahya, la ko kjaxin kohya nta jínahya chrók'óna to jína. <sup>44</sup> Jnkojnko tí nta mé tjatsoanxínni tí to t'óna. Tí ntach'í xitjahya tsjakjinjinni to higo la ko xitjahya ts'inni to uva. <sup>45</sup> Ijnko chojni jína la jína nixja ch'án kixin jína asén ch'án. A ntá ijnko chojni jínahya la

mé nixja tí nkehe jínahya kixin jínahya asén ch'án. Kixin éxí tjenkayáxin asén mé xikaha nixja ir'va.

*Ch'ín Jesús kjuíncheyóxin éxí yaá nkexro kjuích'éna nchia*  
(Mt. 7.24-27)

<sup>46</sup> '¿Nkekuènte ntáchrórá kixin janhan Ìnchárá, la ntá tahyará kuenté tí nkehe tétuanhanrá? <sup>47</sup> Méxra kaín tí nkexro tóchjina tinhin tí nkehe ntáxrjan la ko titekaon sín la mé tson táxrjan nkexro tí tóyóhē sín. <sup>48</sup> Na mé jehe sín tóyóhē ijnko nkexro kjuích'éna nchia la senó k'óxraya ch'án tòyē ninka kixin ntá sich'éna ch'án nchia chrítaón tí tjo a. A ntá tió k'uánkí tí ntarío la ikui tí ntá k'uúntate tí nchia, kjónté xikaha la k'uátjoákohya la ní kuínkíhya tí nchia a kixin jína tsík'óna chrítaón tjo tjekjen. <sup>49</sup> A ntá tí nkexro tinhin tí nkehe ntáxrjan la ntá tahya sín kuenté la mé tóyóhē ijnko nkexro kjuích'éna nchia chrítaón nche la kohya tjo chrínkí. A ntá tió k'uánkí tí ntarío la ikui tí ntá k'uúntate tí nchia la ntá k'uátjoáko ntá tí nchia la ntá kuenté tí nchia la k'uítjayan —mé ichro ch'ín Jesús.

## 7

*Ch'ín Jesús kjuínchekitohe jína ijnko ch'ín ch'ehe ijnko soldado romano xra*  
(Mt. 8.5-13)

<sup>1</sup> Ntá ch'ín Jesús kjuixin nixjehe ch'án tí chojni a ntá sákjuí ch'án chjasin Capernaum. <sup>2</sup> Ntaha kjuák'e ijnko capitán romano la mé chóna ch'án ijnko nkexro ch'ehe ch'án xra imá tjuèhe ch'án la ntá jie níhi tí ch'ín a tjet'en ch'án. <sup>3</sup> A ntá tió kuínhin tí ch'ín capitán itjo sín nkexrí tjen ch'ín Jesús ntá

ichr'án ch'án iso sín táda judío tsjijitsjehe sín tí ch'ín Jesús tsochronóehe sín ch'án kixin chrókjuiji ch'án chrókjuinchekitohe ch'án jína tí ch'ín ch'ehe ch'án xra. <sup>4</sup> Ntá kjuíji sín kóchjinehe sín tí ch'ín Jesús kjuankixin chrónóehe sín ch'án ntáchro sín kixin:

—Imá jína tí ch'ín capitán la mé tjinkaon ch'án chrókjuinkitsa ch'án <sup>5</sup> kixin tjuèhe ch'án tí nación kuènteni la ko jehe ch'án kjuínkitsa ch'án la ko k'uetōan kixin ts'óna ijnko n̄jnko kuènteni —ichro sín.

<sup>6</sup> Ntá ch'ín Jesús sákjuiko sín ch'án. Ntá ó kjuíichjina sín chjino tí nchia la mé tí ch'ín capitán k'uetuēnhen ch'án iso chojni chóxin ch'án tsontáche sín tí ch'ín Jesús kixin:

—Tadá. Tjinkakonhya ch'án chrótjáha ch'án xra kixin jehe ch'án la jehya chojni jína la ko chrókósuèhe kixin chrók'uixēhén ntōe ch'án. <sup>7</sup> Mé x̄ikaha chrókósuèhe ch'án chrókjuiji ch'án chrókjueyá ch'án tí jaha. Méxra tí kjuachaxin chrónixja ó chrókuitoēxín jína tí ch'ín ch'ehe ch'án xra. <sup>8</sup> Kixin jehe ch'án kjaxin t'ítuēnhen ch'án la ko kjaxin chóna ch'án soldado t'etūēnhen ch'án inaá. Tió t'etūēnhen ch'án ijnko sín kixin sátsji la mé sátsji la ko tió t'etūēnhen ch'án í jnko sín kixin xrákoa la mé xrákoa la ko tió t'etūēnhen ch'án í jnko sín kixin sich'e ijnko xra la mé nchexiteyá ch'án —mé x̄ikaha ichro tí sín kui.

<sup>9</sup> Ntá ó kuínhin ch'ín Jesús x̄ikaha ntá chrakon ch'án kixin x̄ikaha tjenkayáxin tí ch'ín a, a ntá nkátjá ch'án komá ch'án tí chojni chréhe ntáchro ch'án kixin:

—Ntáxrjan kixin naxa k'úitjahya nijnko nkexro israelita x̄ikaha tinkáchónki éxí tí ch'ín i —ichro



ch'án.

<sup>10</sup> A ntá ó kjan nchia tí sín tsík'ítuenhen la ó k'uíkon sín kixin ó tsíkitohe jína tí ch'ín níhi.

*Ch'ín Jesús kjuínchexechón tí xjeen ijnko tjan k'án chjasin Naín*

<sup>11</sup> Ntá chr'éxin ntá sákjui ch'ín Jesús ijnko chjasin it'in Naín la ko sákjuíko ch'án tí sín k'uájiko ch'án la ko nchónhya í so chojni. <sup>12</sup> Tió kjuíjichjina sín tí chjasin a la k'uíkon sín nchónhya chojni sákjuíkjava sín ijnko chojni tsík'en na mé tí jnkokoá xjeen ijnko tjan k'án. Itsjé chojni chjasin ntiha sákjuíkotoxin sín tjan. <sup>13</sup> Ntá tió k'uíkon Ìnchéni tí tjan a ntá kuíkonóhe ch'án tjan ntáchro ch'án kixin:

—Tsjankahya —ichro ch'án.

<sup>14</sup> Ntá ch'ín Jesús kóchjinehe ch'án tí sín tinkátsénkí tí nkexro tsík'en la kjuak'etja tja ch'án tí nkehe tinkátsénkía sín tí ch'ín tsík'en. A ntá tí sín kuámá nta k'uéjóchónhen sín. Ntá ch'ín Jesús nixjehe ch'án tí ch'ín tsík'en ntáchro ch'án kixin:

—Ntásoá. Tétuanhan t'àya —ichro ch'án.

<sup>15</sup> Ntá tí ch'ín tsík'en tuénxín kjuak'etjaxin ch'án la ko kjuankíxin nixja ch'án. Ntá ch'ín Jesús kjuínchek'áyéhe ch'án ìné tí ch'ín ntasoá la sákjuíko. <sup>16</sup> A ntá tió k'uíkon sín xikaha kónhen la kaín sín imá chrakon sín la ko kjuankíxin kjuanchehe sín Dios kjuasáya ntáchro sín kixin:

—Dios mé ichr'án ijnko chojni imá t'etōan chrónka itén Dios ts'ejókoni —ichro sín.

Kjaxin ntáchro sín kixin:

—Ó kui Dios tsjinkítsa ch'án chjasén ch'án —ichro sín.

17 A ntá nkuíxín estado Judea la ko kaín tí chjasin chjinaxón mé kuínhin sín kíxin nkehe tí kjuaxroan kjuích'e ch'ín Jesús.

*Tí sín ichr'án ch'ín Juan Bautista  
(Mt. 11.2-19)*

18 A ntá tí sín k'uájiko ch'ín Juan mé chénka sín ch'án kaín tí nkehe tsíkónhen. Ntá k'uíyehē ch'án iyó tí sín k'uájiko ch'án 19 k'ueṭuēnhen ch'án sín sátsjitsjehe sín tí ch'ín Jesús tsjikjanchankíhi sín ch'án kíxin á jehe ch'án tí nkexro tsi o á tsochónhen sín í jnko nkexro, tsixro sín. 20 A ntá tí sín ichr'án ch'ín Juan mé kóchjina sín tí tjen ch'ín Jesús ntáchro sín kíxin:

—Ch'ín Juan Bautista k'ueṭoan ch'án kuini tsik-janchankíhani kíxin á jaha tí nkexro tsi ní o á tsochónhenni í jnko nkexro —ichro sín.

21 A ntá tí yaon kjuíji sín na mé ch'ín Jesús kjuínchekitohe ch'án itsjé chojni jína la mé kjuatsen ch'án kaín tí chin chóna sín la ko kuakitsje ch'án tí nchakuen jínahya chóna sín la ko kjuínchek'ikon ch'án itsjé chojni t'ikonhya. 22 A ntá kjuátehe ch'ín Jesús ntáchro ch'án kíxin:

—Sátjirá tjíchenkará tí ch'ín Juan kaín nkehe k'uíkonrá la ko kaín nkehe kuínhínrá kíxin tí sín k'uíkonhya la ó t'ikon sín jie, la ko tí sín k'uékjihya la ó tji sín jie, la ko tí sín k'uéchóna chinlepra la ó kuítohe sín jína, la ko tí sín kíenhya la ntá jie la ó tinhín sín, la ko tí chojni tsík'en la ó síxechón sín jie, la ko tí sín nòa síxraḱohe sín tí tan jína tsaáxin sín. 23 Ntá náxrjón tjen tí nkexro kohya nkehe t'inkákonhen tí tinkáchónki sín tí janhan —mé ichro ch'án.

24 Tió sátsíkji tí sín ichr'án ch'ín Juan ntá kjuankíxin nixjehe ch'ín Jesús tí sín k'uéjó ntiha kíxin nkexrí tjen ch'ín Juan ntáchro ch'án kíxin:

—Tió sákjuítsjehérá ch'ín Juan nteje, ¿nkexrí k'uíkonrá tí jehe ch'án? ¿Á k'uíkonrá ch'án éxí ijnko tji nchexrayehe xrinto? 25 Tí náhí, ¿la ntá nkehe k'uíkonrá? ¿Á k'uíkonrá ch'án éxí ijnko nkexro tsík'itsa jína? Jahará ó nohará kíxin chojni tsík'itsa jína la ko chóna kaín nkehe náxrjón la mé ntøe rey tjejó sín. 26 ¿A ntá nkexrí k'uíkonrá ch'án? ¿Á k'uíkonrá ch'án éxí ijnko nkexro chrónka itén Dios? Na mé xrjanka kíxin chaxín xíkaha jehe ch'án na mé antsí t'etøan ch'án la ntá tí sín k'uéchrónka itén Dios ósé la kánhyó. 27 Ch'ín Juan mé tí nkexro kui éxí chrónka tí xroon itén Dios ósé ntáchro kíxin: Janhan mé tsochr'an ijnko nkexro tsochrónka itan kuèntana tsitónxin ntja,

kíxin tsjasiyóxin ch'án ntja kuénta.\*

Mé xíkaha chrónka tí xroon itén Dios. 28 Ntá ijnko nkehe chaxín tsotjonkará kíxin kaín tí nkexro k'uéjó senó k'uéchrónka itén Dios la kánhyó tjetøan sín la antsí tjetøan tí ch'ín Juan Bautista. Kjánchó ijnko nkexro kjónté tjetuanhya la tí ts'áyéhe sín tí kjuachaxién Dios nkaya nkajní la antsí tjetøan sín a ntá jehe ch'ín Juan la kánhyó —ichro ch'ín Jesús.

29 A ntá tió kuínhin sín tíhi la ntá kaín tí chojni la ko tí sín nchekjènkí tsíkikite ch'ín Juan la ó kjuátsøan sín kíxin Dios la jína ch'án. 30 Kjánchó tí sín fariseo la ko tí maestro tjako tí ley tsíkikitehya ch'ín Juan la mé tjinkakonhya sín tí nkehe tjinkaon

---

\* 7:27 Malaquías 3.1

Dios chrókjuinkĩtsa tí jehe sín. <sup>31</sup> Ntá ntáchro Ìnchéni kíxin:

—¿Nkexrí chrókjuıntayóaxian tí chojni tjejó jie? ¿Nkehe chrókóyóhē sín? <sup>32</sup> Tóyóhē sín tí chánjan tjejóťjaxin sín tí ntsin tsítán sín la t'íyehē kichó sín ntáchro sín kíxin: “Kjuínchentáchroni flauta la tehyará la ko tsjeni isón kuènte chojni tsík'en la tsjankahyará.” <sup>33</sup> Kíxin ó kui ch'ín Juan Bautista la kjónehya ch'án niotjã la ko k'uĩhya ch'án vino la ntá jahará ntáchrórã kíxin ijnko nchakuen tí jínahya chónťa ch'án. <sup>34</sup> A ntá kjaxin ikui tí Xjeen Dios K'óna Chojni la kjóne ch'án la ko ik'ui ch'án la ntáchrórã kíxin imá kjóne ch'án la ko imá ik'ui ch'án vino la ko t'ito ch'án tí sín tjasin jie la ko tí sín nchekjènkĩ. <sup>35</sup> A ntá tí xjeen Dios mé tjakoxin sín kaín tí nkehe tjinkaon Dios.

*Ch'ín Jesús mé kjuák'e ch'án ntøe ijnko ch'ín fariseo it'in Simón*

<sup>36</sup> Ijnko ch'ín fariseo mé chronóehē ch'án tí ch'ín Jesús kíxin tsjiji ch'án ntøe ch'án sineko sín ch'án. Ntá sákjui ch'án ntøe tí ch'ín a, a ntá ntiha kjuák'etjaxin ch'án tí tjen mesa. <sup>37</sup> A ntá itjen ijnko tjan nchónhya jie chónťa tjan. Itjen tjan tí chjasin ntiha la ntá kónohe tjan kíxin tsíkjiji ch'ín Jesús ntøe tí ch'ín fariseo la ko ntaha sineko sín ch'án. Ntá kui tjan ntiha kuikao tjan ijnko xro tjete tsíkaón aceite xraxé náxrjón. <sup>38</sup> Ntá tsjanka tjan kóchjina tjan toté ch'ín Jesús ntá ntakon tjan kjuátanxín toté ch'án la ko kaxĩhi tjan kjuínchexámáxin tjan toté ch'án la ko kjóneko kochító toté ch'án la ko kjuíncheka tjan toté ch'án tí aceite xraxé náxrjón. <sup>39</sup> A ntá tió k'uĩkon tí ch'ín fariseo tsík'íyehē tí ch'ín Jesús ntá kjo ch'án

asén ch'án kixin: “Tí chrókóchaxín tí nkexro i ijnko ch'ín chrónka itén Dios ntá chrókónohe ch'án kixin nkexrí xéhe tí tjan tjetákóxin ch'án kixin ijnko tjan jínahya tíha”, ichro ch'án. <sup>40</sup> Ntá ch'ín Jesús ntáche ch'án tí ch'ín fariseo kixin:

—Simón, janhan chonta ijnko nkehe tsonixjaha —ichro ch'án.

Ntá kjuátēhe tí ch'ín fariseo ntáchro ch'án kixin:

—Chronka, Maestro —ichro ch'án.

<sup>41</sup> Ntá ntáchro ch'ín Jesús kixin:

—K'uéjó yaá chojni ntoa síkéhe sín chichaon ijnko ch'ín nchekjen chojni chichaon. Ijnko la síká ch'án quinientos denario. A ntá tí í jnko a la síká ch'án cincuenta denario. <sup>42</sup> A ntá kjuachahya sín k'ókjenhen sín tí chichaon tí ch'ín síkéhe sín ntá kuikonóēhe ch'án sín ntá k'óxíka ch'án tí cuenta síká yóí sín. A ntá jie chronka jaha kixin nkexro tí yóí sín antsí chrótjuèhe tí nkexro kuikonóēhe ch'án —ichro ch'ín Jesús.

<sup>43</sup> Ntá kjuátēhe tí ch'ín Simón ntáchro ch'án kixin:

—Janhan ntáxrjan tí nkexro kuikonóēhe má —ichro ch'án.

Ntá ntáchro ch'ín Jesús kixin:

—Ntoá tjenkayáxian —ichro ch'án.

<sup>44</sup> Ntá ch'ín Jesús komá ch'án tí tjan a ntá ntáche ch'án tí ch'ín Simón kixin:

—¿Á t'ikuan tí tjan a ní? Janhan na mé k'uíxanhan ntoa la ntá jaha la kjuánjonhya ntá chrók'ontia totená. Kjánchó jehe tjan ti ntákon tjan kjuínchek'óntixín tjan totená la ko kaxíhi tjan kjuínchexámáxin tjan. <sup>45</sup> A ntá jaha la kjóntekoahyana kochíto. Kjánchó jehe tjan naxa kuítóehya tjan neko kochíto totená. <sup>46</sup> Jaha

la kuíkítexinhya aceite kja. A ntá jehe tjan kuíkíte tjan aceite xraxé náxrjón totená. <sup>47</sup> Mé xíkaha ntáxrjan kixin imá tjuana tjan kixin kaín tí nchónhya jie kjuasin tjan la mé kjuìnhin tjan. A ntá ijnko nkexro kjuìnhin ìntsíkoá jie la mé xíkaha ìntsíkoá tjakoxin kixin tjuana sín —ichro ch'án.

<sup>48</sup> Ntá nixjehe ch'án tí tjan a ntáchro ch'án kixin:

—Ó kjuìnhan tí jie chonta —ichro ch'án.

<sup>49</sup> A ntá kaín tí sín tsíkóchjina sín k'uéjótjaxin sín tí tjan ch'án mé kjuankixin kjo sín kichó sín ntáchro sín kixin:

—¿Xá nkexro tíhi kixin tjakjìnhin ch'án ijie chojni?

<sup>50</sup> A ntá ch'ín Jesús ntáche ch'án tí tjan a kixin:

—Ó kuaá jaha kixin kuítekávan tí janhan. A ntá jie kjuaxróxin sátsjia ntoa —ichro ch'án.

## 8

### *Iso chojni chjin kjuínkítsa tí xra kjuích'e ch'ín Jesús*

<sup>1</sup> A ntá chr'éxin ntá ch'ín Jesús k'uáji ch'án itsjé chjasin hyé la ko chjasin ntsíntsí kjuako ch'án la ko chrónka ch'án tí tan jina kixin nkexrí tí kjuachaxin t'etoan Dios. A ntá tí teyó sín mé k'uájiko ch'án. <sup>2</sup> Kjaxin chréhe iso chojni chjin tsíkjinchekitohe ch'án jina tsíkakítsje ch'án tí nchakuen tí jínahya k'uéchónta sín la ko tsíkjatsen ch'án tí chin k'uéchónta sín. Ijnko tjan mé it'in María la ko kjaxin tikitexín tjan Magdalena na mé tsík'axrje yato nchakuen tí jínahya k'uéchónta tjan, <sup>3</sup> la ko í jnko tjan it'in tjan Juana ne mé xìi mé it'in ch'án Chuza. Jehe ch'án mé ch'ehe ch'án xra

tí ch'ín Herodes t'etoan ch'án, la ko í jnko tjan mé it'in tjan Susana, la ko itsjé í so sín k'uéjó sín. A ntá kaín sín kjuanjon sín tí nkehe k'uéchónta sín kjuínkítsa sín tí ch'ín Jesús la ko tí sín k'uájiko ch'án.

*Ch'ín Jesús kjuíncheyóexin ch'án éxí ijnko ch'ín k'uénka nonte*

*(Mt. 13.1-9; Mr. 4.1-9)*

<sup>4</sup> Ntá nchónhya chojni kójnkotsé sín kjuítsjehe sín tí ch'ín Jesús, k'uaxrjexín sín kaín tí chjasin ntiha. A ntá ch'ín Jesús kjuíncheyóexin ch'án ntáchro ch'án kixin:

<sup>5</sup> —Éxí ijnko ch'ín sákjuík'énka noatrigo nontee ch'án. Mé xikaha sákjuí ch'án ik'ue ch'án tí noatriga a. Ntá iso noa la k'uanótjen chrínta ntia ntá nkaxénjin chojni tí noa a la ko kjaxin tí koxroxé k'uínka va. <sup>6</sup> A ntá í so la k'uitji chrík'á xro ntá k'uayan la xamá kixin kánhyó siín tjo. <sup>7</sup> A ntá í so la kjuítsínkák'á kach'i ntá k'uánkí kach'i la ntá í xitjahya k'uánkí tí no a kixin tsíkjate tí kach'i. <sup>8</sup> A ntá í so la mé tsík'itjí nche jína. A ntá tió k'uánkí la k'óna jína la mé jnkojnko noatje k'óna ciento neno noa —mé xikaha ichro ch'án.

Na ntá kjuixin kjuako ch'ín Jesús kaín tíha ntá itsen ntáchro ch'án kixin:

—Tí tjinkáonrá chrókuinhínrá la tinhínrá —ichro ch'án.

*Ch'ín Jesús chronkaxín nkekuènte kjuíncheyóexin ch'án*

*(Mt. 13.10-17; Mr. 4.10-12)*

<sup>9</sup> Ntá tí sín k'uájiko ch'án kjuanchankíhi sín ch'án kixin nkexrí t'axrjexín tí nkehe kjuíncheyóexin ch'án. <sup>10</sup> Ntá ntáchro ch'án kixin:

—Dios mé tsjinkitsa kixin tsonohará tí nkehe noehya í so chojni nkexrí t'etōan Dios. Kjánchó tí í so sín tjákoḥa sín kjuıntayóaxoán kixin ntá k'uikon sín la kjónté tsjátsoanhya sín la ko kuínhin sín na kjónté naxa tienxínhya sín.

*Ch'ín Jesús chronkaxín nkexrí t'axrjexín tí ch'ín k'uenka nonte*

*(Mt. 13.18-23; Mr. 4.13-20)*

<sup>11</sup> 'Ntá tsoxrjanka nkexrí t'axrjexín tí nkehe kjuıntayóaxoán. Tí noatje mé tí itén Dios. <sup>12</sup> A ntá tí noa k'uanótjen chrínta ntia la mé tóyóḥe tí sín kuínhin tí tan a. A ntá ó kui ch'ín Tsochren ntá kjuínchek'itjáyan ch'án kaín tí itén Dios kuínhin sín chrókuaáxin sín kixin ntá chrókuitekakonhya sín tí nkehe chrókuaáxin sín. <sup>13</sup> A ntá tí noa kjuítsínkak'á xro la éxí yóḥe tí chojni kuínhin itén Dios la tjoka kóxrjínhin sín kuínkáchónki sín. Na ntá itsi tí kjuaxróxinhya, a ntá tsítóhe sín tí itén Dios kuínhin sín kixin naxa nínkahya chóna nuèe. <sup>14</sup> A ntá tí noa kjuítsínkak'á kach'i na mé éxí yóḥe ijnko chojni kuínhin tí tan jína kjánchó tjitoxienhya ntie sín kixin tóxakonhen sín tí xra chóna sín la ko tjinkaon sín tsochóna sín itsjé nkehe la ko kaín tí nkehe tóxrjínhin sín mé t'inkákonhen kixin xikaha la xitjahya sich'ehe sín xra Dios. <sup>15</sup> A ntá tí noa k'uínka nonte jína na mé éxí yóḥe tí chojni kuínhin tí itén Dios a ntá kaín asén sín kuítekaon sín la ntá kuítóehya sín tí tan, a ntá xikaha la jína ch'ehe sín Dios xra.

*Ch'ín Jesús mé kjuíncheyóexin éxí ijnko xrohi tjeche*

*(Mr. 4.21-25)*



16 'Nijnko nkexro chrókjuinçek'ákjen xrohi chrókjuak'ema nkaxenhen chí o chrókjuak'ema chrínkí cama. Náhí. Noi chrókjuak'e xrohi kixin ntá tí sín ts'ixenhen nchia ts'ikonxín sín tí t'inkaséyan. 17 Kohya nkehe chrók'uejómá a ntá chr'éxin chrókónoxínhya; la ko kohya nkehe mó chrókónoehyani chr'éxin kixin kaín nkehe la tsonoxín ti xrohi a. 18 A ntá chrókuinhínrá jína kixin tí tjen ijnko nkexro chóna nkehe la mé ts'áyéhe ch'án má. A ntá tí nkexro chónahya nkehe la mé ts'axrjehe ch'án kjónté tí nkehe ntsí tónhen ch'án kixin chóna ch'án.

*Tí ìné la ko tí kichó ch'ín Jesús  
(Mt. 12.46-50; Mr. 3.31-35)*

19 A ntá kjuíji ìné la ko kichó ch'ín Jesús tí tjen ch'án. Ntá xitjahya tsochjinehe sín ch'án kixin nchónhya chojni síin. 20 A ntá ijnko sín ntiha tsíkjichenka ch'ín Jesús kixin:

— Ìná la ko kichuá tjejó sín ntója la tjinkaon sín chrók'uikon sín tí jaha —ichro sín.

21 Kjánchó kjuátehe ch'án ntáchro ch'án kixin:

— Tí sín tinhin itén Dios la ko titekaon sín na mé t'íkuan tí jehe sín éxí naná la ko kichiná —ichro ch'án.

*Ch'ín Jesús k'uetuēnen tí xrinto la ko tí ntá kixin  
ts'ixita*

*(Mt. 8.23-27; Mr. 4.35-41)*

22 Ntá ijnko yaon k'uixenhen ch'ín Jesús ijnko ntabáro la koí tí sín k'uájiko ch'án. Ntá ntáchro ch'án kixin:

— Sátsjini tóhe ntayaon —ichro ch'án.

Ntá sákjuí sín. 23 Ntá nachrohe tjejót'atòye sín a ntá ch'ín Jesús mé kjuák'ejua ch'án. A ntá xrínahya

tj̄ian ch̄j̄ehe x̄rinto chr̄ítaón nt̄a nt̄a x̄rankíxin sítikia nt̄a tí ntabárc̄o nt̄a chrakon sín k̄íxin ts'aniankí nt̄a tí ntabárc̄o. <sup>24</sup> Nt̄a kjuínchekjayehe sín tí ch'ín Jesús, nt̄achro sín k̄íxin:

—Maestro, Maestro. Tjejót'aniankíni nt̄a —ichro sín.

Nt̄a ch'ín Jesús k'uàya ch'án nt̄a k'uetuēhen ch'án tí x̄rinto la ko tí nt̄a k̄íxin ts'ixita, a nt̄a náxrjón k'uíxita tí nt̄a la ko tí x̄rinto. <sup>25</sup> Nt̄a nt̄ache ch'án tí sín k'uájiko ch'án k̄íxin:

—¿Á nax̄a tinkachónkihyará Dios? —ichro ch'án.

Kjánchó jehe sín mé chrakon sín itjo sín k̄íchó sín k̄íxin:

—¿Xá nkexro tíhi k̄íxin t'etuenhen ch'án x̄rinto la ko tí nt̄a la titekakonhen ch'án?

*Ijnko ch'ín nonte Gadara chón̄ta nch̄akuen tí jínahya*

*(Mt. 8.28-34; Mr. 5.1-20)*

<sup>26</sup> Nt̄a kjuíji sín tí nonte Gadara, na mé tóhe nt̄ayaon ntoí chók'èxin estado Galilea. <sup>27</sup> Nt̄a k'uínkajinx̄in ch'ín Jesús tí ntabárc̄o nt̄a kóchjina ijnko ch'ín chjasin ntiha. Nt̄a ó má sé chón̄ta ch'án nch̄akuen tí jínahya. Na nt̄a ni ké ch'án t'inkáyahya ch'án, la ko jehya nt̄o ch'án k'uéjak'e ch'án na mé tjen ch'án tí panteón. <sup>28</sup> Tió k'uíkon ch'án tí ch'ín Jesús nt̄a kjuák'exín toch'in ch'án nkayakon tí ch'ín Jesús, nt̄a k'óyako ch'án nt̄achro ch'án k̄íxin:

—¿Nkekuènte tjiat̄é tí jeheni, jaha Jesús Xjeen Dios itjen nkaya nkajní? Chronóahani nchek-jasótehyani —ichro ch'án.

<sup>29</sup> Xíkaha nt̄achro ch'án k̄íxin ch'ín Jesús tsík'etuenhen tí nch̄akuen tí jínahya k̄íxin ts'axrjexín tí jehe ch'án. Nchónhya veces tí

nchakuen tí jínahya k'uék'etuenhen tí jehe ch'án; a ntá tí chojni k'uétsé sín ch'án k'uékjinchenteto sín tja ch'án la ko toté ch'án la mé cadena tsíkóntetoxín ch'án kixin tjinkaon sín chrókjuak'e ch'án. Kjánchó k'uékóchrínjin ch'án tí nkehe tsíkóntetoxín ch'án kixin nchakuen tí jínahya tjinkaon sáchrókjuiko ch'án nteje. <sup>30</sup> Ntá ch'ín Jesús kjuanchankíhi ch'án tí ch'ín a kixin:

—¿Nkexrí it'ian? —ichro ch'án.

Ntá kjuátehe ch'án ntáchro ch'án kixin:

—Legión mé it'inni —ichro ch'án.

Ntáchro ch'án xikaha kixin nchónhya nchakuen tí jínahya chóna ch'án. <sup>31</sup> A ntá kaín tí nchakuen tí jínahya chronóehé tí ch'ín Jesús kixin chrók'uetóanhya ch'án kixin chrókjuitsínkayá tí tóye ninka. <sup>32</sup> A ntá ntiha tí jna síin nchónhya cochíno xrine va. A ntá tí nchakuen tí jínahya chronóehé tí ch'ín Jesús kixin chrókjuanjon ch'án kjuachaxin chrók'uixenhen tí cochíno a. A ntá kjuanjon ch'án kjuachaxin. <sup>33</sup> A ntá tí nchakuen tí jínahya k'uaxrjexín tí ch'ín a, a ntá k'uixenhen tí cochíno a. A ntá kaín tí cochíno kuinká va sákjuí va nó nkaya tsaka k'uánótjenkí va ntá kjuínhin va ntá.

<sup>34</sup> A ntá tí sín sít'ayakonhen tí cochíno k'uíkon sín kixin xikaha kónhen ntá chrakon sín kuinká sín sákjuíchronka sín tí chjasén sín la ko tí rancho. <sup>35</sup> A ntá tí chojni k'uaxrjexín sín chjasin sákjuitsjehe sín nkehe tí tsíkónhen. A ntá kjuíji sín ntiha tí tjen ch'ín Jesús ntá k'uíkon sín kixin ntaha tjen tí ch'ín tsík'axrjexín tí nchakuen tí jínahya. Ntaha tjetjaxin ch'án chrínkí toté tí ch'ín Jesús, ó tsík'inkáya ch'án iké ch'án kixin ó jína tjen ch'án, a ntá chrakon sín tí k'uíkon sín xikaha. <sup>36</sup> A ntá tí

jehé sín tsík'ikon sín kixin xikaha kónhen la chrónka sín kixin nkexrí kuítóhe jína tí ch'ín k'uéchóna tí nchakuen tí jínahya. <sup>37</sup> A ntá kaín tí chojni chjasin Gadara kjuankíxin chronóehé sín tí ch'ín Jesús kixin sáchrókjuixin ch'án ntiha kixin imá chrakon sín. A ntá tí ch'ín Jesús k'uit'ótjen ch'án tí ntabarco sákjuíxin ch'án ntiha. <sup>38</sup> A ntá tí ch'ín tsík'axrjexín tí nchakuen tí jínahya chronóehé ch'án tí ch'ín Jesús kixin á chrókjuanjonhya ch'án kjuachaxin sáchrókjui ch'án koí ch'án. Kjánchó ch'ín Jesús k'uetuēnhen ch'án kixin tsítóhe ch'án ntáchro ch'án kixin:

<sup>39</sup> —Títóha satjia ntōa la ko chronka nkexrí ti kjuachaxin jié kuēnte Dios kuítóaxián jína jaha —ichro ch'án.

A ntá sákjuí tí ch'ín a chrónka ch'án nkuíxín tí chjasén ch'án kixin ijnko kjuaxroan jié kjuích'e ch'ín Jesús kjuínchekítóhe ch'án jína.

*Tí xjeen ch'ín Jairo la ko tí tjan kuákóxin iké ch'ín Jesús*

*(Mt. 9.18-26; Mr. 5.21-43)*

<sup>40</sup> Tió ch'ín Jesús kjan ch'án tí í jnko chrínta ntā ntá nchónhya chojni siín ntiha la chéhe sín kjuíji ch'án ntiha, kixin kaín sín tjejóchónhen sín ch'án. <sup>41</sup> Ntá kui ijnko ch'ín it'in Jairo na mé ijnko ch'ín t'etōan kuēnte nīnko. A ntá kjuák'exín toch'in ch'án tōte tí ch'ín Jesús chronóehé ch'án kixin sáchrókjui ch'ín Jesús ntōe ch'án <sup>42</sup> kixin chóna ch'án jnkokoáxón xjeen ch'án chjin chóna teyó nánó la ó mero tjet'en tjan. A ntá sákjuí ch'ín Jesús la ntá nchónhya chojni chréhe k'uíxitja kichó sín.

<sup>43</sup> Ntá siín sín ntiha. Na mé ntiha tjenkákjan ijnko chojni chjin níhi tjan sítji tjan jnī na mé chóna

tjan teyó nánó titoehya tjan jína. A ntá kaín nkehe k'uéchónta tjan kjuenkehe tjan tí sín ch'e xroan la ko nijnko sín kjuachahya sín kjuínchekitohe sín tjan jína. <sup>44</sup> A ntá jehe tjan kóchjina tjan nóton tí ch'ín Jesús na ntá kuákóxin tjan tí iké ch'án, a ntá tuénxín tí jni la í kjuíhya tjan.

<sup>45</sup> Ntá kjuanchankí ch'ín Jesús kixin:

—¿Nkexro tí kuákóxinna? —ichro ch'án.

A ntá kaín sín ntáchro sín kixin ninkexró, ichro sín. A ntá ch'ín Pedro la ko tí sín k'uéjoko ch'án ntáchro sín kixin:

—Maestro, nchónhya chojni siín la ko tótéka sín la ntáhi ntáha, ¿ntá nkekuènte kixin naxa tjan-chankiá kixin nkexro tí kuákóxian? —ichro sín.

<sup>46</sup> Kjánchó ntáchro ch'ín Jesús kixin:

—Jnkojín nkexro kuákóxinna kixin kónòna kixin kjuachaxin kuèntaná kuítóexín ijnko chojni jína —ichro ch'án.

<sup>47</sup> A ntá tió k'uíkon tjan kixin ó kónoxín ntá kóchjina tjan chrakon tjan kjuák'exín tjan toch'in tjan chrínkí toté tí ch'ín Jesús. Ntá chrónka tjan nkayakon kaín xín chojni kixin nkekuènte kuákóxin tjan iké ch'án la ko nkexrí kuítóexín tjan jína xikaha.

<sup>48</sup> Ntá ntáchro ch'án kixin:

—Jaha, xjeenni, ó kuítóha jína kixin kuítekávan tí janhan. Kjuaxróxin sátjia —ichro ch'án.

<sup>49</sup> Naxa tjejótjo sín ntiha ntá xrínahya ikui ijnko nkexro kjuixin ntoe tí ch'ín t'etoan kuènte ninko, a ntá chénka ch'án tí ch'ín t'etoan kixin:

—Xjaan na mé ó kjuixin k'uén. Áxri í chjeéhya xra tí maestro —ichro ch'án.

<sup>50</sup> A ntá tió kuínhin ch'ín Jesús la kjuátehe ch'án ntáchro ch'án kixin:

—Chrakonhya. Títekávan tí janhan la tsitohe xjaan jína —ichro ch'án. A ntá sákjuí sín.

<sup>51</sup> A ntá tí kjuíjik'ixenhen sín nchia ntá kuítóehya ch'ín Jesús kixin ókjé nkexro chrók'uixenko ch'án nchia. Jehó ch'ín Pedro la ko ch'ín Jacobo la ko ch'ín Juan la ko tí it'é la ko tí iné tí xjachjin chrók'uixenhen sín tí tjen tí xjan a. <sup>52</sup> Kaín tí sín tjejó ntaha tsjánkàmá sín tí xjan a. Kjánchó jehe ch'án ntáchro ch'án kixin:

—Tsjan kahyará. Tí xjan la tsík'enhya la tjejua xjan —ichro ch'án.

<sup>53</sup> Ntá tjanoá sín ch'án kixin jehe sín la ó nohe sín kixin tsík'en xjan. <sup>54</sup> A ntá jehe ch'án itsé ch'án tja xjan ntá itsen k'uíyehé ch'án tí xjan ntáchro ch'án kixin:

—Tjarisoá, t'àya —ichro ch'án.

<sup>55</sup> Ntá kjan asén tjan ntá tuénxín k'uínkatjen tjan. Ntá k'uetōan ch'ín Jesús kixin tsjanjon sín nkehe sine tjan. <sup>56</sup> Ntá it'é la ko iné xjan la chrakon sín. A ntá ch'ín Jesús k'uetuēnhen ch'án sín kixin ninkexró chróchenkahya sín kixin xíkaha kónhen.

## 9

*Ch'ín Jesús ichr'án ch'án tí teyó sín  
(Mt. 10.5-15; Mr. 6.7-13)*

<sup>1</sup> Ntá ch'ín Jesús k'uetōan kixin tsochjina tí teyó sín k'uájiko ch'án. Ntá chjéhe ch'án sín kjuachaxin tsakitsje sín kaín tí nchakuen tí jínahya chóna chojni la ko sinchekitohe sín chojni jína. <sup>2</sup> Ntá k'uetōan ch'án kixin sátsjikjako sín nkexrí tí kjuachaxin

t'etoan Dios la ko sinchekitohe sín chojni jína. <sup>3</sup> La ko k'uetōan ch'án kixin:

—Ninkehó nkehe sátsjikohyará ntia sátsjirá, ni tí nta tjíxinrá la náhí, ni bolsa la náhí, ni niotja, ni chichaon, la ko tsjíkoará jehó tí ka tjejóyará ó. <sup>4</sup> A ntá tí tsjasánrá ijnko nchia tsjanjon sín kjuachaxin la ntahó tsitohará la tsjixixín tí xrā ntá sátsjixínrá ntiha. <sup>5</sup> A ntá tí tsjasánrá ijnko chjasin la ntá tsjanjonhya sín kjuachaxin tsjākorá ntá t'axrjéxinrá tí chjasén sín ntiha tsotsénkará tí nche chóna totará tsjākoxinrá xikaha kixin Dios sinchekjasóte tí jehe sín —ichro ch'án.

<sup>6</sup> Ntá sákjuí sín kaín tí chjasin ntsínsí sákjuíchronka sín tí tan jína tsaáxin chojni la ko kjuínchekitohe sín chojni jína kaín chjasin.

*Ik'uén ch'ín Juan Bautista*  
(Mt. 14.1-12; Mr. 6.14-29)

<sup>7</sup> A ntá tí ch'ín Herodes t'etoan kuínhin ch'án kaín tí xrā tjech'e ch'ín Jesús la tóxakonhen ch'án kixin iso sín ntáchro sín kixin ch'ín Juan Bautista la ó tsíxechón ch'án, ichro sín. <sup>8</sup> A ntá iso sín ntáchro sín kixin ch'ín Elías tsíxechón ch'án mé tí nkexro k'uéchronka itén Dios ósé. A ntá í so sín la ntáchro sín kixin jnkojín tí sín k'uéchronka itén Dios ósé la mé ó tsíxechón, ichro sín. <sup>9</sup> Kjánchó ntáchro ch'ín Herodes kixin:

—Janhan mé kuétoan kóchrínjin sín kja ch'ín Juan. ¿Á chrókóchaxín jehe ch'án kixin nchónhya kjuaxroan kuínhan tí tjech'e ch'án? —ichro ch'án. A ntá kjaxin jehe ch'án tóxakonhen ch'án sáchrókjuitsjehe ch'án tí ch'ín Jesús.

*Ch'ín Jesús kjuanjon nkehe kjóne in'ó mil chojni  
(Mt. 14.13-21; Mr. 6.30-44; Jn. 6.1-14)*

<sup>10</sup> A ntá tió kjan tí sín k'uájiko ch'ín Jesús ntá chénka sín tí jehe ch'án kaín tí xrā kjuích'e sín. Ntá k'uaxrjentako sín ch'án tí kohya ninkexró chjinaxón chjasin Betsaida. <sup>11</sup> Ntá tió k'uíxikónohe chojni kixin ntaha tjen ch'ín Jesús ntá sákuíchréhe sín ch'án. A ntá kjuanjon ch'án kjuachaxin ts'ejó sín. Ntá kjuankíxin chrónka ch'án nkexrí tjen tí kjuachaxin t'etoan Dios la ko kjuínchekitohe ch'án chojni jína.

<sup>12</sup> A ntá ó ntá kóntó ntá tí teyó sín k'uájiko ch'ín Jesús kóchjinehe sín ch'án ntáchro sín kixin:

—Nixjehé tí chojni kixin sátsji sín tí chjasin ntsí la ko tí ichrén nchia chjinaxón sátsjik'ok'éhe sín la ko sátsjikjeyá sín nkehe sine sín kixin jaha la ó noha kixin nteje tjejóni la kohya nkehe tsochjéheni sín —ichro sín.

<sup>13</sup> Kjánchó ch'ín Jesús ntáche ch'án sín kixin:

—Chjehérá sín nkehe sine sín —ichro ch'án.

Ntá kjuátēhe sín ntáchro sín kixin:

—Chóntahyani itsjé nkehe; jehó in'ó niotja la ko yaá koche chóntani. ¿Á tjinkávan sátsjik'enani nkehe sine kaín tí chojni siín? —ichro sín.

<sup>14</sup> Kixin siín chjina in'ó mil chojni ntoa. A ntá ch'ín Jesús ntáche ch'án tí sín xriko ch'án kixin:

—Ntácherá sín tsojnkojié sín ts'ixitjaxin sín jnkojnko cincuenta sín —ichro ch'án.

<sup>15</sup> A ntá xikaha kjuích'e sín k'uetoan sín, a ntá k'uixitjaxin sín kaín sín. <sup>16</sup> A ntá ch'ín Jesús kuákja ch'án tí n'ó niotja la ko tí yaá koche. Ntá konta ch'án nkajní kjuanchehe ch'án kjuasáyé Dios kixin



kjuanjon tí nkehe sine sín. Ntá kóchrít'ò ch'án tí niotj̄a la ko tí koche la chjéhe ch'án tí sín xriko ch'án. A ntá jehe sín k'óxikeyehe sín chjéhe sín kaín tí chojni siín. <sup>17</sup> A ntá kaín sín kjóne sín la kókjehe sín. A ntá chr'éxin kjuenájín sín kaín tí nkehe síxehe mé teyó ntaxra kjuínchekaón sín.

*Ch'ín Pedro mé chrónka kixin ch'ín Jesús mé tí Cristo*

*(Mt. 16.13-19; Mr. 8.27-29)*

<sup>18</sup> Ntá ijnko yaon ch'ín Jesús k'uaxrjenta ch'án tjenixjehe ch'án Dios. Ntá tjejóko ch'án tí sín xriko ch'án ntá kjuanchankíhi ch'án tí jehe sín kixin:

—¿Nkehe ichro tí chojni kixin nkexro tí janhan?  
—ichro ch'án.

<sup>19</sup> A ntá jehe sín kjuátehe sín ntáchro sín kixin:

—Iso sín ntáchro sín kixin jaha tí Juan Bautista. A ntá í so sín ntáchro sín kixin jaha la tí ch'ín Elías. A ntá í so sín ntáchro sín kixin jaha ijnko nkexro k'uéchrónka itén Dios ósé mé ó tsíxechón —ichro sín.

<sup>20</sup> A ntá kjuanchankíhi ch'in Jesús tí jehe sín kixin:

—A ntá jahará, ¿nkechorá, nkexro tí janhan?  
—ichro ch'án.

Ntá ntáchro ch'ín Pedro kixin:

—Jaha tí Cristo ichr'án Dios —ichro ch'án.

*Ch'ín Jesús chrónka kixin its'en ch'án*

*(Mt. 16.20-28; Mr. 8.30—9.1)*

<sup>21</sup> Ntá ch'ín Jesús k'uētuenhen ch'án sín kixin ninkexró tsochenkahya sín kixin nkexro tí jehe ch'án. <sup>22</sup> Ntá chénka ch'án sín kixin:

—Tí Xjeen Dios K'óna Chojni t'ichjánxin tsjasóte nchónhya nkehe tsonhen la ko tsitekakuenhya tí sín t'etōan kuènte n̄inko la ko tí sín t'etōan kuènte

tí sín nchàt'á la ko tí sín maestro tjako tí ley. Ts'óyán sín tí jehe ch'án, kjánchó tí nixin yaon na ó tsoxechón ch'án inaá —ichro ch'án.

<sup>23</sup> Ntá chr'éxin chénka ch'án kaín sín kixin:

—Tí chaxín tsochréhérá tí janhan na t'ichjánxin tsitohérá kaín tí nkehe tjaké asánrá, ntá tsamará tí ntacruz kuéntará jnkojnko yaon, a ntá tsochréhérá tí janhan. <sup>24</sup> Tí nkexro tjinkaon jehó sinchekaá asén mé ts'itjáyan. A ntá tí nkexro sinchek'itjáyanxín asén kixin tinkáchónki tí janhan la tsaá. <sup>25</sup> ¿A ntá nkehe tsonhen tí chrókjuacha ijnko chojni chróchónka kaín nkehe siín chjasintajni a ntá kjuachón chrókjuinchek'itjáyan ch'án? <sup>26</sup> A ntá jnkojín chojni chrókósuèhe kixin tinkáchónki tí janhan la ko tí nkehe tjákua, a ntá kjaxin tí Xjeen Dios K'óna Chojni mé tsosuèhe chróntáchro ch'án kixin chóxin ch'án tí jehe sín tió tsi ch'án éxi ijnko rey tsikao ch'án tí kjuachaxin kuente It'é ch'án la ko tí sín ángel jína. <sup>27</sup> Tíhi mé ntoá xrjanka kixin iso chojni tjejó ntihi tjejótinhin sín naxa ts'enhya sín ts'ikon sín kixin Dios ts'etoan tí kjuachaxin kuente ch'án.

*K'uixitóxin nkexrí tsjehe ch'in Jesús*

*(Mt. 17.1-8; Mr. 9.2-8)*

<sup>28</sup> A ntá k'uátsínka ijní yaon tí tsíchronka ch'án tíhi ntá sákjuiko ch'án ch'in Pedro la ko ch'in Juan la ko ch'in Jacobo la chrin sín ijnko jna kixin tsonixjehe ch'án Dios. <sup>29</sup> Ntá ch'in Jesús tjenixjehe ch'án Dios ntá k'uixitóxin nkexrí tsjehe ch'án la ko tí iké ch'án la tjóá la ko tjákiní tsjehe. <sup>30</sup> Ntá xrínahya k'uikon sín yaá chojni tjejótjo sín tí jehe ch'án na mé jehe sín la tí ch'in Moisés la ko tí ch'in Elías. <sup>31</sup> Imá t'inkáséyan jnkontatjen tí tjejó sín tjejótjo sín tí

ch'ín Jesús kixin nkexrí its'en ch'án la ko nkexrí tsjasótexín ch'án tí chjasin Jerusalén. <sup>32</sup> A ntá ch'ín Pedro la ko tí sín tjejóko ch'án la imá kuihi sín kotáchrin; kjónté la k'uéjótsehe sín k'uikon sín tí kjuachaxin kuènte ch'ín Jesús la ko k'uikon sín tí yóí chojni ntoá tjejóko sín ch'án. <sup>33</sup> A ntá tió sátsji tí yóí sín tjejóko ch'ín Jesús ntá ch'ín Pedro ntáche ch'án tí ch'ín Jesús kixin:

—Maestro, jína kixin tjejóni ntihi. Chrókjuich'énani iní nchia la mé ijnko kuèntá la ijnko kuènte ch'ín Moisés la ko ijnko kuènte ch'ín Elías —ichro ch'án.

Kjánchó ch'ín Pedro í noehya ch'án nkehe chróntáchró ch'án kixin chrakon ch'án. <sup>34</sup> A ntá naxá tjenixja ch'án ikui ijnko tjuí kjuák'etja tí jná tjejó sín. Ntá chrakon sín tjejó sín chrínkí tí tjuí. <sup>35</sup> Ntá xrínahya kuínhin sín chríkjan tí tjuí itén nkexro ntáchró kixin:

—Tíhi mé Xjanna, imá tjuahá ch'án. Tinhínrá tí nkehe tsochronka ch'án la ko tí nkehe tjako ch'án.

<sup>36</sup> A ntá tió kjuixin kuínhin sín tí tan nixja ntá k'uikon sín kixin jeho ch'ín Jesús tjen. A ntá tí jehe sín la tání sín kixin xíkaha k'uikon sín tí yaon a la ninkexró chenkahya sín tí nkehe k'uikon sín.

*Ch'ín Jesús kjuínchekitohe jína ijnko chánjan chóna nchakuen tí jínahya*

*(Mt. 17.14-21; Mr. 9.14-29)*

<sup>37</sup> A ntá tí yaon chr'éxin k'uínkajinxin sín jná la ntá nchónhya chojni sákjuixinhin sín ntja ch'ín Jesús. <sup>38</sup> A ntá ijnko chojni tjenkákjan ch'án tí chojni kjuíji ntá itsen nixja ch'án ntáchró ch'án kixin:

—Maestro, chronóahani kixin chrótsjehé tí xjeenni kixin jnkokoaxón ó chóntani a ntá níhi xjan. <sup>39</sup> Chónta xjan nchakuen tí jínahya la ntá nchek'iyato xjan la ko nchek'aniáte xjan nchexrànkā xjan kixin tjtóthe xjan la ko ntalóxrjo sítjixin ir'va xjan la ko ncheníhi xjan, na mé chrohya tsjinhin xjan. <sup>40</sup> A ntá chronóeheni tí sín xríkoa chrókuakitsje sín tí nchakuen tí jínahya, kjánchó kjuachahya sín —ichro ch'án.

<sup>41</sup> Ntá kjuátehe ch'ín Jesús ntáchro ch'án kixin:

—Jahará chaxínhya chojni tinkáchónki tí janhan. Jehya jína tjenkayáxinrá. ¿Xá hasta nkesá tjinkáonrá ts'ejóni tsjákohará kixin nunca t'itjáhyará? Xrákoa tí xjan ntihi —ichro ch'án.

<sup>42</sup> A ntá kóchjina tí chánjan. A ntá tí nchakuen tí jínahya kjuáka xjan nonte la ko kjuínchek'aniáte xjan inaá. Kjánchó ch'ín Jesús jiehe k'uetuēhen tí nchakuen tí jínahya kixin ts'axrjexín xjan. Ntá k'uaxrje tí nchakuen tí jínahya ntá kuitóhe xjan jína. A ntá ch'ín Jesús kjuínchek'áyéhe tí it'é xjan.

<sup>43</sup> A ntá kaín sín chrakon sín kixin k'uíkon sín tí kjuachaxin jie kuente Dios.

*Ch'ín Jesús chrónka ch'án inaá kixin its'en ch'án  
(Mt. 17.22-23; Mr. 9.30-32)*

Naxā chrakon sín kaín sín kixin tí kjuaxroan kjuích'e ch'ín Jesús la ntá ntáche ch'án tí sín xriko ch'án kixin:

<sup>44</sup> —Tinhínrá jína tíhi la ko t'itjáyanhyará. Tsotsé sín tí Xjeen Dios K'óna Chojni la ko tsjikaán sín ch'án tí tjejó tí sín t'etōan —ichro ch'án.

<sup>45</sup> Kjánchó jehe sín kienxínhya sín tí nkehe ntáchro ch'án kixin naxā kjuanjonhya Dios

kjuachaxin kixin chrókuienxín sín, ntá chrakon sín na kjuanchankíehya sín ch'án kixin nkexrí t'axrjexín tí nkehe ntáchro ch'án.

*Nkexro tí imá tjetōan ts'etōan*

*(Mt. 18.1-5; Mr. 9.33-37)*

<sup>46</sup> A ntá tí sín k'uájiko ch'ín Jesús kjuankíxin sín itjo sín kichó sín kixin nkexro tí jehe sín antsí má tjetōan ts'etōan. <sup>47</sup> Kjánchó ch'ín Jesús kónohe ch'án nkehe tjenkayáxin asén sín. Ntá kuákja ch'án ijnko chánjan ntá kjuak'e ch'án tí tjen ch'án <sup>48</sup> ntá ntáche ch'án sín kixin:

—Tí jnkojín nkexro chrók'uáyéhe tí xjan i kixin tinkáchónki sín tí janhan mé xikaha chrók'uáyéhe sín tí janhan. A ntá jnkojín nkexro chrók'uáyéhe tí janhan mé xikaha chrók'uáyéhe tí nkexro chr'ánna k'uinka. A ntá tí jnkojín nkexro antsí chrókjuinchehnkehya la mé antsí chrók'uáyéhe kjuachaxin chrók'uetōan.

*Tí nkexro nínkakuenhya tí jeheni la mé tóxrjínhìn ch'án tí xra ch'eni*

*(Mr. 9.38-40)*

<sup>49</sup> Ntá ntáchro ch'ín Juan kixin:

—Maestro, k'uíkonní ijnko nkexro kjuachaxin ihnjá kuakitsjexín ch'án nchakuen tí jínahya chóna chojni. A ntá chénkani ch'án kixin xikahya chrókjuich'e ch'án kixin xrikohyani ch'án.

<sup>50</sup> Kjánchó ch'ín Jesús ntáchro ch'án kixin:

—Xikahya chróntáche ch'án kixin tí nkexro nínkakuenhya tí jeheni la kjá tóxrjínhìn tí xra ch'eni —ichro ch'án.

*Ch'ín Jesús kjuentuéhe ch'án tí ch'ín Jacobo la ko tí ch'ín Juan*

51 A ntá ó kóchjina tí yaon sátsji ch'ín Jesús nkaya nkajní, na ntá táhó kjuenkayáxin ch'án sátsji ch'án chjasin Jerusalén. 52 Ich'án ch'án chojni kuitónxin ntia a ntá jehe sín sákjuí sín ijnko chjasin ntsí estado Samaria sákjuikjeyá sín nchia ts'ok'èxin sín. 53 Kjánchó tí sín samaritano kjuanjonhya sín kjuachaxin chrók'uejó sín kixin k'uíkon sín kixin ó xra ó sátsji ch'án chjasin Jerusalén. 54 A ntá tió k'uíkon tí sín k'uájiko ch'án la mé ch'ín Jacobo la ko ch'ín Juan la ntáchro sín kixin:

—Inchéni, ¿á tjinkávan kixin chrókjuanchiani xrohi chrók'uinkajinxin nkaya nkajní chrókjuinçek'itjáyan tí jehe sín éxí kjuanchia tí ch'ín Elías?\* —ichro sín.

55 Ntá ch'ín Jesús kuínkátjá ch'án komá ch'án tí jehe sín ntá kjuentuéhe ch'án sín ntáchro ch'án kixin:

—Jahará la kjá noahyará nkexro nchakuen chontará. 56 Kixin tí Xjeen Dios K'óna Chojni kuihya ch'án kixin chrókjuinçek'itjáyan ch'án chojni. Náhi. Xra ó ikui ch'án sinchekaá ch'án chojni —ichro ch'án.

Ntá sákjuí sín í jnko chjasin ntsí.

*Tí sín tjinkaon chróchréhe sín tí ch'ín Jesús  
(Mt. 8.19-22)*

57 A ntá jehe sín sákjuí sín ntia inaá. Ntá xeta sín ijnko nkexro ntáche ch'án tí ch'ín Jesús kixin:

—Inchéni, tjinkaonni chróchréheni tí jaha nketí tjinkávan sátsjia —ichro ch'án.

58 Ntá ch'ín Jesús kjuátehe ch'án ntáchro ch'án kixin:

---

\* 9:54 1 Reyes 18.30-40

—Tí koxróntá chón̄ta va itjueé va la ko tí koxroxe chón̄ta va kaké va. A ntá tí Xj̄een Dios K'ón̄a Chojni chón̄tahya nketí ts'ok'èxin ch'án̄ —ichro ch'án̄.

<sup>59</sup> A ntá ntáche ch'án̄ í jnko nkexro:

—Chréhé tí janhan —ichro ch'án̄.

Kjánchó kjuátēhe ch'án̄ kixin:

—Ìnchéni, t̄itohéni senó sátsjikjaváni it'éni —ichro ch'án̄.

<sup>60</sup> Ntá kjuátēhe ch'ín̄ Jesús ntáchro ch'án̄ kixin:

—T̄itohé kixin tí chojni tsík'en la jnkokón̄ sín tsík'en tsjavá kichó sín. A ntá jaha la sátsjikjækua nkexrí t̄jen tí kjuachaxin t'et̄oan Dios —ichro ch'án̄.

<sup>61</sup> Ntá ntáchro í jnko nkexro kixin:

—Ìnchéni, tjinkaonni tsochréhēni tí jaha. Jehí t̄itohé tsjinixjēheni tí sín siín n̄toeni —ichro ch'án̄.

<sup>62</sup> Kjánchó ntáchro ch'ín̄ Jesús kixin:

—Tí nkexro kjuankixin tsotsé ch'án̄ arado ntá chrókjan chrókotón̄hen nóton mé x̄ikaha xitjahya sich'ehe ch'án̄ Dios xr̄a.

## 10

*Ch'ín̄ Jesús k'uetuēhen setenta chojni sátsjikjako sín*

<sup>1</sup> Ntá chr'èxin Ìnchéni kjueyá ch'án̄ í jnko setenta chojni ntá k'uetuēhen ch'án̄ sín sátsji sín yóyó sín sátsji sín tsitón̄xin sín nt̄ia tí kaín̄ chjasin na ko nkuíxín tjinkaon ch'án̄ sáchrókjui ch'án̄. <sup>2</sup> Ntá ntáchro ch'án̄ kixin:

—Chaxín̄ ntáxr̄jan kixin imá tsík'ón̄a, a ntá tí chojni ch'e xr̄a mé tsjéhya. Chrókjuancheherá tí Ìnché nonte kixin chróchr'án̄ ch'án̄ itsjé chojni

chrókjuich'e xra. <sup>3</sup> Sátjirá jahará. Xráxinkáonrá kixin tétuanhanrá sátsjirá éxí kolélo ts'ejóyákanrá chríkjan tí kolobo. <sup>4</sup> Tsjíkoahyará kabólsa la ko tjoa t'inka chichaon la ko tokate tjíkoahyará la ko tí nixjehérá chojni tí ntia titoéhyará kixin chrókjuintaxrjanhanrá sín. <sup>5</sup> A ntá tió ts'ixenhenrá jnkojín nchia la senó nixjehérá sín ntáchrórá kixin ts'áyéhe sín kjuaxróxin, tsixrorá. <sup>6</sup> A ntá tí tjejó sín kjuaxróxin ntiha la nixjehérá sín la ts'áyéhe sín kjuaxróxin. A ntá tí la náhí, a ntá tí kjuaxróxin chrók'uáyéhe sín na sátsjikoará ínaá. <sup>7</sup> A ntá tí nchia ntiha chrókjuanjón sín kjuachaxin chrókuitochará, ntaha mé tsjanjón sín nkehe chóna sín sinterá la ko its'irá, kixin tí nkexro ch'e xra la síin kjuachaxin tsoxenkehe. Tsjíhyará í jnko nchia la ko í jnko nchia. <sup>8</sup> A ntá tsjasánrá ijnko chjasin tsjanjón sín kjuachaxin ts'ejorá ntiha ntá interá tí nkehe tsjanjón sín. <sup>9</sup> Nchekitohérá chojni níhi jína. Ntá chenkará sín kixin tí kjuachaxin t'etoan Dios la kjínhya tjen tí tjejó sín, ichrorá. <sup>10</sup> A ntá tió tsjasánrá ijnko chjasin a ntá tsjanjonhya sín kjuachaxin la ntá t'axrjéxinrá ntóe sín sátjirá tí ntia chjasin ntiha ntá ntáchrórá kixin <sup>11</sup> kjónté tí nche tsík'ixitja totará tsotsénkará kixin tsjákoxinrá kixin tí kjuaxróxinhya ts'áyéhe sín chr'éxin. Kjánchó chrókónohe sín kixin tí kjuachaxin t'etoan Dios la kjínhya tjen tí tjejó sín, ichrorá. <sup>12</sup> Ntáxrjan kixin tí yaon tsjejéxin chjasin-tajni la kjuaxróxinhya ts'atsínka tí chjasin a. Antsí náxrjónhya tí nkehe ts'atsínka sín, a ntá tí nkehe ts'atsínka chjasin Sodoma\* la kénhyó —ichro ch'án.

---

\* 10:12 Génesis 19.24–28



*Iso chjasin titekakonhya*  
(Mt. 11.20-24)

<sup>13</sup> 'Nòará jahará chjasin Corazín. Nòará jahará chjasin Betsaida. Tí chrók'uixin tí kjuaxroan tí chjasin Tiro la ko chjasin Sidón éxí k'uíkonrá jahará, ntá chrókójehe sín la tjoka chrókjuítóxinhin ntje sín, tjoka chrók'uinkáya sín ka tié la ko chrókjuikjanjin sín ikja sín nteso, kixin chrókjuakoxin sín kixin t'ává sín. <sup>14</sup> A ntá tí yaon tsitoexín ijié chojni a ntá jahará antsí tsjasótiará, a ntá tí sín kuènte chjasin Tiro la ko chjasin Sidón la kénhyó tsjasóte sín. <sup>15</sup> A ntá jahará chjasin Capernaum, tjenkayáxinrá kixin imá nohará a ntá sátsjirá nkaya nkajní, ichrorá. Chaxínhya. Jahará la tsjasinkajinrá sátsjirá tí tsjasótexín tí sín tsík'en.

<sup>16</sup> 'Tí nkexro tinhin tí nkehe ntáchrórá la mé xikaha tinhin tí nkehe ntáxrjan la ko tí sín titekakonhya sín tí jahará na mé xikaha titekakonnahya sín tí janhan. A ntá tí nkexro titekakonnahya sín tí janhan xikaha titekakonhya sín tí nkexro chr'ánna k'uinka.

*Ó kjan tí sín setenta sátsíkji*

<sup>17</sup> A ntá ó kjan tí sín setenta sátsíkji la imá chéhe sín ntáchro sín kixin:

—Inchéni, kjónté tí nchakuen tí jínahya titekakonhenni tió t'ákjenxinni ihniá —ichro sín.

<sup>18</sup> Ntá ntáchro ch'ín Jesús kixin:

—Kja chaxín k'uíkuan kixin ch'ín Tsochren k'uánótjenxin nkajní éxí ijnko kjónkixin xikaha kónhen.† <sup>19</sup> Ó tjahará kjuachaxin kixin kjónté konche la ko konchja tsinkátjará la ko tsjachahya

† 10:18 Isaías 14.12

ninkehó tí kjuachaxin kuènte tí ch'ín Tsochren kixin ninkehó tsoanhyará. <sup>20</sup> Kjánchó jehya tíha chrókóchàxínrá kixin tí nchakuen tí jínahya kuítekakonhanrá. Náhí. Chrókóchàxínrá kixin ihnjárá ó ts'ínixín nkaya nkajní —ichro ch'án.

*Tí Xjeen Dios nixjehe It'é ch'án*

*(Mt. 11.25-27; 13.16-17)*

<sup>21</sup> A ntá tuénxín tí Nchakuen Dios kjuínchechéhe tí ch'ín Jesús ntá ntáchro ch'án kixin:

—Tjáncháha kjuasáya It'éni Ìnché nkaya nkajní la ko chjasintajni kixin kjuánjonhya kjuachaxin chrók'uitja tí sín imá nohe, a ntá kjuánjuan kjuachaxin kixin ts'itja tí sín noehya. Mé xíkaha It'éni, jaha kóxrjínhan kixin xíkaha tsohnen.

<sup>22</sup> 'T'aná mé chjina kaín xín nkehe. Ninkexró noehya nkexro tí Xjeen ch'án. Na mé jehó It'é ch'án mé nohe. La ko ninkexró noehya nkexro tí It'é ch'án. Na mé jehó tí Xjeen ch'án mé nohe ch'án la ko tí sín tsíkjeýá ch'án kixin tjinkaon ch'án tsohohe sín nkexro It'é ch'án —ichro ch'án.

<sup>23</sup> Ntá komá ch'án tí sín k'uájiko ch'án ntá ntáche ch'án tí jehó sín kixin:

—Chéhe tí sín k'uíkonxín kon sín éxí k'uíkonrá.

<sup>24</sup> Ntáxrjan kixin nchónhya tí sín k'uéchronka itén Dios ósé la ko nchonhya tí sín rey k'uétjinkaon sín chrók'uikon sín éxí t'ikonrá, kjánchó k'uíkonhya sín, la ko k'uétjinkaon sín chrókuinhin sín tí nkehe tjejotinhínrá jie, kjánchó í kienhya sín —ichro ch'án.

*Ch'ín Jesús kjuíncheyóexin éxí ijnko samaritano jína*

<sup>25</sup> Ntá ijnko maestro tjako tí ley k'uínkatjen ch'án nixjehe ch'án tí ch'ín Jesús tjinkaon ch'án

tso<sub>no</sub>e<sub>xín</sub> ch'án á chaxín nohe ch'án tsjate<sub>he</sub> ch'án ntá kjuanchankí ch'án kixin:

—Maestro, ¿nkexrí chrókjuich'eni chrók'uitjani tí kjuachón jnkochrín? —ichro ch'án.

<sup>26</sup> Ntá kjuáte<sub>he</sub> ch'ín Jesús ntáchro ch'án kixin:

—¿Nkexrí nixja tí ley? ¿Nkexrí tiénxian? —ichro ch'án.

<sup>27</sup> A ntá tí maestro tjako tí ley mé kjuáte<sub>he</sub> ch'án ntáchro ch'án kixin:

—Chrótjuèheni Ìnchéni Dios kaín asénni la ko kaín fuerza chóntani la ko kaín kjuaxrexinkaon kuénténi la ko chrótjuèheni kíchó ni éxí tjuèxínni asénni‡ —ichro ch'án.

<sup>28</sup> Ntá ntáchro ch'ín Jesús kixin:

—Jína kjuáte<sub>he</sub>. A ntá tí jaha xíkaha sích'e la tsochonta kjuachón —ichro ch'án.

<sup>29</sup> Ntá tí maestro tjako tí ley mé tjinkaon chrókjuachaxín ch'án tí ch'ín Jesús ntá kjuanchankí ch'án ínaá kixin:

—¿Xá nkexro tí kíchó ni chrótjuèheni, ichrua? —ichro ch'án.

<sup>30</sup> Ntá ch'ín Jesús kjuáte<sub>he</sub> ch'án ntáchro ch'án kixin:

—Ijnko chojni k'uínkajinxín nó ntia kjuixín chjasin Jerusalén sátsji ch'án chjasin Jericó, ntá kuátóhe ntia iso síchee kueéhe sín ch'án kaín nkehe sáchrókjuiko ch'án, la ko iké ch'án tsíkakitsjehe sín ch'án, la tsíkjate sín ch'án, la ntá sátsíkji sín tsíkitohe sín ch'án la ó mero tjet'en ch'án. <sup>31</sup> Ntá xrínahya k'uátsínka ijnko nchat'á tí ntia ntiha ntá k'uíkon ch'án xíkaha ntá ántosén ch'án k'uátsínké ch'án.

‡ 10:27 Deuteronomio 6.5; Levítico 19.18

<sup>32</sup> **A** ntá kjaxin ijnko ch'ín levita k'uátsínka chjinaxon ntiha. Ntá k'uíkon ch'án xikaha ntá ántosén ch'án k'uátsínké ch'án kjaxin. <sup>33</sup> **A** ntá ijnko ch'ín kjuixin estado Samaria k'uátsínka tí ntia ntiha ntá k'uíkon ch'án xikaha tjetsínka tí nkexro ntá kuikonóehé ch'án. <sup>34</sup> Ntá kóchjinehe ch'án tí nkexro tsíkóníhi ntá kjuích'ehe ch'án xroan tí síchrit'ò chjéhe ch'án aceite la ko vino la ko kjuínchentetoxín ch'án ka. Ntá kjuixin ntá kjuínchekiták'á ch'án tí kolóchoe ch'án. Ntá sákjuíko ch'án ijnko nchia t'ok'èxín chojni ntiha la k'uáyakonhen ch'án. <sup>35</sup> Ntá tí kóyaon ntá sátsji tí ch'ín samaritano kuakitsje ch'án iyó tí chichaon la chjéhe ch'án tí ìnché tí nchia ntáchro ch'án kixin: “T'ayakonhén tí nkexro i, a ntá antsí má ts'ichjánxinhin ch'án la tió tsokjan ntá tsjénkaha ts'ókjanhan kaín tíha,” ichro ch'án. <sup>36</sup> **A** ntá tí iní nkexro k'uátsínka ntia la, ¿nkexro tjuèhe tí nkexro kjuíncheníhi tí síchee? —mé kjuanchankí ch'ín Jesús.

<sup>37</sup> **A** ntá kjuátehe tí maestro tjako tí ley kixin:

—Tí nkexro kuikonóehé tí jehe ch'án —ichro ch'án.

Ntá ntáchro ch'ín Jesús kixin:

—Sátjia jaha la xikaha chrókjuích'e —ichro ch'án.

*Ch'ín Jesús sákjuí ch'án ntoe tjan Marta la ko tjan María*

<sup>38</sup> Naxa tjetji ch'ín Jesús kjuíji ch'án ijnko chjasin ntsí. **A** ntá ntiha itjen ijnko tjan it'in Marta, a ntá kjuanjon tjan kjuachaxin kuitohe ch'án ntoe tjan ntiha. <sup>39</sup> **A** ntá tjan Marta chóna tjan ijnko kichó tjan it'in María. **A** ntá jehe tjan kjuák'etjaxin tjan chrínkí toté tí ch'ín Jesús tjetinhin tjan nkehe tí

tjehro ch'án. <sup>40</sup> A ntá tjan Marta tóxakonhen tjan kixin nchónhya xra chóna tjan, ntá kóchjinehe tjan tí ch'ín Jesús ntáchro tjan kixin:

—Inchéni, ¿á tóxakuanhya kixin tí tjan kichó ni kuítóheni tjan, a ntá jehóni tjech'eni kaín xra? Ntáche tjan kixin tsjinkitsani tjan —ichro tjan.

<sup>41</sup> Kjánchó ch'ín Jesús kjuátehe ch'án ntáchro ch'án kixin:

—Marta, Marta, jaha imá tóxakonhan kixin t'inkákonhen nchónhya xra chonta. <sup>42</sup> Kjánchó jnkokoá nkehe t'ichjánxin. A ntá tjan María kjueyá tjan tí nkehe antsí jina la ko ninkexró tsakitsjehya tjan tíha —ichro ch'án.

## 11

### *Ch'ín Jesús tjako ch'án nkexrí tsonixjeheni Dios (Mt. 6.9-15; 7.7-11)*

<sup>1</sup> A ntá jnkonaá ch'ín Jesús tjenixjehe ch'án Dios ijnko lugar tjen. Ntá kjuixin la ijnko tí sín xriko ch'án ntáchro kixin:

—Inchéni, tjácohéni nkexrí tsonixjeheni Dios kixin xikaha ch'ín Juan kjuakohe ch'án tí sín k'uájiko ch'án.

<sup>2</sup> Ntá ch'ín Jesús ntáchro ch'án kixin:

—Tió nixjehérá Dios ntáchrórá kixin:  
It'éni tjen nkaya nkajní, jaha imá tjóá.  
Chrókui ti kjuachaxin kuéntá.

Chrókjuich'e tí nkehe tóxrjínhan jaha ntihi chjasin-tajni éxí tjech'e nkaya nkajní.

<sup>3</sup> Ijie tsjánjuan tí niotja t'ichjánxinhinni jnkojnko yaon.

4 T'óxíka tí nkehe jínahya kjuích'eni kixin kjaxin jeheni ts'itjáyenhenni tí nkehe kjuích'eheni chojni.

Titoéhyani jeheni xrahya chrókjuasinni jie.  
Nchekaáni kaín tí nkehe jínahya chrókónhenni  
—mé xíkaha ichro ch'ín Jesús.

5 Kjaxin ntáchro ch'án kixin:

—A ntá jnkójínrá chróchontará ijnko chojni choxian, a ntá sáchrókjuia ntoe ch'án k'áxrótjen chróntáche ch'án kixin: “Amigo, nchekjenni iy'á niotja <sup>6</sup> kixin nantá ó kui ijnko chojni chóxinni kujxin ch'án kjín kjuíji ch'án ntoeni ntá chóntahyani ninkehó tsochjéheni ch'án.” <sup>7</sup> A ntá tí chrókjuatehe tí nkexro choxian tjen nkaxenhen chróntáchro kixin: “Chjeéhyani xra. Tí ntója ntoeni méhe t'ikjéhe. A ntá xjeenni tzejót'ok'èkoni xjan. Ntá xitjahya ts'àyani tsotjáhani nkehe”, ichro ch'án. <sup>8</sup> Ntáxrjan kixin kjónté chrók'uayahya ch'án chrótjáhya ch'án nkehe kjónté chóxian ch'án, kjá ts'àya ch'án tsotjáha ch'án kaín nkehe t'ichjánxinhan kixin tjinkakonhya ch'án kixin naxa chrókjuak'é chrók'uèya jaha. <sup>9</sup> Mé xíkaha ntáxrjan kixin: Tjanchiará nkehe la Dios tsotjáhará; tjéyará nkehe la ts'itjará; t'inkará puerta la tsoxitjehe. <sup>10</sup> A ntá tí nkexro tjanchia nkehe la ts'áyéhe tí nkehe; la ko tí nkexro tjejá nkehe la ts'itja; la ko tí nkexro t'ínka puerta la tsoxitjehe.

11 'Xá jnkójínrá chontará xjaanrá chrókjuanchahará xjan niotja la 'á chrókjuánjonrá ijnko xro? O chrókjuanchahará xjan koche la 'a chróchjehérá ijnko konche? <sup>12</sup> O chrókjuanchahará

xjan koja la ¿á chrókjuánjonrá ijnko konchia? <sup>13</sup> A ntá jahará kjónté jínahyará la ó nohará nkehe jína tsochjehérá xjaanrá, la mé antsí chrókónohará kixin It'eni tjen nkaya nkajní tsotjáhará Nchakuen ch'án tí jnkójínrá chrókjuanchehérá ch'án —ichro ch'ín Jesús.

*Tjanchia sín jie kixin ch'ín Jesús chóna kjuachaxin tí Jínahya*

*(Mt. 12.22-30; Mr. 3.19-27)*

<sup>14</sup> Ntá ch'ín Jesús kuakitsje ch'án ijnko nchakuen tí jínahya tsíkjinchenósín ijnko chojní. A ntá tíó tsík'axrje tí nchakuen tí jínahya a ntá tí ch'ín xitjahya nixja la jína nixja ch'án. Ntá kaín chojni chrakon sín kixin xikaha tsíkjich'e ch'án. <sup>15</sup> A ntá jnkójín tí jehe sín ntáchro sín kixin:

—Tí ch'ín a mé takitsje ch'án nchakuen tí jínahya kixin chóna ch'án kjuachaxién tí ch'ín Beelzebú mé tí ch'ín Tsohren, na mé jehe ch'án mé t'etuenhen kaín tí nchakuen tí jínahya —ichro sín.

<sup>16</sup> A ntá iso sín tjinkaon sín chrókjuachaxin sín tí ch'ín Jesús ntá kjuanchehe sín ch'án ijnko kjuaxroan náxrjón kuènte nkaya nkajní. <sup>17</sup> Kjánchó jehe ch'án ó nohe ch'án nkehe tjenkayáxin sín la ntáchro ch'án kixin:

—Jnkójín gobierno jnkokónhya tjenkayáxin sín ntá tjanjonko kichó sín na mé ts'itjáyán tí kjuachaxin ts'etoanxín sín, la ko tí sín jnkokoá nchia jnkokónhya tjenkayáxin sín xitjahya ts'ejóko kichó sín jnkokoá. <sup>18</sup> A ntá kjáxin tí ch'ín Tsohren chrókjuánjonko kichó ch'án, ¿la nkexrí chróchóna ch'án kjuachaxin naxa chrók'uetóan ch'án tí chrók'uaxrje tí jínahya? A ntá jahará ntáchrorá

kíxin janhan takítsjé nchakuen tí jínahya kíxin tí kjuachaxién ch'ín Tsochren chonta janhan, ichrorá. <sup>19</sup> A ntá tí xíkaha la, ¿ntá nkexro chjéhe kjuachaxin tí sín chréhe tí jahará kíxin tsjacha sín tsakitsje sín nchakuen tí jínahya? Jehe sín mé tjakoxin sín kíxin jahará ntoáhya tjenkayáxinrá. <sup>20</sup> A ntá tí kjuachaxién Dios mé takítsjéxian tí nchakuen tí jínahya na mé chrókónoaxínrá kíxin tí kjuachaxién Dios t'etōan ch'án mé ó kui tí tjejorá.

<sup>21</sup> 'A ntá ijnko chojni jiehe yamá chica t'ayakonhen ch'án ntōe ch'án kíxin tí nkehe chóna ch'án ts'itjáyanhya. <sup>22</sup> A ntá itsi ijnko nkexro antsí má tsehe, a ntá tsjanjonko ch'án tí ìnehé nchia, a ntá tsjacha tsakitsjehe tí ìnehé nchia kaín tí chica yamá ch'án kíxin imá jieexín ch'án. A ntá tí ch'ín antsí tsehe mé tsakja ch'án kaín nkehe siín ntiha. <sup>23</sup> Tí nkexro titekakonhya tí janhan mé nínkakonna ch'án. A ntá tí nkexro tjinkítsahya tí janhan mé t'ínkákōnhen tí xra t'a —ichro ch'án.

*Ijnko tí nchakuen tí jínahya mé tsokjan inaá  
(Mt. 12.43-45)*

<sup>24</sup> 'A ntá ijnko nchakuen tí jínahya tsík'axrjéxín ijnko chojni na mé ixri tí nonte xámá xritjeyá nketí náxrjón ts'ok'éhe. A ntá tí k'uitjahya ntá tjenkayáxin kíxin: “Áxri tsokjan ntōna k'uaxrjéxian.” <sup>25</sup> A ntá tió kjan la éxí ijnko chojni tsík'ánjón ntōe la náxrjón tsjehe tí nkaxenhen nchia. A ntá k'uíkon tí jínahya xíkaha tjen nchia <sup>26</sup> a ntá sákjuíkákjín yato nchakuen tí jínahya antsí má jínahya. A ntá antsí má jínahya kōnhen tí ch'ín a, a ntá tí senó la kénhyó. Mé xíkaha tsonhen ijnko chojni kénhya asén tinkáchónki Dios —ichro ch'án.



*Tí kjuachéhe chaxín*

<sup>27</sup> Ntá ch'ín Jesús tjenixja ch'án chrónka ch'án kaín tíha ntá ijnko chojni chjin tjenkákjan tí jehe sín a itsen nixja tjan ntáchro tjan kixin:

—Chéhe tí nkexro k'uaxrjeníxin tí jaha kjuíntak'ánkiá —ichro tjan.

<sup>28</sup> Ntá jehe ch'án kjuátehe ch'án ntáchro ch'án kixin:

—Antsí chéhe tí nkexro tinhin tí itén Dios la ko titekaon sín —ichro ch'án.

*Tí sín jínahya mé tjanchia sín ijnko kjuaxroan náxrjón*

*(Mt. 12.38-42; Mr. 8.12)*

<sup>29</sup> Ntá nchónhya chojni sítójnkotsé sín tí tjen ch'ín Jesús ntá jehe ch'án kjuankíxin nixja ch'án ntáchro ch'án kixin:

—A ntá tí chojni siín jie la jínahya sín, a ntá tjanchia sín kixin chrókjuásian ijnko kjuaxroan náxrjón. Kjánchó tsjákoxinhya í jnko kjuaxroan la jehó tí nkehe tsíkónhen ch'ín Jonás. <sup>30</sup> Ntá éxí yóhe kónhen ch'ín Jonás kónoexín tí sín chjasin Nínive mé xikaha tsonhen tí Xjeen Dios K'óna Chojni la ts'ikon tí chojni siín jie. <sup>31</sup> A ntá tí yaon tsitoexín ijíé chojni tjejó jie la mé tí tjan reina k'uetōan kjuixín nó Sur mé ts'inkatjen tjan tsjanchia tjan jie kixin tí sín tjejó jie. Kixin jehe tjan imá kjín kjuixín tjan tsinhin tjan nkexrí imá k'uénohe ch'ín Salomón.\* A ntá jie itjèn janhan antsí chonta kjuachaxin, a ntá ch'ín Salomón la kénhyó. <sup>32</sup> La ko tí sin chjasin Nínive kjaxin ts'inkatjen sín tió tsitoexín ijíé chojni la tsjanchia sín jie kixin tí sín tjejó jie la

\* 11:31 1 Reyes 10.1-10

ko tson táchro sín kixin chrókjuasóte tí chojni tjejó jie kixin tió kuínhin tí sín Nínive chrónka ch'ín Jonás itén Dios la kjuitóxinhin sín ntje sín. A ntá jie itjèn janhan antsí má chonta kjuachaxin, a ntá ch'ín Jonás la kénhyó.

*Xrohi t'inkaséyanxín cuerpo kuènte chojni*

*(Mt. 5.15; 6.22-23)*

<sup>33</sup> 'Nijnko chojni chrokjuinчек'ákjen ijnko xrohi chrókjuak'ema ch'án la ko chrókjuak'ehya ch'án chrínkí ijnko ntacajón. Náhí. Noi chrókjuak'e xrohi chrókjuak'enkáya candelero kixin ts'ikonxín chojni tí t'inkaséyan.† <sup>34</sup> Tí ikonrá mé éxí yóhe ijnko xrohi t'inkaséyanxín tí cuerpo kuéntará. A ntá tí chontará ikonrá jína la ntá kuenté cuerpo kuéntará chóna xrohi. A ntá tí chontará ikonrá jínahya la ntá kuenté cuerpo kuéntará la sítie tjen. <sup>35</sup> Chrókóxakonhanrá kixin chrók'uayakonhénrá tí xrohi chontará kixin chrók'uankahya kixin chrók'uixitiéhya tí tjejorá. <sup>36</sup> A ntá tí kuenté tí cuerpo kuéntará chróchóna xrohi la ko nit'ó chrók'uixitiéhya la ntá kuenté la chrók'uikonrá jína la éxí ijnko lámpara kuenté ch'e xra jína.

*Ch'ín Jesús chrónka kixin ntoáhya tjako tí sín fariseo la ko tí sín tjako ley*

*(Mt. 23.1-36; Mr. 12.38-40; Lc. 20.45-47)*

<sup>37</sup> A ntá tió kjuixin nixja ch'ín Jesús ntá ijnko ch'ín fariseo chrónóehé ch'án tí ch'ín Jesús kixin sátsjiko ch'án ntöe ch'án sineko ch'án. Ntá tió kjuíji sín ntiha la k'uixenhen sín nchia ntá kjuák'etjaxin ch'ín Jesús chjino tjen tí mesa a. <sup>38</sup> A ntá tí ch'ín fariseo chrakon ch'án k'uíkon ch'án kixin ch'ín

† 11:33 Lucas 8.16

Jesús k'óntihya ch'án tja ch'án senó tí sine ch'án éxí tinkáchónki tí jehe sín. <sup>39</sup> Kjánchó Ìnchéni ntáchro ch'án kixin:

—Jahará fariseorá nchetjóará tí ntója tí vaso la ko tí plato. A ntá nkaxenhen la tsíkaón kjuachee la ko kjuachjinoxínhin. <sup>40</sup> Jahará lontirá. ¿A noahyará kixin tí nkexro kjuích'éna tí ntója la koí tí nkaxenhen kjuích'éna ch'án? <sup>41</sup> Tí chrókjuinchekitonhénrá chojni nòa kaín asánrá tí nkehe chontará la ntá chrókóxakuanhyará tí chrók'ónti chojni o náhí.

<sup>42</sup> 'Nòará jahará fariseorá. Jahará chjehérá Dios ijnko ite parte kaín kaxroan tsjiko tí nkehe sineni. A ntá tahyará kuentá tí nkehe ntoá la ko nkexrí chrótjuèhérá Dios la ko nkexrí chrótjuèhérá kichuárá. Jína chróchjehérá Dios nkehe la ko chrók'uitjayanhyará tí chrókjuínkítsará kichuárá.

<sup>43</sup> 'Nòará jahará fariseorá. Tjinkáonrá ts'ejokjenrá tí silla náxrjón nkaxenhen ninko la ko tjinkáonrá kixin jnkojína tsonixjahará sín tió tsoxétará sín ntsin.

<sup>44</sup> 'Nòará jahará maestro tjàkorá tí ley la ko jahará fariseorá. Ntoáhya tjenkayáxinrá ch'iará. Jahará éxí yóhe tòye tsíxravá chojni tsík'en t'ikonyha chojni la t'atsínka sín nátaón la noehya sín kixin tsíxravá chojni ntiha.

<sup>45</sup> A ntá kjuátehe ijnko tí maestro tjako tí ley ntáchro ch'án kixin:

—Maestro, xikaha ntáchrua la, ¿á kjaxinhya jeheni kaín ni t'ántaxínhínni ní? —ichro sín.

<sup>46</sup> A ntá ntáchro ch'ín Jesús kixin:

—Kjaxin nòará tí jahará tjàkorá tí ley. Tétuènhénrá chojni tsamá sín ijnko nkehe imá

ye chrókjuachahya chojni chrókuamá. A ntá jahará nijnko dedo tjárá chrókjuínkĩtsará tí nkehe imá ye yámá sín.

<sup>47</sup> 'Nòará tí jahará. Ch'énará t̄jat'oe tí sín k'uéchrónka itén Dios ósé tsík'óyán tí sín k'uaxrjeníxinrá. <sup>48</sup> Xíkaha jahará tjákoxinrá kíxin ó nchoxon tí nkehe kjuích'e tí sín k'uaxrjeníxinrá ósé kíxin jehe sín k'óyán sín tí nkexro k'uéchrónka itén Dios ósé. A ntá jahará ch'énará t̄jat'o tí tsíxravá sín.

<sup>49</sup> 'Mé xíkaha Dios chóna kjuaxrexinkaon imá jína ntá ntáchro ch'án kíxin tsochr'án ch'án chojni tsochrónka itén ch'án la ko tsochr'án ch'án chojni tsjikjako itén ch'án. A ntá chojni ts'óyán jnkójín tí jehe sín la ko tsochónkíhi tí í so sín, íchro ch'án. <sup>50</sup> A ntá Dios mé tsjanchia jie tí chojni síin jie kíxin k'uítji ijnié kaín tí sín k'uéchrónka itén ch'án ósé desde tí xrankíxin k'óna chjasintajni <sup>51</sup> la mé xrankíxixín k'uítji ijnié ch'ín Abel la mé kjuixixín k'óyán sín ch'ín Zacarías k'óyánxin sín ch'án jnkosiné tí tjen tí altar la ko tí nínko. Ntá Dios sinchekjasóte ch'án tí sín síin jie kíxin xíkaha ik'uén kaín tí sín a.

<sup>52</sup> 'Nòará jahará maestro tjàkorá tí ley. Jahará tjinkákonhyará kíxin í so chojni tsonohe sín tí nkehe chaxín la ni jahará tjinkákonhyará sinchexiteyará la ko titoéhyará kíxin í so chojni chrókjuinchexiteyá sín —íchro ch'án.

<sup>53</sup> A ntá kjuixin nixja ch'ín Jesús kaín tíha ntá tí sín maestro tjako tí ley la ko tí sín fariseo imá kónínkakohen sín ch'án ntá kjuankíxin sín kjuanchankíhi sín ch'án nchónhya nkehe <sup>54</sup> chrókjuachaxín sín ch'án kíxin ách'e ntoáhya

chrókjuatehe ch'án ntá chrókjuanchia sín jie tí jehe ch'án.

## 12

### *Ch'ín Jesús chrónka kixin ntoáhya ch'e tí sín fariseo*

<sup>1</sup> A ntá nchónhya mil chojni kójnkotsé sín ntá tinkák'íntate kichó sín. Ntá ch'ín Jesús saoxín kjuankixin chénka ch'án tí sín k'uájiko ch'án ntáchro ch'án kixin:

—Chrókuítekákonyará tí nkehe ntoáhya tjenkayáxin tí sín fariseo ch'ia sín, na mé éxí yóhe tí xroan nchek'ánkí niqtja tí nkehe tjako sín.

<sup>2</sup> Kohya nkehe mó jie chrókónoxínhya chr'éxin la ko kohya nkehe tjemá jie chrókónoahya chojni chr'éxin. <sup>3</sup> A ntá kaín nkehe ntáchrorá tí sítié la chr'éxin tsinhin chojni tí nchakotjin; la ko kaín nkehe mó ntáchrorá k'uikjéhérá nchia la chr'éxin ts'èya sín chrítaón nchia tsinhin kaín xín chojni.

### *Nkexro tí chróchrakonhenni* (Mt. 10.26-31)

<sup>4</sup> Jahará chojni chóxin kichó ni mé tjonkará kixin chróchrakuenhyará tí chojni t'óyán tí cuerpo, a ntá chr'éxin la kohya nkehe tsjacha sín chrókjuich'e sín.

<sup>5</sup> Kjánchó tjonkará kixin nkexro chróchrakonhénrá. Chróchrakonhénrá Dios mé tí nkexro tsakitsje kjuachón ntá chóna kjuachaxin tsochr'án chojni tí siín xrohi tsjasótexín sín. Tí nkexro a mé chróchrakonhénrá ch'án má.

<sup>6</sup> ¿Á chrókóxininnya in'ó koxroxé yaá chichaon ntsíntsi? Kjánchó Dios la ts'itjáyenhya ch'án nijnko tí jehe va. <sup>7</sup> Kjonté tí kaxihí chóna ikjárá la nohe ch'án nkekjaín ka chontará. Méxra chrakonhyará

tí jahará ḱixin ǎntsí má tjete sínkí tí jahará. ǎ ntá ḱjónté nchónhya koxroxé la kánhyó sínkí tíha.

*Chróchrónkani ḱixin tinkáchónkini Ìnchéni Jesucristo nkayakon chojni*  
(Mt. 10.32-33; 12.32; 10.19-20)

<sup>8</sup> 'Ntáxrjan kaín tíhi ḱixin tí nkexro tsochrónka ḱixin tinkáchónkina sín nkayakon chojni la ḱjǎxin tí Xjeen Dios K'óna Chojni tsochrónka ḱixin ch́oxin ch'án tí jehe sín nkayakon tí sín ángel kuènte Dios. <sup>9</sup> ǎ ntá tí sín sinchemá sín ḱixin chónhyana sín nkayakon chojni la ntá ḱjǎxian janhan s̄intamá ḱixin chonhya tí jehe sín nkayakon tí sín ángel kuènte Dios.

<sup>10</sup> 'ǎ ntá jnkojín nkexro ts'ántaxính̄in sín tí Xjeen Dios K'óna Chojni naxa jína ts'itjáyan tí jie k'uántaxính̄in sín. ǎ ntá tí nkexro ts'ántaxính̄in tí Nchakuen Dios la xitjahya tsj̄in tí jie tí xikaha tsixro sín.

<sup>11</sup> 'Tió tsjikoará sín nkaxenhen n̄inko Israel la ko tí tjejó tí sín t'et̄oan la ko tí tjejó tí síxreé la tóxakuanhyará nkehe tsjateherá la ko tóxakuanhyará nkehe tsixrorá <sup>12</sup> ḱixin tió tsonixjará la tí Nchakuen Dios sinchexraxinkaonrá nkehe tsixrorá —ichro ch'án.

*Tí kjuaxikaon tsochóna chojni itsjé nkehe*

<sup>13</sup> Ijnko nkexro tjenkákjan tí sin tsíkójnkotsé ntáche ch'án tí ch'ín Jesús ḱixin:

—Maestro, ntáche tí kichó ni a ḱixin tsjanjon ch'án tí nkehe tónhenni tocar tsíkitohe it'éni tsakjani —ichro ch'án.

<sup>14</sup> Ntá kjuátehe ch'ín Jesús ntáchro ch'án ḱixin:

—Lontia jaha. ¿Nkekuènte chrókjuich'énará juez tí janhan chrók'oxikayaha tí nkehe chrókuakjará jahará? —ichro ch'án.

<sup>15</sup> Kjaxin ntáchro ch'án kixin:

—Tóxakonhanrá tí chróchontará itsjé nkehe. Jehya tí nchónhya nkehe chróchontará ntá náxrjón chrók'uejorá —ichro ch'án.

<sup>16</sup> Ntá kjuíncheyóexin ch'án ntáchro ch'án kixin:

—Kjuák'e ijnko chojni rico, a ntá tí nontee ch'án na mé imá k'óna. <sup>17</sup> A ntá tí ch'ín rico kjuenkayáxin ch'án ntáchro ch'án kixin: “¿Nkexrí chrókjuít'a jie kixin chontahya nketí ts'ínkachjina tí noa k'ónana?” ichro ch'án. <sup>18</sup> Ntá kjuenkayáxin ch'án ntáchro ch'án kixin: “Ó nòna nkehe sít'a jie. Ts'oxíka tí t'ínkachjinayá noa chonta ntá sít'ána ijnko antsí jíe ts'ínkachjinayá kaín nkehe k'ónana jie chonta.

<sup>19</sup> Ntá tsontátjan asenná kixin: Asénni, nchónhya nkehe chonta jaha tsíchjina tsjacha nchónhya nánó. Ntá jie t'ók'áha la inte la its'ia la tócháha,” ichro ch'án. <sup>20</sup> Kjánchó ntáche Dios tí jehe ch'án kixin: “Lontia xikaha ichrua la, kixin ijie tie itsi nkexro tsjanchia asán. A ntá tí nkehe kjuásichjina la, ¿xá nkexro kuènte tíha?” ichro ch'án. <sup>21</sup> Mé xikaha tsonhen tí nkexro chóna nchónhya nkehe chjas-intajni ntihi, a ntá naxa kjueyáhya ch'án nkehe kuènte nkaya nkajní —mé ichro ch'ín Jesús.

*Dios mé t'ayakonhen tí xjeen ch'án*

*(Mt. 6.25-34)*

<sup>22</sup> Ntá chr'éxin ntáche ch'ín Jesús tí sín k'uájiko ch'án kixin:

—Tjonkará kixin chrókóxakuanhyará tí nkehe chrókjónterá la ko tí ka chrók'uítsará. <sup>23</sup> Antsí sínkí

tí kjuachón, a ntá tí nkehe chrókjónterà la kánhyó sínkí. La ko antsí sínkí tí cuerpo kuèntará, a ntá kánhyó sínkí tí ka chrók'uítsará. <sup>24</sup> Xrácinkáonrá nkexrí siín tí kontálo. T'enkahya va la ko tjáhya va la ko chóntahya va nketí ts'inkachjinayá va tí noa. Kjánchó Dios la tjanjon nkehe sine va. A ntá jahará la antsí tjetooan, a ntá tí ko xritjaka la kénhyó. <sup>25</sup> ¿Á tjejó jnkojínrá tjenkayáxinrá kíxin tí chrókóxakonhanrá má ntá naxa chrók'uankirá it'o metro ntetoxinrá inaá? <sup>26</sup> A ntá xitjahya chrókjuich'erá tíha kjónté ijnko nkehe ntsí, ¿a ntá nkehe tsonhen tóxakonhanrá í so nkehe siín?

<sup>27</sup> 'Xrácinkáonrá nkexrí sít'ánkí tí catsjo lirio ch'ehya xra la ko tjonhya. Ntá kjónté ntáxrjan kíxin tí ch'ín rey Salomón kaín ka náxrjón k'uék'inkáya ch'án naxa kjuíncheyóehya ch'án kíxin antsí náxrjón tí tsjo a. <sup>28</sup> A ntá xikaha Dios mé nchek'itsa ch'án kaín kayoa kjónté ijie síchón la ntóye tsoche, la mé xikaha tsjanjon ch'án tí nkehe chrok'uítsará jahará. ¿Ntá nkekuènte kíxin naxa titekákonhyará ch'án? <sup>29</sup> ¿Ntá nkekuènte ixrírá tóxakonhanrá xritjéyará nkehe sinterá la ko nkehe its'irá? <sup>30</sup> A ntá tí chojni chjasintajni xritjeyá sín kaín tí nkehe a. Kjánchó It'ará ó nohe ch'án kíxin t'ichjánxinhanrá kaín tí nkehe a. <sup>31</sup> Senó chrókjuéyará tí kjuachaxin kuènte Dios, a ntá jehe ch'án mé tsjanjon ch'án kaín nkehe t'ichjánxinhanrá.

*Tí nkehe tjeje siín nkaya nkajní  
(Mt. 6.19-21)*

<sup>32</sup> 'Chrakonhyará jahará kolélo kuèntana. Kjónté tsjéhyará la It'ará tóxrjínhin ch'án tsotjáhará ch'án



tí kjuachaxin kuènte ch'án. <sup>33</sup> Nchekjirá kaín nkehe chontará la ntá chjeherá tí chichaon tí sín chóntahya. A ntá xikaha s̄ich'erá la tí tjoa t'inka ch̄ichakoanrá tsontaxinhya k̄ixin tí nkehe tjete siín nkaya nkajní tsjejehya la ko ntaha kohya x̄ichee la ko ts'ínhya kué la ko ts'itjáyanhya. <sup>34</sup> A ntá tí nkaya nkajní tsochontará nkehe tjete la ntá tí nkehe tjenkayáxinrá la k̄jaxin ntaha tjen.

*T'ichjánxin listo chrók'uejóchónhenni*

<sup>35</sup> 'T'ichjánxin listo ts'ejochonhénrá la ko tsjak'ekoará xrohi tjeche. <sup>36</sup> Listo chrók'uejorá éxí chojni ch'e x̄ra tjejóchónhen sín tsokjanxin tí lámoe sín tí tsíkótehe chojni k̄ixin tió tsi ch'án la ts'èya ch'án, la ntá tsakitjehe sín tí puerta tjoka. <sup>37</sup> Náxrjón tí nkexro ch'e x̄ra tió chrókjan tí lámoe sín chrók'uikon ch'án k̄ixin naxa tjejótsjehe sín. Ntá chaxín ntáxrjan k̄ixin tí ch'ín lamo ts'etōan ch'án k̄ixin ts'ejótjāxin sín tí tjen mesa ntiha ntá tsjanjon ch'án nkehe sine sín. <sup>38</sup> Kjonté chrókui ch'án k'áxrótjen o chrókui ch'án nantóye mé xikaha chrók'uikon ch'án k̄ixin tjejótsjehe sín la náxrjón tí sín ch'ehe ch'án x̄ra. <sup>39</sup> Chrókónohará tíhi k̄ixin tí chrókónohe tí ìnché nchia nke hora chrókui tí x̄ichee ntá chrókjuak'etsjehe ch'án chrókuítōehya ch'án chrók'uixenhen x̄ichee tí ntōe ch'án chrókueé. <sup>40</sup> Ntá jahará k̄jaxinrá xikaha chrók'uejotsjehérá k̄ixin titàya tsi tí Xjeen Dios K'óna Chojni.

*Tí nkexro jína ch'e x̄ra la ko tí ch'ín ch'ehya x̄ra jína*

*(Mt. 24.45-51)*

<sup>41</sup> A ntá ch'ín Pedro kjuanchankí ch'án k̄ixin:

— Ìnchéni, ¿á jehóni kaín ni kjuincheýóéxian nkehe ntáchrua o kaín chojni? — ichro ch'án.

<sup>42</sup> Ntá ntáchro Ìnchéni kixin:

— ¿Nkexro tí t'etòan tí xrà jína, a ntá tí lámøe ts'etuenhen kixin ts'ayakonhen ch'án tí chojni síin tí nchia ntiha kixin tsjanjon ch'án nkehe sine sín xintii tí hora a? <sup>43</sup> Náxrjón tjen tí nkexro a tió tsi tí lámøe ts'ikon ch'án kixin naxa tjech'e tí xrà. <sup>44</sup> Tíhi mé chaxín tsontáxrjan kixin tí ch'ín lamo tsochjéhe ch'án kaín xrà chóna ch'án ts'etòan tí ch'ín a. <sup>45</sup> A ntá tí ch'ín t'etòan sítónhen xrà tsjenkayáxin kixin tjokahya tsokjan tí lámøe ch'án, a ntá tsjankixin ch'án tsonínkakohen ch'án tsjanjonko ch'án tí í so chojni ch'é xrà, tí chojni ntoa la ko tí chojni chjin, a ntá jehe ch'án sine ch'án la its'i ch'án la tsokòan ch'án. <sup>46</sup> A ntá tí lamo tsokjan tí yaon tjenkayáxinhya tí ch'ín ch'e xrà, na mé ijnko hora noehya ch'án. A ntá imá sinchekjasóte ch'án tí ch'ín kuitòhehe xrà la ntá tsjasóteko ch'án tí sín titekakonhya.

<sup>47</sup> 'A ntá tí nkexro nohe ch'án nkehe tí xrà tjinkaon tí lámøe ch'án la tóxakuenhya ch'án la titekakonhya ch'án la mé tí ch'ín a imá tsjasóte ch'án ts'ekon ch'án. <sup>48</sup> A ntá tí nkexro noehya nkehe tí xrà tjinkaon tí lámøe ch'án ntá ch'e ch'án nkehe chrókjuasótexín ch'án la kjónté kánhyó tsjasóte ch'án ts'ekon ch'án. A ntá tí nkexro k'uáyéhe nchónhya nkehe la antsí tsjé xrà ts'áyéhe ch'án sich'e ch'án; la ko antsí tsjé xrà tsoxranchehe tí nkexro k'uáyéhe itsjé nkehe.

*Jnkokoáhya tsjenkayáxin chojni kixin ó kui Ìnchéni*

*Jesús**(Mt. 10.34-36)*

<sup>49</sup> 'Janhan k'uinka kixin sintak'ákjen xrohi chjasintajni. Ách'e ntáxrjan kixin ó tjechr'ákjen tí xrohi a ntá naxa náhi. <sup>50</sup> T'ichjánxin nchónhya tsona tsjasótena. Tóxakonna tsoxiteyája kaín tíha. <sup>51</sup> ¿Á tjenkayáxinrá kixin k'uinkakian kjuaxróxin tí chjasintajni ní? Méxra ntáxrjan náhi. Jnkokoáhya tsjenkayáxin chojni xikaha. <sup>52</sup> Kixin ijie xrankíxixín in'ó chojni naxa kjéhya jnkokoáhya tsjenkayáxin sín. Tí iní tsonínkakohen tí yaá. Tí yaá tsonínkakohen tí iní. <sup>53</sup> A ntá tí it'é tsonínkakohen tí xjeen ntoá, la ko tí xjeen ntoá tsonínkakohen tí it'é. A ntá tí iné tsonínkakohen tí xjeen chjin, la ko tí xjeen chjin tsonínkakohen tí iné. Tí ich'ee tsonínkakohen tí tikíntee la ko tí tikíntee tsonínkakohen tí ich'ee tjan.

*Tí nkehe chronkaxín nkehe tsonhen**(Mt. 16.1-4; Mr. 8.11-13)*

<sup>54</sup> Ch'ín Jesús kjaxin ntáche ch'án tí chojni siín kixin:

—A ntá ts'ikonrá ts'àya tjuí tí tjiatóxin yaon, a ntá ntáchrórá kixin ts'aniá chrin, a ntá xikaha chaxín tsonhen ts'aniá chrin. <sup>55</sup> A ntá tí chjéhe xrinto nó sur ntá ntáchrórá kixin tsosóa, a ntá xikaha chaxín tsosóa. <sup>56</sup> Jahará ntoáhya tjenkayáxinrá. Ó nohará tjenkayáxinrá nkexrí tsonhen nkajní la ko chjasintajni. ¿Ntá nkexrí naxa tiénxinhyará nkehe sitónhen tí tjejorá jie?

*Chrókóxakohenni kjuaxróxin chrók'uejókoni tí sín nínkakohenni*

*(Mt. 5.25-26)*

57 '¿Nkekuènte tjéyáhyará jahará nkehe tí jína?  
 58 Tí jnkojín nkexro tsjanchia jië sátsjikoará ch'án nkayakon tí sín t'etōan na tí ntĩa ó chrónkakjórá ch'án kixin tsyóoxin ts'ixinhya kjuanínkaon kixin sátsjikoahyará nkayakon tí ch'ín juez, kixin tí ch'ín juez chrók'uetoan ch'án kixin sátsjikoará tí sín comandante. A ntá tí ch'ín comandante chróchr'áxanhanrá ch'án ntōechiso. 59 Ntáxrjan kjá ni chrók'uaxrjéxinhyará ntiha tsjenkajiará kaín xín chichaon chonta.

## 13

*T'ichjánxin chrókuinkí chojni tí nkehe tjenkayáxin sín*

1 A ntá tí yaon k'uejó iso sín chénka sín tí ch'ín Jesús kixin nkexrí kjuích'e ch'ín Pilato k'uetoan its'en iso chojni tsíkjiixin estado Galilea k'uitji ijnié sín kójnkojiéko tí ijnié tí ko k'óyán sín kjuanchexín sín kjuasáyé Dios. 2 A ntá kjuátehe ch'ín Jesús ntáchro ch'án kixin:

—¿Á tjenkayáxinrá kixin xíkaha kónhen tí sín tsíkjiixin estado Galilea kixin antsí jié jië chóna sín, a ntá tí í so sín chjasén sín la á náhí ní? 3 Ntáxrjan tíhi kjá náhí. A ntá jahará tí tjínkíhyará tí tjenkayáxinrá la kaín rá xíkaha its'enrá kjaxin. 4 ¿Á tjenkayáxinrá kixin antsí má k'uéchóna jié tí dieciocho chojni ik'uén xrátja sín tí torre Siloé, a ntá tí í so sín chjasin Jerusalén la á náhí ní? 5 Ntáxrjan tíhi kjá náhí. A ntá jahará tí tjínkíhyará tí tjenkayáxinrá la kaín rá xíkaha ts'itjayanrá kjaxin.

*Ch'ín Jesús kjuíncheyóexin ch'án éxí ijnko nta to higo t'ónahya to*

<sup>6</sup> A ntá ch'ín Jesús kjuíncheyó<sub>exin</sub> ch'án ntáchro ch'án kixin:

—Ijnko chojni chón<sub>ta</sub> ijnko nta to higo nónt<sub>ee</sub> ch'án. Ntá sákjuítsjehe ch'án á k'óna to. A ntá náhi k'uitjahya ch'án ninkehó to. <sup>7</sup> Ntá ntáche ch'án tí nkexro t'ayakonhen tí nonte a kixin: “Ó ní nánó t'inkatsjahá tí nta la k'uitjáhya ninkehó to higo. T'ochrínjian tí nta kixin tsoxéhe tí nonte a.” <sup>8</sup> A ntá tí ch'ín t'ayakonhen nonte kjuátehe ch'án ntáchro ch'án kixin: “Áxri, títóhé ijie nánó kixin s<sub>intantá</sub> nche la ko tsjiko nchekatjehe. <sup>9</sup> A ntá tí xikaha ách'e ts'óna to. A ntá tí náhi na ntá ts'ochrínjian chr'é<sub>xin</sub>.”

*Ch'ín Jesús kjuínchekitohe jína ijnko tjan níhi tí yaon t'ok'éhe chojni*

<sup>10</sup> Ch'ín Jesús kjuák'e ch'án ijnko n<sub>inko</sub> kjuakox<sub>in</sub> ch'án ijnko yaon t'ok'éhe chojni. <sup>11</sup> Ntiha tjan ijnko chojni chjin chón<sub>ta</sub> dieciocho nánó chonta tjan ijnko nchak<sub>uen</sub> tí jínahya kjuíncheníhi tjan tjesékoá tjan xitjahya xrentoá tjan. <sup>12</sup> A ntá ch'ín Jesús k'uíkon ch'án kixin xikaha tjan tjan ntá k'uíyeh<sub>e</sub> ch'án tjan ntáchro ch'án kixin:

—Naná, ó kjuínhan tí chin chonta —ichro ch'án.

<sup>13</sup> A ntá jehe ch'án kjuak'etja tja ch'an chrítaón tí jehe tjan a ntá tuénx<sub>in</sub> xrentoá tjan ntá chjéhe tjan kjuasáyé Dios. <sup>14</sup> A ntá tí ch'ín t'etoan kuènte n<sub>inko</sub> kónínkaon ch'án kixin ch'ín Jesús kjuínchekitohe jína ijnko chojni ijnko yaon t'ok'éhe sín, ntá ntáche ch'án tí chojni a kixin:

—Síin injon yaon mé chrókónhen xra chrók'uinkará chrókuítóhará jína na jehya tí yaon t'ok'éheni chrókónhen tíha —ichro ch'án.

15 **A** ntá Ìnchéni kjuátehe ch'án ntáchro ch'án kixin:

—Ntoáhya tjenkayáxinrá jahará. ¿Á chrókjuasintankeehyará tí koxintaará la o tí kolóchoará chrókjuikoará va ntá tí yaon t'ok'éheni ní? 16 **A** ntá tí tjan mé tsík'axrjeníxin tí ch'ín Abraham na mé ó chóna dieciocho nánó tsíkjinchenteto ch'ín Tsochren tí jehe tjan, ¿á jehya jína kjaxin chrókjuasintanká tí nkehe tsíkóntetoxín tjan tí yaon t'ok'éheni? —ichro ch'án.

17 Ntá xikaha ichro ch'ín Jesús la ntá kaín tí sín kónínkakohen ch'án la kósuèhe sín. **A** ntá kaín tí chojni siín ntaha chéhe sín k'uíkon sín kaín tí kjuaxroan jíe kjuakoxin tí jehe ch'án.

*Kjuíncheyóexin ch'ín Jesús éxi ijnko tje ntsí kuènte nta mostaza*

*(Mt. 13.31-32; Mr. 4.30-32)*

18 Ntá ntáchro ch'ín Jesús kixin:

—¿Nkehe tóyóexin tí t'etóan Dios tí kjuachaxin kuènte ch'án la ko nkehe jína chrókjuintayóaxian?

19 Éxi yóhe ijnko tje kuènte nta mostaza k'uénka ijnko chojni nontee ch'án. **A** ntá tió k'uánkí kóyóhe éxi ijnko nta jíe. **A** ntá tí koxroxé xritjaká mé kui va kjuích'éna va kaké va chrík'á tí chaon tí nta.

*Ch'ín Jesús kjuíncheyóexin éxi tí xroan t'ánkíxin niotja*

*(Mt. 13.33)*

20 Ntá ntáchro ch'ín Jesús ínaá kixin:

—¿Nkehe chrokjuintayóaxian tí t'etóan Dios tí kjuachaxin kuènte ch'án? 21 Éxi yóhe tí xroan nchek'ánkí niotja kjuinkíjanxin ijnko chojni chjin iní medida harína. **A** ntá tí ch'o la k'uánkí.

*Tí puerta tekahya*  
(Mt. 7.13-14, 21-23)

<sup>22</sup> K'uaátsínka ch'ín Jesús kaín chjasin hyé la ko kaín chjasin ntsíntsi nkákjako ch'án tí tan jína kixin jehe ch'án ó sátsji ch'án chjasin Jerusalén. <sup>23</sup> A ntá ijnko nkexro kjuanchankí ch'án kixin:

—Inchéni, ¿á tsjéhya tí sín tsaá? —ichro ch'án.

A ntá jehe ch'án kjuátēhe ch'án ntáchro ch'án kixin:

<sup>24</sup> —Tóxakonhanrá t'ixēenxínrá tí puerta tekahya kixin nchónhya sín tjinkaon sín chrók'uixenhen sín, kjánchó tjachahya sín. <sup>25</sup> A ntá tí inché nchia ts'ikjéhe ch'án tí puerta. A ntá chr'éxin jahará ts'ejorá ntója ts'èyará ts'inkará tí puerta tsontáchrora kixin: “Tadá, takítjehé nchia”, tsixrorá. Kjánchó jehe ch'án tsjatehe ch'án tsontáchro ch'án kixin: “Nonahya nketí k'uinkaxínrá jahará”, tsixro ch'án. <sup>26</sup> A ntá tsjankixinrá tsontáchrora kixin: “Kjóneni la ko k'uíni jnkokoá la ko jaha kjuákoxian tí ntasjinni”, tsixrorá. <sup>27</sup> A ntá jehe ch'án tsjatehe ch'án tsontáchro ch'án kixin: “Ó ntáxrjan janhan kixin chonhya tí jahará. Títōherá tí janhan sájtirá ókjé kaín tí jahará jínahya kjuich'erá.” <sup>28</sup> Ntaha tsotsjankará la ko sintetaónrá nénorá tió ts'ikonrá kixin ch'ín Abraham la ko ch'ín Isaac la ko ch'ín Jacob la ko kaín tí sín k'uéchronkaxín itén Dios mé tjejó sín tí tjen Dios t'etōan ch'án, a ntá jahará la ts'axrjéxinrá ntója ntiha. <sup>29</sup> Tsjixin chojni nó tjitōxin yaon la ko nó tjiátōxin yaon la ko nó norte la ko nó sur ntá ts'ejótjāxin sín tí tjen Dios t'etōan ch'án la sine sín. <sup>30</sup> A ntá iso tí sín k'uítuenhen senó

la mé ts'et̩oan sín, la ko iso tí sín k'uék'et̩oan senó  
la mé ts'ítuenhen sín.

*T'ává ch'ín Jesús*  
(Mt. 23.37-39)

<sup>31</sup> A ntá tí yaon a ikui iso sín fariseo ntáche sín tí  
ch'ín Jesús kixin:

—Sátjixian ntihi kixin ch'ín Herodes tjinkaon  
chrók'óyán ch'án tí jaha —ichro sín.

<sup>32</sup> A ntá jehe ch'án kjuát̩ehe ch'án ntáchro ch'án  
kixin:

—Sátjirá chenkará tí ch'ín jínahya ch'ia kixin:  
“Tjie la ko ntóye tsakítsje nchakuen tí jínahya la ko  
sintakit̩oha chojni níhi jína la ntá tí níxin yaon a  
ntá tsjixinna tí xra kuènt̩ana,” tsixrorá. <sup>33</sup> Kjánchó  
t'ichjánxin kixin naxa sátjija tí jie yaon la ko ntóye  
la ko tí yaon chr'éxin kixin t'ichjánxin kixin ijnko  
nkexro chrónka itén Dios chrók'uenxín ch'án ch-  
jasin Jerusalén.

<sup>34</sup> 'Jerusalén, Jerusalén. Jahará t'oyánrá tí sín  
tjako itén Dios la chjehérá xro tí sín ichr'án ch'án  
ikui chrókjuínk̩tsará. Imá itsjé veces tjínk̩avan  
chrókójnkotsérá la chrók'uáyakonhanrá éxí ijnko  
cochíká mé t'ayakonhen xjeen va chrínkí kanenee  
va mé xikaha tjínk̩avan chrók'uáyakonhanrá tí ja-  
hará. Kjánchó jahará la tjínk̩akonhyará xikaha.  
<sup>35</sup> Chrókónohará kixin Dios la tsít̩ohe ch'án tí  
jahará la ts'ikonhyará tí janhan tsjixrakájia tí  
yaon tsontáchrórá kixin: “Jína tí nkexro kjuix̩in  
kjuachaxin ihnié Ìnchéni Dios.”



## 14

*Ch'ín Jesús kjuínchekitōhe jína ijnko nkexro tsík'atjoyé kuenté*

<sup>1</sup> A ntá tí yaon t'ok'éhe sín sákjuí ch'ín Jesús ntoe ijnko ch'ín fariseo t'etoan kixin ntaha sineko sín ch'án. A ntá tí í so sín fariseo tinkáchréhe sín tsotsjehe sín nkehe sich'e ch'án. <sup>2</sup> A ntá ntiha ntoí chók'èxin tí tjen ch'án itjen ijnko chojni tsík'atjoyé kuenté. <sup>3</sup> A ntá ch'ín Jesús kjuanchankíhi ch'án tí sín maestro tjako tí ley la ko tí sín fariseo kixin:

—¿A síin kjuachaxin sinchekitōheni jína ijnko chojni níhi tí yaon t'ok'éheni o náhi? —ichro ch'án.

<sup>4</sup> A ntá jehe sín la tání sín. A ntá ch'ín Jesús sákjuíko ch'án tí ch'ín níhi la kjuínchekitōhe ch'án jína la k'uetuenhen ch'án kixin sátsji ch'án. <sup>5</sup> A ntá ntáche ch'án tí sín fariseo kixin:

—Jnkojín tí jahará chontará kolóchoará o koxintaará chrókjuítsínkáya va tòye ¿á senóhya chrókuakítsjetaónrá va tòye kjónté yaon t'ok'éheni ní? —ichro ch'án.

<sup>6</sup> A ntá jehe sín ninkehó kjuátēhya sín kixin xikaha ichro ch'án.

*Tí sín tsík'iyēhe sín sátsji sín kia tsíkótehe chojni*

<sup>7</sup> Ntá k'uíkon ch'ín Jesús kixin tí sín tsíkóchjina tí kia a kjueyá sín silla náxrjón ts'ejóya sín tí tjen mesa ntá kjuíncheyōexin ch'án ntáchro ch'án kixin:

<sup>8</sup> —Tió jnkojín nkexro ts'iyaha sín kixin tsjasán ijnko kia tsotehe chojni la tjéyáhya tí nta silla kuente tí sín t'etoan kixin ách'e tsi jnkojín nkexro antsí t'etoan <sup>9</sup> a ntá tí nkexro k'uíyahará yóirá itsi ch'án tsjanchará ch'án kixin t'inkátjēxian tí tjen jaha méhe kixin ntaha tsjak'e í jnko nkexro,

tsixro ch'án. Ntá tsosuàha sátsjia tsjak'etjaxian tí silla kjuixixín. <sup>10</sup> Íchá jína tió t'iyaha sín chrókjuak'etjaxian tí silla tjetuanhya, kixin ntá chrókui tí ch'ín tsík'iyaha tsontáchro ch'án kixin: “Jína tjoni la t'atsínka tjak'etjaxian tí silla antsí náxrjón”, kixin ntaha tsjikosáyaha sín nkayakon kaín tí sín ts'ejótjaxinkoa sín ntiha. <sup>11</sup> Kixin tí nkexro sinchehnkehe asén kixin imá chrók'uetoan ch'án la mé chr'éxin Dios tsjanjonhya kjuachaxin kixin ts'etoan ch'án. A ntá tí nkexro k'uek'etoanhya la mé chr'éxin Dios tsjanjon kjuachaxin kixin antsí ts'etoan ch'án.

<sup>12</sup> Kjaxin ntáche ch'án tí nkexro tsík'iyehe ch'án kixin:

—Tió tsjásian kia it'o yaon la o tsonjin la t'iyeéhya tí sín choxian la ko tí sín kíchuá la ko tí sín náxa kjéhya la ko tí sín rico chjino ntoa, kixin jehe sín la chr'éxin ts'iyaha sín ínaá la xíkahó la ó kjuixin kjan tí k'uiyéhé sín. <sup>13</sup> Íchá jína chrók'uiyéhé tí sín nòa la ko tí sín tsíxénká toté sín la ko tí sín xitjahya tji la ko tí sín t'ikonyha. <sup>14</sup> Ntá chrókócháha jaha kixin jehe sín xitjahya ts'iyaha sín tsjasin sín kia. A ntá tió tsoxechónjian tí sín jína la mé Dios mé tsjenkaha kixin kjuínkitsa tí jehe sín.

*Ch'ín Jesús kjuíncheyóexin ch'án éxí ijnko kia jié*

<sup>15</sup> A ntá kuínhin ijnko tí sín tjejótjaxin sín chjino tí mesa, a ntá ntáche ch'án tí ch'ín Jesús kixin:

—Náxrjón tí sín sine niotja tí tjen Dios t'etoan ch'án —ichro ch'án.

<sup>16</sup> Ntá ntáchro ch'ín Jesús kixin:

—Ijnko chojni kjuasin ijnko kia jié ijnko kónjín la k'uiyéhe ch'án nchónhya chojni tsi sín tí kia

a. <sup>17</sup> A ntá ó kuichjina tí hora sine sín ntá k'uetuēnhen ch'án ijnko chojni ch'ehe ch'án xra tsjichenka ch'án kaín tí sín ó tsík'iyehē ch'án kixin chrókóchjina sín kixin ó tjejóchónhen kaín nkehe sine sín. <sup>18</sup> Ntá kaín sín kjuankixin sín chrónòa sín kixin xitjahya tsjiji sín sine sín. A ntá tí ch'ín saoxín kjuítsjehe ch'án ntáchro ch'án kixin: “Na ntá k'ueñani ijnko ñontēni la t'ichjánxin tsjitsjeheni la xitjahya tsjijini tí t'iyehēni ch'án, ntá chénka ch'án kixin chrókónínkakuenhyani ch'án”, ichro ch'án. <sup>19</sup> A ntá í jnko ch'ín ntáchro ch'án kixin: “Na ntá k'ueñani in'ó yunta koxinta, a ntá t'ichjánxin tsotsjeheni á jína ch'e va xra, ntá chénka ch'án kixin chrókónínkakuenhyani ch'án”, ichro ch'án. <sup>20</sup> A ntá í jnko ch'ín ntáchro kixin: “Na ntá kóteheni, méxra xitjahya tsjijini”, ichro ch'án. <sup>21</sup> Ntá ó kjan tí ch'ín ch'e xra chénka ch'án tí ch'ín lámo kaín tí nkehe tsintáchro sín. A ntá tí ch'ín lámo kuínhin ch'án xikaha la ntá kónínkaon ch'án ntá ntáche ch'án tí ch'ín ch'ehe ch'án xra kixin: “Tjoka sátjia kaín ntia chjasin i la tsjiko ntihi tí sín ñòa la ko tí sín tsixénká toté sín la ko tí sín xitjahya tji la ko tí sín t'ikonhya”, ichro ch'án. <sup>22</sup> A ntá chr'éxin ntá kjan tí ch'ín ch'e xra chénka ch'án tí lámo kixin: “Ó kjuínchexiteyáni xikaha kuétuēnhēni la kjónté ñaxa xranka chrókui chojni”, ichro ch'án. <sup>23</sup> A ntá tí ch'ín lámo ntáche ch'án tí ch'ín ch'ehe ch'án xra kixin: “Sátjia kaín ntia jíe la ko kaín ntia ntsí la tétuēnhén chojni síin chrókui sín chrók'uixixenhen nchia ñona ñaxa xranka. <sup>24</sup> Kixin ntáxrjan kixin nijnko tí sín k'uíyahā senó chrókui sín chrókjone sín tí nkehe chrótjahā sín”, ichro ch'án.

### *Ixra tsochréheni Cristo*

<sup>25</sup> Nchónhya chojni nkáchréhe sín tí ch'ín Jesús, ntá jehe ch'án kuinkátjía ch'án kotónhen ch'án ton ch'án ntáchro ch'án kixin:

<sup>26</sup> —A ntá jnkojín chojni tsochréhe tí janhan la antsí má tjetōan chrótjuana sín la kjónté kénhyó chrótjuèhe it'é sín la ko ìné sín la ko ichjién sín la ko xjeen sín la ko kichó sín ntoa la ko kichó sín chjín la ko kjónté kénhyó chrótjuèhe asén sín. A ntá náhí la xitjahya ts'óna discípulo kuèntana jehe sín. <sup>27</sup> Tí nkexro tsamáhya tí ntacruz kuènte sín tsochrèhya sín tí janhan la xitjahya ts'óna discípulo kuèntana. <sup>28</sup> A ntá jnkojín tí jahará chrókjuich'énará ijnko tjat'o nteto, ¿á senóhya chrókjuenkayáxinrá kixin nkekjaín chichaon ts'ichjánxin ts'ixenhen chrótsjehérá á nchoxon chrókjuixixín chrók'ónaxín tí tjat'o a? <sup>29</sup> A ntá tió tsjankixinrá sich'énará tí tjat'o ntá chr'éxin xitjahya tsjixin sich'énará, ntá kaín chojni ts'ikon sín tsjanoará sín <sup>30</sup> tsontáchro sín kixin jaha kjuankíxian kjuich'éna, a ntá jie xitjahya sinchekjixian ts'óna, tsixro sín. <sup>31</sup> A ntá jnkojín tí ch'ín rey t'etoan tsjanjonko í jnko rey t'etoan kjaxin násenó chrókjuenkayáxin ch'án kixin ite mil soldado chóna ch'án, á chrókjuacha ch'án chrókjuachaxin ch'án tí kán mil soldado chóna tí í jnko ch'ín t'etoan. <sup>32</sup> A ntá ti chrókjuachahya ch'án chrókjuanjonko ch'án tí í jnko ch'ín rey, ntá naxa ikjín tjen ch'án la íchá jína chróchr'án ch'án ijnko nkexro tsochronóehe ch'án kixin chrók'uxinhya kjuanínkaon. <sup>33</sup> Mé xikaha jnkojín tí jahará tí tsjtoéhyará kaín nkehe ntoáhya tjenkayáxinrá xitjahya ts'óna discípulo kuèntana.

*Tí xíjnta tsík'ánkéhé tí jní*

*(Mt. 5.13; Mr. 9.50)*

<sup>34</sup> 'A ntá jína tí xíjnta, kjánchó tí chrók'uánkéhé tí jní la ntá xitjahya chrókójní inaá. <sup>35</sup> Ntá tí xíkaha la ní tí nche xitjahya tsjiko la chrók'ónahya nkehe la chrok'uitjini ntója. Tí nkexro tjinkaon chrókuinhin la chrókuinhin kaín tíhi —ichro ch'in Jesús.

## 15

*Kjuíncheyóexin ch'in Jesús éxí ijnko kolélo tsík'itjáyan*

*(Mt. 18.10-14)*

<sup>1</sup> Kaín tí sín nchekjènkj la ko tí sín chóna nchónhya jie kóchjinehe sín tí ch'in Jesús kixin tjinkaon sín chrókuinhin sín tí nkehe tjechronka ch'án. <sup>2</sup> 'A ntá tí sín fariseo la ko tí sín maestro tjako tí ley kjuankíxin sín tjonta sín ch'án ntáchro sín kixin:

—Tí ch'in i la kjónté tí sín chóna nchónhya jie la t'ito ch'án la ko neko ch'án —ichro sín.

<sup>3</sup> Ntá ch'in Jesús kjuíncheyóexin ch'án ntáchro ch'án kixin:

<sup>4</sup> —'A ntá jnkojín tí jahará, tí chontará ijnko ciento kolélo ntá chrók'uitjáyan ijnko va, ¿á chrókuítóéhyará tí noventa y nueve va tí nteje ó, a ntá á chrókjuíkjéyáhyará tí ko tsík'itjáyan hasta chrók'uitjájará va ní? <sup>5</sup> 'A ntá tí ts'itjára va ntá tsamára va tsocháhará. <sup>6</sup> Ntá tió tsokjanrá ntóará ntá ts'iyehérá kaín tí sín choxinrá tjóra jína la ko tí sín chjinaxón ntóará ntá tsontácherá sín kixin: “Tsochéheni ts'ejóni jie kixin ó k'uitjá tí kolélo tsík'itjáyan.” <sup>7</sup> Na mé kjaxin xíkaha tsotjonkará kixin antsí tsochéhe kaín tí sín siín nkaya nkajní tió

ijnko chojni tsítóhe kaín tí jie tsíkjenkayáxin ch'án. Ntá kánhyó tsochèxin tí sín nkaya nkajní kixin tí noventa y nueve chojni jína t'ichjánxienhya chrókjuinkí sín tí nkehe tjenkayáxin sín.

*Kjuíncheyóexin ch'án éxí chichaon k'uitjayan*

<sup>8</sup> A ntá ijnko chojni chjin chóna ite chichaon, a ntá tí chrókjuinçek'itjayan tjan ijnko tí chichaon a la, ¿á chrókjuinçek'ákjenhya tjan xrohi kixin chrókjueyáxin tjan la ko chrok'uánjón tjan tí nchia kixin chrótsjehe tjan jína hasta chrók'uitjajia tjan? <sup>9</sup> A ntá tió chrók'uitja tjan la ts'iyehé tjan kaín tí chojni chjin jína tjo tjan la ko tí sín chjinaxón ntøe tjan la ntá tsontáche tjan sín kixin: “Tsochéhèni ts'ejóni kixin ó k'uitjani tí chichaon kjuínçek'itjayanni.” <sup>10</sup> Ntá kjaxin xikaha tsotjonkará kixin imá tsochéhe kaín tí sín ángel kuènte Dios tió ijnko chojni tsítóhe kaín tí jie tsíkjenkayáxin ch'án.

*Ch'ín Jesús kjuíncheyóexin ch'án éxí ijnko ch'ín kuicháxinhin chichaon*

<sup>11</sup> Kjaxin ntáchro ch'ín Jesús kixin:

—Ijnko nkexro chóna yaá xjeen ch'án. <sup>12</sup> A ntá tí ch'ín tsoyo ntáche ch'án tí it'é ch'án kixin: “It'éni, chjehéni kaín nkehe chróchjehéni.” A ntá tí it'é sín k'óchrít'øhe ch'án tí nkehe chóna ch'án. A ntá tí ch'ín tsoyo k'uáyéhé tí nkehe kuènte ch'án. <sup>13</sup> A ntá kánhyó tsjé yaon chr'éxin tí xjeen ch'án tsoyo kjuínçekji ch'án kaín nkehe tsík'áyéhé ch'án, ntá sákjuíko ch'án tí chichaon sákjuí ch'án ókjé chjasin kjín. A ntá ntiha kjuínchexénhen ch'án kaín chichaon chóna ch'án kixin jehya tí jína kjuích'e ch'án. <sup>14</sup> A ntá tió kjuixin kjuèhe ch'án tí

chichaon kuicháxinhin ch'án ntá xrínghya kókjinta tí chjasin ntiha ntá kohya nkehe sine kaín sín. A ntá jehe ch'án kjuankíxin ch'án t'énxín ch'án kjinta. <sup>15</sup> Ntá jehe ch'án sákjuíkjoyá ch'án xrā sich'e ch'án. Ntá chjasin ntaha tjen ijnko ch'ín kjuanchehe ch'án xrā. Ntá tí ch'ín a kjuanjon ch'án xrā ntá k'uetōan ch'án kíxin sátsji ch'án nontēe ch'án kíxin ntiha ts'ayakonhen ch'án cochíno. <sup>16</sup> A ntá jehe ch'án t'énxín ch'án kjinta ntá tjinkaon ch'án chrókjóne ch'án tí nkehe ine tí cochíno kíxin ninkexró tí ntiha chrohya tsjanjon nkehe sine ch'án. <sup>17</sup> Ntá jehe ch'án kjuák'e ch'án kjuenkayáxin ch'án kíxin: “Nchónhya chojni síin ntoe t'aná ch'e sín xrā la chóna sín nkehe sine sín. Ntá janhan tjet'énxian kjinta ntihi. <sup>18</sup> Ntá jie tsokjan tí tjen t'aná la ntá tsontáxrjan kíxin: It'éni, kjuasinni jie kuítekakuenhya It'éni nkaya nkajni la ko kjuasinhanni jie kuítekakuanhyani tí jaha. <sup>19</sup> Tósuèheni tsontáchrúa kíxin xjaan tí jeheni. Ch'énani éxi ijnko chojni t'aha xrā”, mé xikaha kjuenkayáxin ch'án tsontáchro ch'án. <sup>20</sup> Ntá kuákja ch'án ntia xrakoa ch'án tí ntoe it'é ch'án.

'A ntá kjónté naxa kjín kui ch'án a ntá tí it'é ch'án la ó tsík'ikon ntá kuikonóhe ch'án tí xjeen ch'án. Ntá kuinká ch'án la kjuíxinhin ch'án ntia la kjóa ch'án la ko kjóneko ch'án kochíto. <sup>21</sup> Na ntá ntáchro tí xjeen kíxin: “It'éni kjuasinni jie kuítekakuanhyani Dios la ko kjuasinhanni jie kuítekakuanhyani tí jaha. Tósuèheni tsontáchrúa kíxin xjaan tí jeheni”, ichro ch'án. <sup>22</sup> A ntá tí it'é ch'án k'uíyehē ch'án tí sín ch'ehe ch'án xrā ntáchro ch'án kíxin: “Xrákoará tí ka auntsí jína nchek'inkáyará ch'án la ko

chr'axenhenrá dedo tja ch'án ijnko koch'aninko la ko nchekjankará ch'án totjoa. <sup>23</sup> La ko tjičakjínrá koxintáxjan tsanká la t'oyánrá va kixin sinekoni ch'án tsjasinhinni ch'án kia. <sup>24</sup> Kixin tí xjanna i la éxí ó tsík'en ch'án xikaha ntá jie la éxí ó xechón ch'án la tsík'itjáyan ch'án la ntá jie la ó kónoxín ch'án ínaá”, ichro ch'án. Ntá kjuankixin sín kjuasin sín kia.

<sup>25</sup> 'A ntá tí xjeen ch'án sao la nonte tjech'e ch'án xra. A ntá tió kjan ch'án kui ch'án chjinxón nchia ntá kuínhin ch'án síin són la ko ité sín. <sup>26</sup> Ntá k'uíyehé ch'án ijnko ch'ín ch'e xra ntá kjuanchankíhi ch'án kixin nkekuènte xikaha sitónhen. <sup>27</sup> A ntá tí ch'ín a ntáchro ch'án kixin: “Kíchuá la ó tsíkjan. A ntá it'á la k'uetóan k'uén koxintáxjan tsanká kixin jína xíkjan ch'án”, ichro ch'án. <sup>28</sup> A ntá tí ch'ín sao la kónínkaon ch'án chrohya ch'án ts'ixenhen ch'án nchia. A ntá tí it'é ch'án k'uaxrjexín nchia chronóehé ch'án kixin chrók'uixenhen nchia. <sup>29</sup> Kjánchó jehe ch'án kjuátehe ch'án ntáche ch'án it'é ch'án kixin: “Nchónhya nánó t'ahani xra, la xráxín kuítekakonhanni kaín nkehe kuétóan la kjuánjonhya nijnko kotèntso chrókjónekoni tí sín chóxinni. <sup>30</sup> A ntá jie ikui tí xjaan i kjuínchek'itjáyan ch'án kaín nkehe chjehé ch'án kjuínchek'itjáyanxín ch'án chojni chjin. A ntá jie ikjan ch'án la naxá t'oyán koxintáxjan tsanká”, ichro ch'án. <sup>31</sup> A ntá ntáchro tí it'é ch'án kixin: “Xjeenni jaha, xráxín tjejóko kichó ni ntihi. Kaínxín nkehe kuéntana la kuénta jaha kjaxin. ¿Nkekuènte ninkávan? <sup>32</sup> A ntá jie la t'ichjánxin tsjasinhinni kíchuá kia tsochéheni kixin éxí tsík'en ch'án la ntá jie la ó tsíxechón, la



tsík'itjáyan ch'án xikaha la ntá jie la kónoxín ch'án ínaá.”

## 16

*Ch'ín Jesús kjuíncheyóexin ch'án éxí tí ch'ín k'uáyéhe xra la ntá kjuích'ehya xra jína*

<sup>1</sup> Kjaxin ntáche ch'ín Jesús tí sín k'uájiko ch'án kixin:

—Kjuák'e ijnko ch'ín lamó ricó chóna ch'án ijnko nkexro chjéhe ch'án kjuachaxin kixin ts'etoan tsonhen xra. Ntá kui ijnko nkexro chénka tí lamó kixin: “Tí nkexro t'etoan nchexénhen ch'án tí nkehe chonta”, ichro ch'án. <sup>2</sup> A ntá tí ch'ín lamó k'uíyehé ch'án tí ch'ín ch'ehe ch'án xra ntáche ch'án kixin: “¿Á chaxín xikaha ch'e kixin xikaha ichro sín? A ntá jie tsjánjuan jaha kuentá tí xra kjuích'e kixin ijie í sich'ehya xra tsétoan ntihi”, ichro ch'án. <sup>3</sup> A ntá tí ch'ín t'etoan tónhen xra kjuenkayáxin ch'án kixin: “¿Nkehe chrókjuít'a jie kixin tí lamó la í tsjanjonhya ch'án xra sít'a? La ko janhan la chontahya fuérza sít'a xra nontee chojni la ko tósuàna kixin chrók'uájia chrókjuánchák'á nkehe. <sup>4</sup> Ó nòna nkehe sít'a kixin ntá tsochonta nkexro tsjanjon kjuachaxin tsjak'é ntøe sín tí í tsochontahya xra sít'a”, ichro tí ch'ín t'etoan. <sup>5</sup> Ntá k'uíyehé ch'án jnkojnko jnkojnko tí sín síkéhe tí lámøe ch'án. A ntá tí ch'ín sao kui ntá tí ch'ín t'etoan mé kjuanchankíhi ch'án kixin: “¿Nkekjain tjasikéhé lámøéni?” ichro ch'án. <sup>6</sup> A ntá jehe ch'án kjuátehe ch'án ntáchro ch'án kixin: “Síkani ijnko ciento ntabarril aceite”, ichro ch'án. A ntá tí ch'ín t'etoan ntáchro ch'án kixin: “Ntihi tjen xroon tsjénkaxian a. Tjak'e nonte tjoka la ch'éna í jnko xroon la í

cincuenta ó ténixián”, ichro ch'án. <sup>7</sup> Ntá chr'éxin la kjuanchankíhi ch'án í jnko nkexro kíxin: “A ntá jaha, ¿nkekjaín tjásiká?” ichro ch'án. Ntá ntáchro ch'án kíxin: “Ijnko ciento medida noatrigo síkání”, ichro ch'án. A ntá ntáchro tí ch'ín t'etōan kíxin: “Tí xikaha la ntihi tjen tí xroon tsjénkaxian. A ntá jie la ch'éna ochenta ó”, ichro ch'án. <sup>8</sup> A ntá tí ch'ín lamó kjuátsōan ch'án kíxin kjónté jehya xra jína kjuích'e tí ch'ín t'etōan kjuích'ehe ch'án xra la kjánchó tí kjuích'ia ch'án la antsí nohe ch'án kjuích'ia ch'án. Méxra tí sín chjasintajni antsí nohe sín ch'iyehé kichó sín, a ntá tí sin ixri tí t'inkaséyan la xikahya chrókjuenkayáxin sín chrókjuich'ia sín, chrókjuenkayáxin sín tí jína.

<sup>9</sup> 'Janhan la tétuanhanrá kíxin chrókuicháxinhanrá tí chichaon siín chjasintajni kjónté tjuáhya kíxin tsjínkĩtsará chojni kíxin ntá itsjórá sín jína. A ntá tió tsjeje kaín chichaon ntá jehe sín ts'ejóchónhen sín nkaya nkajní ts'áyáhará sín jnkochríxín.

<sup>10</sup> Tí nkexro k'uáyakonhen tí nkehe chóna kjónté tsjéhya la kjaxin chrókjuacha chrók'uáyakonhen itsjé nkehe chróchóna. A ntá tí nkexro kjuachahya k'uáyakonhen tí nkehe tsjéhya chóna la kjaxin chrókjuachahya chrók'uáyakonhen tí tsjé nkehe chróchóna ch'án. <sup>11</sup> Mé xikaha tí xitjahya t'ayakonhénra tí chichaon kuènte chjasintajni ntihó la, ¿ntá nkexrí chrók'uayéhérá nkehe tjete chaxín kuènte nkaya nkajní? <sup>12</sup> Mé xikaha tí kjuachahyará k'uáyakonhénra tí chichaon kuènte ókjé nkexro, ¿ntá nkexro chrótjáhará jahará tí nkehe chaxín tjete chrók'uáyakonhénra?

13 'Nijnko nkexro xitjahya sich'ehe yaá lamó xra kixin ijnko la tsonínkakonhen ch'án la ko tí í jnko tsotjuèhe ch'án, o ijnko la tsitekakonhen ch'án, la tí í jnko la tsitekakuenhya ch'án. Xitjahya chrókjuich'ehe chojni xra Dios tí tjinkaon sín tsochónta sín itsjé chichaon —ichro ch'án.

14 A ntá tí sín fariseo imá kóxrjínhin sín chichaon, ntá kuínhin sín kaín tíha nkerí ichro ch'ín Jesús, ntá kjuanoá sín ch'án. 15 Na ntá ch'ín Jesús ntáche ch'án sín kixin:

—A ntá jahará tjinkáonrá chrók'uejóxínrá jína nkayakon chojni. A ntá Dios la chóxin ch'án asánrá. A ntá tí nkehe imá tóxrjínhin ch'e chojni la Dios la tóxrjénhya ch'án.

*Tí ley la ko tí t'etoan Dios tí kjuachaxin kuènte ch'án*

16 'Naxa kjuakohya ch'ín Juan la k'uékjako sín tí ley kuènte ch'ín Moisés la ko tí nkehe k'uékjin tí sín k'uéchronka itén Dios ósé. A ntá kui ch'ín Juan la chrónka ch'án tí tan jína nkexrí ts'etoan Dios tí kjuachaxin kuènte ch'án ntá kaín chojni imá tjinkaon sín chrókjuacha sín chrók'uejój sín tí tjen Dios t'etoan ch'án.

17 'Antsí xrahya chrók'uitjáyán tí nkehe síin nkajní la ko chjasintajni. A ntá xitjahya kixin chróxiteyáhya kjónté ijnko nkehe ntsí t'etoan tí ley.

*Ch'ín Jesús tjako ch'án kixin chrókjuákehya kichó chojni*

*(Mt. 19.1-12; Mr. 10.1-12)*

18 'A ntá ijnko chojni tsjakehe ichjién la ntá tsakja ch'án í jnko chojni chjin la ijje tíha. A ntá

tí ch'ín tsakja ijnko tjan tsíkítsínkehe la kja<sub>x</sub>in ijje tíha.

*Tí ch'ín rico la ko tí ch'ín Lázarō*

<sup>19</sup> 'Ntá kjuák'e ijnko ch'án imá rico ch'án la ko k'uítsá ch'án ka imá tjete náxrjón kjátse tié la ko kaín yaon kjuasin ch'án kia. <sup>20</sup> A ntá ntója ntøe ch'án kjuák'etj<sub>x</sub>in ijnko ch'ín nõa mé it'in ch'án Lázarō tjanchak'á ch'án la ko níhi ch'án tsíchr'enka kuenté ntøe ch'án. <sup>21</sup> A ntá tí ch'ín nõa la imá kjuak'e asén ch'án chrókjõne ch'án la ko chrókókjeexín ch'án tí nkehe tot'õ tsjixènjinkíxin mesa kuènte tí ch'ín rico. A ntá tí konj<sub>a</sub> la kjuamá va tí tosóa chõnta ch'án. <sup>22</sup> A ntá ijnko yaon mé ik'uén tí ch'ín nõa. A ntá tí sín ángel mé sákjuiko ch'án tí náxrjón tjen ch'ín Abraham. La ko kja<sub>x</sub>in ik'uén tí ch'ín k'uéríko la sákjuikjavá sín ch'án. <sup>23</sup> Ntá tjen ch'án tí sátsji tí sín tsík'en tjetjasóte ch'án. Ntá konta ch'án k'uíkon ch'án kíxin íkjín náxrjón tjen ch'ín Abraham tjeko ch'án tí ch'ín Lázarō. <sup>24</sup> Ntá k'uèya tí ch'ín k'uéchõnta tsjé nkehe ntáchro ch'án kíxin: “It'èni Abraham, tikonóana tétuènhén tí ch'ín Lázarō kíxin sinchekjataxín ch'án kóhe dedo tja ch'án ìnt<sub>a</sub> ntá tsi ch'án tsjak'etak'á ch'án nejen kíxin tsoxruehe kíxin tjinahya sóa tí xrohi síin ntihi”, ichro ch'án. <sup>25</sup> Kjánchó ntáchro ch'ín Abraham kíxin: “Xjeenni, xráxinkávan kíxin tió kjuák'e chjasintajni na ó k'uayéhé itsjé nkehe náxrjón. A ntá ch'ín Lázarō mé k'uáyéhe ch'án nkehe náxrjónhya. A ntá jie ntihi kjuaxróxin tjen ch'án, a ntá jaha tjetjasótia méhe. <sup>26</sup> A ntá kja<sub>x</sub>in jnkosiné tjen tsaka imá jié xitjahya ts'átøye tí sín síin ntihi tsjihya sín tí tjen jaha la ko kja<sub>x</sub>in tí sín

siín méhe xitjahya ts'átòye sín itsji sín ntihi”, mé ichro ch'ín Abraham. <sup>27</sup> A ntá tí ch'ín k'uéríko mé ntáchro ch'án kixin: “Ntá xrjanóaha jaha It'éni Abraham kixin tétuenhén tí ch'ín Lázaro sátsji ch'án ntoe t'aná <sup>28</sup> kixin ntaha kúitòhe in'ó tí sín kichiná, ntá chróchenka ch'án sín kixin chrókuihya sín ntihi chrókjuasótehya sín kixin imá náxrxónhya ntihi”, mé ichro ch'án. <sup>29</sup> Kjánchó kjuátehe ch'ín Abraham ntáchro ch'án kixin: “Ó chóna sín tí nkehe tsíkjin ch'ín Moisés la ko tí sín k'uéchronka itén Dios ósé a. Chrókuinhin sín tí nkehe tsíntáchro tí sín a”, ichro ch'án. <sup>30</sup> Ntá ntáchro tí ch'ín a ínaá kixin: “Náhi, It'éni Abraham. Chrókójina sáchrókjuitsjehe ijnko chojni tsík'en ntá chrókuitekaon sín chrókúitòhe sín ijje sín”, ichro ch'án. <sup>31</sup> Ntá ntáchro ch'ín Abraham kixin: “Tí tsitekakonhya sín tí nkehe tsíntáchro ch'ín Moisés la ko tí nkehe tsíntáchro tí í so sín tsíchronka itén Dios ósé, ntá kjaxin tsitekakonhya sín kjónté chróxechón ijnko chojni tsík'en chrókjuichronka ínaá”, ichro ch'án.

## 17

### *Tí kjuaxikaon naxa tjasin chojni jie (Mt. 18.6-7, 21-22; Mr. 9.42)*

<sup>1</sup> Ch'ín Jesús ntáche ch'án tí sín k'uájiko ch'án kixin:

—Xráxín siín nkehe tsjasixín chojni jie. Kjánchó nòà tí nkexro tjasin tí nkehe tsjasixín chojni jie.

<sup>2</sup> Íchá jina chrókjuincheteyá sín ch'án ijnko xro tsík'óna xrochre chrókjuikákánkí sín ntayaon kixin tjasin ch'án tí nkehe tsjasixín jie ijnko chánjan naxa noehya. <sup>3</sup> Tóxakonhanrá kixin xikahya chrókjuásinrá nkehe.

'A ntá tí kichuárá chrókjuasinhanrá ch'án ichrén jié chrónixjehérá ch'án chróchenkará ch'án kixin jehya jína tí xikaha kjuít'ahará ch'án. A ntá tí chrókuitekaon ch'án chrókjuitoxinhin ch'án tí tjenkayáxin ch'án, ntá chrók'uitjáyanhanrá tí nkehe kjuít'ahará ch'án. <sup>4</sup> Kjonté chrókjuasinhanrá ch'án jié yato veces jnkokoá yaon la ko yato veces chróntáchro ch'án kixin í xikahya tsjasin ch'án jié inaá, la t'ichjánxin ts'itjáyanhanrá tí nkehe kjuít'ahará ch'án tí xikaha ntáchro ch'án.

*Tí kjuachaxin chóntani kixin tinkáchónkini Cristo*

<sup>5</sup> Ijnko yaon tí sín k'uájiko Ìnchéni ntáche sín ch'án kixin:

—Tjínkítsani kixin antsí chrókuinkáchónkini tí jaha —ichro sín.

<sup>6</sup> A ntá Ìnchéni ntáchro ch'án kixin:

—Kjonté intsí chrókuinkáchónkirá tí janhan éxí jiéxin ijnko tje ntsí kuènte nta mostaza la jína chrókuétuènhénrá tí nta sicómoro kixin chrók'uaxrjenkixin tí tjen ntihi sáchrókjui chróxenkaxín jnkosiné ntayaon ntiha, a ntá tí nta la chrókuinchexiteyá tí xikaha chróntáchrorá.

*Nkexrí chrókuinchexiteyá tí nkexro ch'e xra*

<sup>7</sup> Jnkojín tí jahará tí chróchontará ijnko nkexro t'ahará xra, a ntá tí chrókjanxin ch'án nontaará kjuínchentá ch'án nche o k'uàyakonhen ch'án tí ko kuèntará, ¿á chróntácherá ch'án kixin senó chrókjuak'e ch'án chrókjóne ch'án? <sup>8</sup> Kjá náhí. Kjá chrókuétuènhénrá ch'án kixin senó chrókuinchechján ch'án tí nkehe sinte la ko chrókóyaxinhin ch'án kixin tsjanjon ch'án nkehe nachrohe chrókjonte la ko chrók'uia. A ntá

tsjixin sinte la ntá tsjak'e ch'án sine ch'án la ko its'i ch'án. <sup>9</sup> ¿Á chrókjuancheherá ch'án kjuasáya kixin kjuínchexiteyá ch'án tí nkehe kuétuēnhénrá ch'án? Kjá náhi. <sup>10</sup> Mé kjāxin xikaha tí jahará tió chrókjuixin kaín tí xrā k'uetuanhanrá Dios chróntáchrohyará kixin jína kjuich'erá xrā kixin ó jehó tí nkehe k'uítuanhanrá kjuínchexiteyará, tsixrorá.

*Ch'ín Jesús kjuínchekitohe ch'án jína ite chojni chóna chinlepra*

<sup>11</sup> Ntá sátsji ch'ín Jesús chjasin Jerusalén ntá k'uátsínka ch'án nó estado Samaria la ko estado Galilea. <sup>12</sup> Ntá kjuíji ch'án ijnko chjasin ntsí ntá xeta ch'án ite chojni ntoa níhi chóna sín chinlepra. Kjánchó ikjín tjejóchónhen sín <sup>13</sup> ntá itsen k'uíyēhe sín ch'án ntáchro sín kixin:

—Jesús, Maestro, tikonóehéni kaín ni —ichro sín.

<sup>14</sup> Ntá k'uíkon ch'ín Jesús tí jehe sín ikjín tjejó sín ntáche ch'án sín kixin:

—Sátsjirá tjákohérá tí sín nchāt'á kixin ó kuítóhará jína, ichrorá.

Nachrohe sákjuí sín tinkákitohe sín jína. <sup>15</sup> Ntá ijnko tí jehe sín tió kónohe ch'án kixin kuítóhe ch'án jína ntá kjan ch'án chjéhe ch'án kjuasáya Dios la itsen nixja ch'án. <sup>16</sup> Kjuák'exín toch'ín ch'án chrínkí toté ch'ín Jesús k'uísén ch'án xrákjanyani ch'án nonte kixin kjuanchia ch'án kjuasáya. A ntá tí ch'ín a mé tsíkji<sub>xin</sub> ch'án estado Samaria. <sup>17</sup> A ntá ch'ín Jesús ntáchro ch'án kixin:

—¿Xá jehya ite chojni kuítóhe jína? ¿Xá kjá tí sín ina? <sup>18</sup> ¿Á jehó tí ch'ín i kjónté ikjín tsíkji<sub>xin</sub>

ch'án ikjan ch'án kjuanchehe ch'án kjuasáyé Dios ní? —ichro ch'án.

<sup>19</sup> A ntá ntáche ch'án tí ch'ín a kixin:

—T'ínkatjen sátjia. Kixin tí kuítekávan Dios la kuítóha jína —ichro ch'án.

*Itsi tí kjuachaxién Dios*

*(Mt. 24.23-28, 36-41)*

<sup>20</sup> A ntá tí sín fariseo kjuanchankíhi sín tí ch'ín Jesús kixin nkesá tsi tí kjuachaxin kuènte Dios. A ntá jehe ch'án kjuátehe ch'án ntáchro ch'án kixin:

—A ntá tí tsi kjuachaxin kuènte Dios la me tíha ijnko nkehe xitjahya ts'ikon chojni. <sup>21</sup> Xitjahya tsontáchrórá kixin: “Ntihi tjen,” o “Ntiha tjen”; kixin tí kjuachaxin kuènte Dios itjen jnkosiné tí tjejorá —ichro ch'án.

<sup>22</sup> Ntá ntáche ch'án tí sín k'uájiko ch'án kixin:

—A ntá itsi tí yaon tsotjinkáonrá jnkójín yaon chrók'uikonrá tí Xjeen Dios K'óna Chojni, ntá í ts'ikonhyará ch'án. <sup>23</sup> Tsontáchró sín kixin ntihi tjen ch'án, o ntiha tjen ch'án. Kjánchó sáchrókjuihyará la ko chróchréhyará sín. <sup>24</sup> Kixin éxí ts'ikonrá tsjonkixín ts'inkaséyanxín kuenté nkajní mé xikaha tsonhen tió itsi tí Xjeen Dios K'óna Chojni. <sup>25</sup> T'ichjánxin senó tsjasóte ch'án nchónhya la ko tí sín siín jie tsitekakuenhya sín ch'án.

<sup>26</sup> Éxí kónhen tí yaon kjuák'e ch'ín Noé mé xikaha tsonhen tió tsokjan tí Xjeen Dios K'óna Chojni.

<sup>27</sup> K'uékjine sín la ko k'uék'i sín la ko kótehe tí xjeen sín. A ntá xrínahya kui tí yaon k'uixenhen ch'ín Noé tí ntabárcō ntá k'uániá chrin, a ntá tí sín kuítóhe ntója la kaín sín k'uitjáyan sín.\* <sup>28</sup> Mé kjaxin xikaha

\* 17:27 17.26-27 Génesis 6.5-7.24



kónhen tí kjuák'e ch'ín Lot k'uékjine sín la ko k'uék'i sín la ko k'uék'ena sín nkehe la ko k'uékjinchekji sín nkehe la ko k'uék'enka sín nontee sín la ko k'uékjich'éna sín nchia. <sup>29</sup> A ntá tí yaon k'uaxrjexín ch'ín Lot tí chjasin Sodoma, na mé nkajní kuixín xrohi la ko azufre, na mé tíha k'u enxín kaín xín tí sín ntiha. † <sup>30</sup> Mé xikaha tsonhen tí yaon itsi tí Xjeen Dios K'óna Chojni.

<sup>31</sup> 'A ntá tí yaon i tí tjejó jnkojín nkexro chrítaón nchia tjejó't'ok'éhe sín, a ntá ichrén nkehe chóna sín kuítóhe sín nkaxenhen nchia la í chrók'uinkajinhya sín chrókuakitsje sín tí nkehe chóna sín, tjoka sáchrókjui sín ókjé. Kjaxin xikaha jnkojin chojni tjejó sín nontee sín la í chrókjanhya sín ntøe sín. <sup>32</sup> Xráxinkáonrá nkehe kónhen ichjién ch'ín Lot. ‡ <sup>33</sup> Tí nkexro tjinkaon kixin kohya nkehe chrókónhen na mé ts'itjáyan. A ntá tí nkexro chrókjuinчек'itjáyanxín asén kixin chróchronka itén Dios la mé tsaá. <sup>34</sup> A ntá tsontáxrjan kixin tí tie a jnkokoá ts'ejójuá yaá chojni la ijnko la sátsji la ko tí í jnko la tsítóhe. <sup>35</sup> Yaá chojni chjin its'o sín jnkokoá, la ijnko la sátsji la ko ijnko la tsítóhe. <sup>36</sup> Yaá chojni ts'ejóch'e sín xra nonte, la ijnko la sátsji a ntá ijnko la tsítóhe —ichro ch'án.

<sup>37</sup> Ntá kuínhin sín tíha ntá kjuanchankíhi sín ch'án kixin:

—¿Xá nketí tsonhen tíha, Inchéni? —ichro sín.

A ntá jehe ch'án kjuátøhe ch'án ntá chro ch'án kixin:

—Tí tjen tí cuerpo kuente chojni tsík'en la mé ntiha tsojnkotsé tí kontexjuen —ichro ch'án.

† 17:29 17.28–29 Génesis 18.20–19.25 ‡ 17:32 Génesis 19.26

## 18

*Ch'ín Jesús kjuíncheyóexin ch'án éxí ijnko tjan k'án la ko ijnko ch'ín juez*

<sup>1</sup> A ntá ch'ín Jesús kjuíncheyóexin ch'án kjuakoxin ch'án kixin jnkochrixín chrónixjehe chojni Dios la ko chrókóxrjéhya sín. <sup>2</sup> Ntá ntáche ch'án sín kixin:

—Ijnko chjasin kjuák'e ijnko ch'ín juez kjuikosáyehya ch'án Dios la ko k'uéchóntehya ch'án kjuasáyé ninkexró. <sup>3</sup> Kjaxin chjasin ntiha kjuák'e ijnko tjan k'án, jnkoyaxón sákjuítsjehe tjan tí ch'ín juez kjuanchia tjan jie ntáchro tjan kixin chrókuitóexín kixin ijnko chojni nínkakohen tjan ntiha. <sup>4</sup> Nchónhya veces tjitsjehe tjan tí ch'ín juez la chrohya ch'án chrókjuinckekitóexín ch'án. Ntá chr'éxín kjuenkayáxin ch'án ntáchro ch'án kixin: “Kjóté í tsjikosáyàhya Dios la ko ninkexró tsjikosáyàhya <sup>5</sup> a ntá tí tjan k'án jnkoyaxón tjanchia tjan jie, la tsjínkítsa tjan tsitóexín tí jie tjanchia tjan kixin í jnkoyaxónhya itsi tjan tsochronòa tjan kixin ó kjuixin kónínkavan jie”, ichro ch'án.

<sup>6</sup> Ntá ntáchro Ìnchéni kixin:

—Mé xikaha ichro tí ch'ín juez jínahya. <sup>7</sup> ¿Xá chrókjuinkítsahya Dios tí sín kjueyá ch'án tí chróchronóehe sín ch'án nchakotjin la ko tie? ¿Á tjokahya chrókjuatehe chrókjuinkítsa sín ch'án? <sup>8</sup> Ntáxrjan kixin kjá tjoka chrókjuinkítsa sín ch'án. A ntá tió itsi tí Xjeen Dios K'óna Chojni, ¿á naxa chrók'uitja ch'án chojni tinkáchónki tí jehe ch'án ntihi chjasintajni? —mé chro ch'án.

*Ch'ín Jesús kjuíncheyóexin ch'án éxí ijnko ch'ín fariseo la ko ijnko ch'ín nchekjènkí*

<sup>9</sup> Ntá ch'ín Jesús kjuíncheyóexin ch'án nixjehe ch'án iso chojni tjenkayáxin sín kixin imá jína sín a ntá tí í so sín la náhí, ichro sín. Ntá ntáchro ch'án kixin:

<sup>10</sup> —Iyó sín ntoa sákjui nkaxenhen ninko kixin tsonixjehe sín Dios. Ijnko la fariseo la ko ijnko la ch'ín nchekjènkí. <sup>11</sup> A ntá tí ch'ín fariseo tjexín ch'án toté ch'án nixjehe ch'án Dios ntáchro ch'án kixin: “It'éni Dios, kjuasáya tjahá kixin jeheni la chóntahyani jie éxí tí sín í so kixin teé sín la ko ch'iehe kichó sín la ko ch'iehe sín chojni chjin. Kjaxin jeheni la jehya éxí tí ch'ín nchekjènkí tjinhin. <sup>12</sup> Jeheni la nehyani iyó yaon jnkojnko semana la ko kjaxin tjanjonni tí chichaon tjachani tí diezmo kuéntá”, ichro ch'án. <sup>13</sup> A ntá tí ch'ín nchekjènkí la imá kjín kuitóhe ch'án kóxakonhen ch'án chrókonta ch'án nkajní la mé chjéhe ch'án ntakuin ch'án ntáchro ch'án kixin: “It'éni Dios tikonóehéni tí jeheni kixin nchónhya jie chóntani”, ichro ch'án. <sup>14</sup> Tjonkará kixin tí ch'ín nchekjènkí tió kjan ch'án ntøe ch'án la Dios kuikonóehe tí jehe ch'án la kjuínhin ch'án tí jie chóna ch'án, a ntá tí ch'ín fariseo la náhí. Kixin kaín chojni nchehnkehe asén kixin imá jína tí jehe sín la mé imá tsontsí. A ntá tí chojni nchehnkehya asén la imá ts'ánkí tí kjuaxrexinkaon kuènte sín.

*Ch'ín Jesús kjuíncheyaon ch'án chánjan  
(Mt. 19.13-15; Mr. 10.13-16)*

<sup>15</sup> Kjaxin kjuikao sín chánjan ntsíntsí tí tjen ch'ín Jesús kixin chrókjuincheyaon ch'án xjan. Kjánchó tió k'uíkon tí sín k'uájiko ch'án la í kjuanjonhya sín kjuachaxin kixin tsøchjinako sín xjan. <sup>16</sup> A ntá ch'ín Jesús k'uíyehé ch'án sín ntáchro ch'án kixin:

—Tìtoherá chánjan méhe xrakoa tí tjàn janhan la t'ínkakuènyhará xjan kíxin tí sín kuènte kjuachaxin kuènte Dios la mé tóyóhe tí jehe xjan. <sup>17</sup> Ntá chaxín ntáxrjan kíxin tí nkexro ts'ónahya éxí ijnko chánjan xitjahya ts'ejó sín tí ts'etōan Dios tí kjuachaxin kuènte ch'án.

*Ijnko ch'ín ntasoá ríco kjuínixjehē ch'án tí ch'ín Jesús*

*(Mt. 19.16-30; Mr. 10.17-31)*

<sup>18</sup> Ijnko ch'ín t'etōan kuènte nínko kjuanchankíhi ch'án tí ch'ín Jesús kíxin:

—Jaha la ijnko maestro jína la, ¿nkehe naxa t'itjáyán chrókjuich'eni kíxin chróchóntani kjuachón jnkochrín? —ichro ch'án.

<sup>19</sup> Ntá kjuátēhe ch'ín Jesús ntáchro ch'án kíxin:

—¿Nkekuènte ntáchrua kíxin jína tí janhan? Jnkokoá nkexro la mé jína la tíha mé Dios. <sup>20</sup> Jaha la ó noha nkehe tí k'uetōan Dios kíxin chrókjuacheéhya kíchuará, la ko chrók'oyánhya chojni, la ko chrókuēehya, la ko chróntáchrohya ninkehó nkehe chaxínhya kuènte ókjé chojni, la ko chrókjuíkosáyehé it'á la ko iná —ichro ch'án.

<sup>21</sup> A ntá jehe ch'án kjuátēhe ch'án ntáchro ch'án kíxin:

—Kaín tíha kjuínchexiteyáni desde xjanntsíni —ichro ch'án.

<sup>22</sup> A ntá kuínhin ch'ín Jesús kaín tíha ntá jehe ch'án ntáchro ch'án kíxin:

—A ntá jnkokoá nkehe naxa t'itjáyán chrókjuich'e, chrókjuínchekjia kaín nkehe chonta la chróchjehé tí chichaon tí sín nòa. A ntá tí nkehe tjete la tsochonta nkaya nkajní. A ntá tió tsjixin

sínchekitōnhén sín nkehe, a ntá tsjihá ntá chréhé tí janhan —ichro ch'án.

<sup>23</sup> A ntá tí ch'ín a kuínhin ch'án xikaha la kóxakonhen ch'án kixin imá itsjé nkehe chóna ch'án. <sup>24</sup> Tió k'uikon ch'ín Jesús kixin kóxakonhen tí ch'ín a la ntá ntáchro ch'án kixin:

—Imá xrā kixin tí chojni chóna itsjé nkehe chrók'uixenhen sín tí tjen Dios t'etōan. <sup>25</sup> Antsí xrāhya chrók'uatsínka ijnko kocamello ijnko tjar'i ntachica tjexrja, a ntá antsí má xrā kixin ijnko chojni chóna itsjé nkehe chrókjuak'e tí t'etōan Dios —ichro ch'án.

<sup>26</sup> A ntá kuínhin sín kixin xikaha ntáchro ch'án ntá ntáchro sín kixin:

—¿Xá nkexro chrókjuacha chrókuaá? —ichro sín.

<sup>27</sup> Ntá ntáchro ch'ín Jesús kixin:

—Tí nkehe tsjachahya chojni chrókjuinchexiteyá, la Dios la tsjacha ch'án sich'e ch'án kaín tíha —ichro ch'án.

<sup>28</sup> A ntá ch'ín Pedro ntáchro ch'án kixin:

—Ínchéni, jeheni la ó kuítóheni kaín nkehe chóntani kixin tsochréheni tí jaha —ichro ch'án.

<sup>29</sup> Ntá kjuátehe ch'ín Jesús ntáchro ch'án kixin:

—Ntá chaxín tsotjonkará kixin jnkojínrá chrókuítóhéra ntoa, la o chrókuítóhéra it'á la ko iná, la o chrókuítóhéra kichuárá, la o chrókuítóhéra ichjiánrá, la o chrókuítóhéra xjaanrá kixin chrókjuich'erá xrā kuènte Dios <sup>30</sup> la antsí nkehe ts'ayéhéra ntihi chjasintajni la ko tí chr'éxin la ts'ayéhéra kjuachón jnkochríxín —ichro ch'án.

*Ch'ín Jesús chrónka ch'án inaá kixin its'en ch'án  
(Mt. 20.17-19; Mr. 10.32-34)*

<sup>31</sup> Ntá ch'ín Jesús k'uíyehē ch'án jehó tí teyó sín k'uájiko ch'án ntá chrónka ch'án kixin:

—Ijie sátsjini Jerusalén. A ntá ntaha tsoxiteyá kaín tí nkehe tsíkjin tí sín tsíchronka itén Dios ósé nkexrí tsonhen tí Xjeen Dios K'óna Chojni.

<sup>32</sup> Tsjikaán sín ch'án tí tjejó tí sín jehya judío la ko tsjanoá sín ch'án la ko ts'ántaxínhin sín ch'án la ko ntate sín tsíkite sín ch'án. <sup>33</sup> Tsjate sín ch'án, a ntá chr'éxin la ts'óyán sín ch'án. A ntá níxin yaon tsoxechón ch'án —ichro ch'án.

<sup>34</sup> A ntá jehe sín la ninkehó kienxínhya sín tí nkehe nixja ch'án kixin tíha ijnko nkehe naxa ts-jachahya sín chrókienxín sín.

*Ch'ín Jesús kjuínchekitohe ch'án jína ijnko chojni t'ikonhya chjasin Jericó*

*(Mt. 20.29-34; Mr. 10.46-52)*

<sup>35</sup> A ntá ch'ín Jesús tió chjina chrók'uixenhen ch'án chjasin Jericó ntá ntiha chrínta ntia tjetjaxin ijnko ch'ín t'ikonhya tjanchak'á ch'án. <sup>36</sup> Ntá xrínahya kuínhin tí ch'ín t'ikonhya kixin sít'atsínka nchónhya chojni, ntá kjuanchankí ch'án kixin:

—¿Xa nkerí sítónhen? —ichro ch'án.

<sup>37</sup> Ntá chénka sín ch'án kixin ch'ín Jesús tsíkjixin chjasin Nazaret ts'atsínka ch'án ntiha.

<sup>38</sup> Ntá k'uèya ch'án ntáchro ch'án kixin:

—Jaha Jesús tsík'axrjeníxian ch'ín David, tikonóehéni —ichro ch'án.

<sup>39</sup> A ntá tí sín tsítaón ntia la k'uetuenhen sín ch'án kixin tsotáni ch'án. Kjánchó jehe ch'án antsí tsen k'uèya ch'án ntáchro ch'án kixin:

—Jaha tsík'axrjeníxian ch'ín David, tikonóehéni —ichro ch'án.

<sup>40</sup> A ntá ch'ín Jesús ntá ntahó kjuák'echónhen ch'án ntá k'ueṭoan ch'án kixin tsjikakjín sín tí ch'ín a. Ntá tió kuikao sín ch'án tí chjinaxón tjen ch'ín Jesús ntá kjuanchankí ch'ín Jesús kixin:

<sup>41</sup> —¿Nkehe tjinkávan sít'aha? —ichro ch'án.

Ntá kjuátehe tí ch'ín t'ikonhya ntáchro ch'án kixin:

—Jaha Ìnchéni, tjinkaonni chrókjuinchek'ikuanni —ichro ch'án.

<sup>42</sup> Ntá ntáchro ch'ín Jesús kixin:

—Ó ts'ikuan. Ó kuítóha jína kixin kuítekávan tí janhan —ichro ch'án.

<sup>43</sup> Ntá tuénxín k'uíkon tí ch'ín k'uék'ikonhya, a ntá jehe ch'án chréhe ch'án tí ch'ín Jesús la ko kjuanchehe ch'án kjuasáyé Dios. La ko kaín tí sín k'uíkon kixin xíkaha kónhen kjuanchehe sín kjuasáyé Dios.

## 19

### *Ch'ín Jesús la ko ch'ín Zaqueo*

<sup>1</sup> A ntá ch'ín Jesús k'uíxenhén ch'án chjasin Jericó la ntá k'uátsínka ch'án tí chjasin a. <sup>2</sup> A ntá ntiha tjen ijnko chojni ríco it'in ch'án Zaqueo, t'etueñhen ch'án tí sín nchekjènkj. <sup>3</sup> Tjinkaon ch'án chrókjuatsoan ch'án nkexro tí ch'ín Jesús, kjánchó nchónhya chojni siín la xitjahya t'ikon ch'án kixin intsí ch'án. <sup>4</sup> Ntá kuinká ch'án kuítaón ch'án ntja kixin tjinkaon ch'án chrók'uikon ch'án. Ntá kuátsé ch'án ijnko nta sicómoro chjinaxón tí ts'atsínka ch'ín Jesús. <sup>5</sup> A ntá tió k'uatsínka ch'ín Jesús ntiha konta ch'án tí nta ntáchro ch'án kixin:

—Zaqueo, tjoka tjasinkajían kixin ntõa ntahó tsitõna jie —ichro ch'án.

6 Ntá ch'ín Zaqueo la tjoka k'uínkajin ch'án kóchéhe ch'án. 7 Ntá kaín sín k'uíkon sín xíkaha ntá kjuankíxin sín tjonta sín tí ch'ín Jesús, ntáchro sín kíxin ntøe ijnko chojni chóna nchónhya jie tsitohe ch'án. 8 Ntá ch'ín Zaqueo kjuák'exín toté ch'án ntáche ch'án Ìnchéni kíxin:

—Jaha Ìnchéni, chrókónoha kíxin tsjánjuan jnkosiné tí nkehe chonta sintakitonhan tí sín nòa. A ntá tí jnkójín nkexro kjuít'áyaha kuaáha la noó veces ts'okjanhan sín tí chichaon jie —ichro ch'án.

9 A ntá ntáchro ch'ín Jesús kíxin:

—A ntá jie la tsaá chojni tí nchia i kíxin tí ch'ín a mé k'uaxrjeníxin ch'ín Abraham. 10 A ntá tí Xjeen Dios K'óna Chojni mé kuikjeyá la ko sinchekaá tí chojni chóna jie.

*Ch'ín Jesús kjuíncheyóexin ch'án éxí ite chichaon imá tjete sínkí*

11 A ntá tí chojni síin ntiha nachrohe tjejótinhin sín nkerí tjechro ch'ín Jesús, a ntá jehe ch'án kjuíncheyóexin ch'án nkehe kíxin ó tjen ch'án chjinaxón chjasin Jerusalén, a ntá jehe sín kjuenkayáxin sín kíxin tí kjuachaxin kuente Dios la ách'e ó tuénxín tsi, ichro sín. 12 A ntá ntáchro ch'án kíxin:

—Itjen ijnko nkexro tsík'axrjeníxin ijnko nkexro imá k'uék'etøan. Ntá sákjuí ch'án ókjé nación kíxin ts'áyéhe ch'án kjuachaxin ts'óna ch'án rey, a ntá chr'exín la xíkjan ch'án inaá. 13 A ntá tíó chjina sátsji ch'án ntá k'uíyehé ch'án ite tí sín ch'ehe ch'án xra ntá chjéhe ch'án jnkójnko tí jehe sín jnkójnko chichaon imá tjete sínkí. Ntá



k'uetōan ch'án kixin: “Tsjankíxinrá ch'ekoará xra tí chichaon hasta tí tsokjanjian”, ichro ch'án. <sup>14</sup> A ntá tí sín chjasén ch'án ntiha imá kónínkakohen sín ch'án, ntá ichr'án sín iso chojni chréhe sín tí sákjuí ch'án tsochenka sín tí sín siín ntiha kixin tjinkakonhya sín tí nkexro a ts'óna rey ts'etuenhen sín. <sup>15</sup> Kjónté xikaha ichro tí sín a la k'uáyéhe ch'án kjuachaxin ts'óna ch'án rey. Ntá kjan ch'án chjasén ch'án. Ntá k'uetōan ch'án xrakoa tí sín ch'ehe ch'án xra, na mé tí sín tsík'áyéhe tí chichaon, kixin tsonohe ch'án nkehe tí xra kjuích'eko sín tí chichaon k'uáyéhe sín. <sup>16</sup> A ntá tí ch'ín xrankíxixín kóchjina la ntáchro ch'án kixin: “Tí chichakoan la kjuachani ite chichaon ínaá”, ichro ch'án. <sup>17</sup> A ntá kjuátehe tí ch'ín rey kixin: “Ó nchōxon tí xikaha jaha la ijnko chojni jina ch'e xra. Jina kjuích'e xra kjónté jehya xra jie ntá tsjánjuan kjuachaxin tsétoan ite chjasin”, ichro ch'án. <sup>18</sup> A ntá kóchjina tí ch'ín í jnko a ínaá ntáchro ch'án kixin: “Tí chichakoan la kjuachani in'ó chichaon ínaá”, ichro ch'án. <sup>19</sup> A ntá xikaha ínaá kjuátehe tí ch'ín rey kixin: “Tsjánjuan kjuachaxin tsétoan in'ó chjasin”, ichro ch'án. <sup>20</sup> A ntá kóchjina tí ch'ín níxin ntáchro ch'án kixin: “Tí chichakoan la tjinhin. K'uánkintani panítóeni <sup>21</sup> kixin chrakonhanni kixin jaha la jiaha la tjinkávan tsákjá tí nkehe jehya jaha kjuaké la ko tsotja tí nkehe jehya jaha kuènkaxian”, ichro ch'án. <sup>22</sup> A ntá tí rey ntáchro ch'án kixin: “Jehya chojni jina ch'e xra jaha. Tí nkehe ntáchrúa tsjáncháxian jie. Jaha la ó noha kixin jiēna janhan tsákjaá tí nkehe kjuakéhya, ichrúa, la ko tsotja tí nkehe kuènkahya. <sup>23</sup> ¿Ntá nkekuènte kixin chr'anhya tí

chichaon ijnko banco chrókjuich'exín xra? A ntá tió kjan ntóna la antsí tsjé chichaon chrók'uayáha tí chrókjuacha kíchó chica”, ichro ch'án. <sup>24</sup> A ntá ntáche ch'án tí sín siín ntiha kixin: “Takítsjehérá ch'án tí chichaon tsík'áyéhe ch'án la ntá chjehérá tí ch'ín chóna ite chichaon”, ichro ch'án. <sup>25</sup> A ntá jehe sín ntáchro sín kixin: “¿Nkekuènte chrók'uáyéhe ch'án kixin ó chóna ch'án ite chichaon?” ichro sín. <sup>26</sup> A ntá tí ch'ín rey kjuátēhe ch'án ntáchro ch'án kixin: “Kjonté jnkójín nkexro itsjé chóna la ts'áyéhe má. A ntá tí nkexro chóntahya la kjonté tí ntsí chóna ch'án la ts'axrjehe ch'án. <sup>27</sup> A ntá tí sín nínkakonna sín tjinkakonhya sín kixin ts'ónana rey la xrákoará sín ntihi ts'íkōnxín kuān ts'ochrínjinrá kja sín.”

*Ch'ín Jesús k'uixenhen ch'án chjasin Jerusalén  
(Mt. 21.1-11; Mr. 11.1-11; Jn. 12.12-19)*

<sup>28</sup> Tió kjuixin ntáchro ch'ín Jesús tíhi ntá chrìn ch'án sátsji ch'án chjasin Jerusalén. <sup>29</sup> A ntá ó kjuíji chjinaxón tí chjasin Betfagé la ko chjasin Betania chjinaxón tí jna nchek'in sín Olivo, ntá k'uētuenhen ch'án iyó tí sín k'uájiko ch'án <sup>30</sup> ntáche ch'án sín kixin:

—Sátjirá tí chjasin ntsí chok'èxin ntihi, a ntá tió tsjasánrá ntiha ts'itjará ijnko kolocho tjechroé va naxa ninkexró tjiták'áhya va. Tjasintankehérá va la tsjikuanará va ntihi. <sup>31</sup> A ntá tí jnkójín nkexro tsjanchankíhará nkekuènte tjasintankehérá va la ntácherá sín kixin: “Ínchéni ts'ichjánxinhin va”, tsixrorá.

<sup>32</sup> A ntá tí sín k'uituenhen sákjuí sín k'uitja sín éxí ntáchro ch'án. <sup>33</sup> A ntá tió tjejóťjasintankehe sín va la ntá tí sín inché va kjuanchankíhi sín kixin:

—¿Nkekuènte tjasintankehéra tí kolócho? —ichro sín.

<sup>34</sup> A ntá jehe sín kjuátehe sín kixin:

—Inchéni ts'ichjánxinhin va —ichro sín.

<sup>35</sup> Ntá sákjuíkohe sín va tí ch'ín Jesús, la ntá tí iké sín kjuínchekamá sín va, ntá kjuíták'á ch'ín Jesús tí kolócho a. <sup>36</sup> A ntá tinkákji tí kolócho tjejkjen ch'án la tinkák'ikjínxin sín tí iké sín ntia kixin nátaón tí ka ts'atsínka tí kolocho tjejkjen ch'án.

<sup>37</sup> Ntá tió kjuíjichjina sín tí chjinaxón tí t'inkajinxin chojni tí jnā Olivo, a ntá kaín tí sín kuítekaon tí jehe ch'án chréhe sín kjuankixin sín itsen nixja sín chéhe sín kjuanchehe sín kjuasáyé Dios kixin kaín tí kjuaxroan k'uíkonxín kon sín. <sup>38</sup> Ntá ntáchro sín kixin:

—Jína tí nkexro Rey kjuixin kjuachaxin ihnié Dios. Tsjak'e kjuaxróxin nkaya nkajní la ko kjuasáyé Dios tjen nkaya nkajní —ichro sín.

<sup>39</sup> A ntá iso tí sín fariseo tjejóyákjan sín í so chojni tjejónxexroan sín ntiha ntáchro sín kixin:

—Maestro, tétuènhén tí sín chréhe tí jaha kixin tsotání sín —ichro sín.

<sup>40</sup> A ntá ch'ín Jesús kjuátehe ch'án ntáche ch'án sín kixin:

—A ntá tí sín i tsotání sín la ixro tsotsje —ichro ch'án.

<sup>41</sup> A ntá tió kjuíjichjina ch'án chjasin Jerusalén ntá k'uíkon ch'án tí chjasin la ntá tsjánka ch'án kixin kuítekakonhya sín <sup>42</sup> ntáchro ch'án kixin:

—Chrókuiénxinrá la ko chrókónohará nkexrí chrók'uayèxinrá tí kjuaxróxin, kjánchó jahará kuítekákonhyará. A ntá ó kjuixin k'uatásínka tí kjuaxróxin chrók'uikonrá la xitjahya ts'ikonrá jie. <sup>43</sup> A ntá tsi iso yaon jínahya itsi tí sín nínkakonhanrá la sich'éna sín ijnko tjat'o ts'ántatjen tí chjasin tjejorá ntihi ts'inkákonhen kixin xitjahya ts'axrxéxinrá chjasin ntihi kixin nkuíxín ts'ejó sín ts'inkákonhanrá sín <sup>44</sup> ntá ts'óxíka sín kaín tí tjat'o síin ntihi la ko ts'óyán sín kaín tí chojni síin la ko tsítóehya sín kixin ninkehó xro naxa ts'ejókjen kíchó, kixin jahará kjuátsoanhyará kixin kuitsjehe Dios tí chjasin tjejorá ntihi.

*Ch'ín Jesús kjuínchetjóá ch'án nkaxenhen nínko  
(Mt. 21.12-17; Mr. 11.15-19; Jn. 2.13-22)*

<sup>45</sup> A ntá ch'ín Jesús k'uíxehen ch'án tí nínko jié, a ntá kjuankíxin ch'án kuakitsje ch'án tí sín nchekji nkehe la ko tí sín t'ena nkehe ntiha. <sup>46</sup> Ntá ntáchro ch'án kixin:

—A ntá ntáchro xroon itén Dios chrónka kixin: “Tí ntona i mé it'in nchia tsonixjanaxián chojni”,\* ichro. A ntá jahará tí nchia i tsíkji ch'énará ítjueé xíchee —ichro ch'án.

<sup>47</sup> A ntá tí nínko ntiha kjuák'e ch'ín Jesús kjuako ch'án kaín yaon. A ntá tí sín nchát'á t'etóan la ko tí maestro tjako tí ley la ko kjaxin tí sín t'etóan tí chjasin ntiha kjueyá sín nkexrí chrók'óyán sín ch'án. <sup>48</sup> Kjánchó k'uitjahya sín nkexrí chrók'óyán sín ch'án kixin kaín chojni tjejótinhin tí nkehe tjechronka ch'án.

---

\* 19:46 Isaías 56.7

## 20

*Tí kjuachaxin chón̄ta ch'ín Jesús  
(Mt. 21.23-27; Mr. 11.27-33)*

<sup>1</sup> A ntá ijnko yaon kjuák'e ch'ín Jesús tí n̄jnko n̄tiha kjuakohe ch'án chojni tí tan jína tsaáxin sín. A ntá kjui tí sín n̄chat'á t'et̄oan la ko tí sín maestro tjako tí ley la ko k̄jaxin tí sín t'et̄oan kuènte n̄jnko.

<sup>2</sup> Ntá kjuanchankíhi sín ch'án k̄ixin:

—Chronka nkehe tí kjuachaxin chonta k̄ixin x̄ikaha ch'e. ¿Nkexro kjuanjon tí kjuachaxin a? —ichro sín.

<sup>3</sup> Ntá kjuát̄ehe ch'ín Jesús ntáchro ch'án k̄ixin:

—K̄jaxin janhan tsjánchánkíhará ijnko nkehe siná nkexrí tsjateherá. <sup>4</sup> ¿A ntá nkexro k'uet̄uēnhen tí ch'ín Juan k̄ixin ts̄ik̄ite ch'án chojni? ¿Á Dios ní o chojni ó? —ichro ch'án.

<sup>5</sup> Ntá kjuank̄ixin sín tjo sín k̄ichó sín ntáchro sín k̄ixin:

—¿Nkehe chrókjuateheni? A ntá tí tsontáchroni k̄ixin Dios tsíchr'án tí ch'ín Juan la ntá tsjanchankí ch'án k̄ixin nkekuènte kuítekakuenhyani ch'án. <sup>6</sup> A ntá tí tsontáchroni k̄ixin chojni ó k'uet̄uēnhen sín ch'án la ntá k̄ain chojni tsonínkaon sín la ixro ts'óyánxinni sín k̄ixin t̄jenk̄ayáxin sín k̄ixin ch'ín Juan chaxín k'uékjako ch'án itén Dios —mé x̄ikaha ikjo sín.

<sup>7</sup> Ntá kjuát̄ehe sín k̄ixin noehya sín nkexro tsíchr'án tí ch'ín Juan. <sup>8</sup> Ntá ntáchro ch'ín Jesús k̄ixin:

—K̄jaxin janhan tsoxrjankahya nkexro kjuanjon kjuachaxin tjét'á tíhi —ichro ch'án.

*Ch'ín Jesús kjuíncheyóexin ch'án éxí tí sín ch'ehya xra jína*

*(Mt. 21.33-44; Mr. 12.1-11)*

<sup>9</sup> Ntá tuénxín kjuankíxin ch'ín Jesús nixjehe ch'án chojni kjuíncheyóexin ch'án ntáchro ch'án kíxin:

—Kjuák'e ijnko chojni k'uenkaxin ch'án nta to uva tí nontee ch'án, a ntá chr'éxin kjuínchekjen ch'án tí iso tí sín ch'e xra. A ntá kjuixin ntá sákjuí ch'án imá sé. <sup>10</sup> A ntá kui tí yaon tsakjinjin sín to uva. Ntá k'uetuennen ch'án ijnko nkexro ch'ehe ch'án xra kíxin tsjikjanchehe ch'án tí sín ch'e xra nontee ch'án kíxin tsjanjon sín tí to tónhen ch'án tocar. A ntá jehe sín kjuate sín tí ch'ín a la ntá k'uinkité sín ch'án la ninkehó tsíchjéhya sín ch'án. <sup>11</sup> A ntá tí ch'ín nontee ichr'án ch'án í jnko nkexro ch'ehe ch'án xra. A ntá kjaxin k'uántaxínhín sín ch'án la ko kjuate sín ch'án la ko kjaxin ninkehó tsíchjéhya sín ch'án inaá. <sup>12</sup> A ntá tí ch'ín nontee ichr'án ch'án í jnko nkexro. A ntá tí sín ch'e xra kjaxin xikahó tsikjich'ehe sín inaá, tsík'inkité sín ch'án.

<sup>13</sup> 'Ntá tí ch'ín nontee ntáchro ch'án kíxin: “¿Nkexrí chrókjuít'a jje? Tsochr'an tí xjanna imá tjuaha. Ách'e chrókuitekakonhen sín ch'án chróchóntehe sín ch'án kjuasáya”, ichro ch'án. <sup>14</sup> A ntá kjónté kui ch'án la k'uikon tí sín ch'e xra ntá chénka sín kíchó sín kíxin: “Tí ch'ín i mé ts'áyéhe ch'án kaín nkehe kuènte it'é ch'án. Ts'óyánni ch'án kíxin jeheni tsitokoni kaín tí nkehe a,” ichro sín. <sup>15</sup> A ntá kuakitsjexín sín ch'án tí nonte ntiha la k'óyán sín ch'án.

A ntá kjuanchankí ch'ín Jesús kíxin:

—A ntá tí ìnché nonte la, ¿nkehe chrókjuich'e ch'án kixin xikaha kónhen tí xjeen ch'án? <sup>16</sup> Chrókui ch'án chrókjuinçek'itjáyan ch'án tí sín ch'e xra kixin xikaha kjuich'e sín k'óyán sín tí xjeen ch'án, a ntá chróchjéhe ch'án í so nkexro chrókjuich'e xra tí nonte a —ichro ch'án.

A ntá tió kuínhin sín xikaha ntáchro sín kixin:

—Kjá Dios la xikahya tjinkaon ch'án —ichro sín.

<sup>17</sup> A ntá ch'ín Jesús komá ch'án tí jehe sín ntáchro ch'án kixin:

—¿A ntá nkehe t'axrjexín tí nkehe ntáchro xroon itén Dios ntáchro xikihi?:

Tí xro náxrjónhya kuítóenta tí sín ch'éna tjat'o, a ntá mé jie k'óna tí xro tjetóan.\*

<sup>18</sup> A ntá jnkójín chojni tsjitsínka chrítaón tí xro i tsókuen ch'án. A ntá ts'ánótjen tí xro i tsoxratja ijnko chojni la tsókuen, ts'óna nche.

### *Tí xra tsjenkehe sín gobierno*

*(Mt.21.45-46; 22.15-22; Mr.12.13-17)*

<sup>19</sup> A ntá tí nchat'á t'etóan la ko tí maestro tjako tí ley tjinkaon sín chrótsé sín tí ch'ín Jesús tuénxín tí hora a kixin ó kónohe sín kixin jehe sín kuak-itsjexín tí nkehe nixja ch'án. Kjánchó xitjahya tsotsé sín ch'án kixin chrakonhen sín tí chojni siín.

<sup>20</sup> Ntá k'uetuenhen sín chojni tsotsáyehe sín ch'án, éxí chojni chóna kjuasáyé ch'án chrókjo sín ch'án jnkójina kixin ách'e ichrén nkehe ntoáhya tsonixja ch'án. A ntá jína tsjanchaxín sín jie tsjikaán sín ch'án tí tjen tí ch'ín gobernador. <sup>21</sup> Mé xikaha kjuanchankíhi sín ch'án nkehe, a ntá ntáchro sín kixin:

---

\* 20:17 Salmo 118.22

—Maestro, ó noheni kixin kaín nkehe ntáchrua la ko kaín nkehe tjàkua la chaxín ntoá la ko jehya nkexrí tsjehe chojni tjenkayáxixián kixin á jína sín, la ntá ntoá tjàkua ntje Dios. <sup>22</sup> A ntá jie la chronka, ¿á jína chrókjuenkehene tí gobierno romano o náhí? —ichro sín.

<sup>23</sup> A ntá ch'ín Jesús la ó kónohe ch'án kixin ntoáhya tjenkayáxin sín ntá ntáchro ch'án kixin:

—¿Nkekuènte chrokjuachaxínráni? <sup>24</sup> Tjákonará ijnko tí chichaon méhe. ¿Nkexro tí tsík'axrjexín tjenkáni tí chichaon i la ko nkexro ihnié chóna méhe? —ichro ch'án.

Ntá kjuátehe sín kixin:

—Tí ch'ín t'etoan mé tjenkáni ch'án —ichro sín.

<sup>25</sup> Ntá ntáchro ch'án kixin:

—Chróchjehérá tí ch'ín gobierno t'etoan tí nkehe kuènte ch'án; a ntá tí nkehe kuènte Dios chróchjehérá Dios —ichro ch'án.

<sup>26</sup> A ntá ninkehó kjuachahya sín kjuachaxín sín ch'án tí nkehe ntáchro ch'án nkayakon chojni chjasin ntiha. A ntá chrakon sín kuínhin sín kaín nkehe kjuátehe ch'án la ntá tí sín kjuanchankí la tání sín kohya nkehe ichro sín.

### *Kjuanchankí sín kixin á tsoxechón chojni*

*(Mt.22.23-33; Mr.12.18-27)*

<sup>27</sup> A ntá chr'éxin iso tí sín saduceo sákjuítsjehe sín tí ch'ín Jesús. Kjánchó tí sín saduceo titekakonhya sín kixin tsoxechón chojni tsík'en. Xíkaha ntáche sín tí ch'ín Jesús kixin:

<sup>28</sup> —Maestro, ch'ín Moisés tsíkjin ch'án tí xroon ley ntáchro kixin tió ts'en ijnko chojni la ntá tsitohe ichjién, tí chóntahya sín xjeen, la t'ichjánxin kixin kichó tí ch'ín tsík'en tsotehe tí tjan k'án kixin



tsochón̄ta sín x̄jeen sín éxí x̄jeen tí ch'ín sāo tsík'en ts'ikon sín.† 29 A ntá k'uéj̄ó sín yato sín jnkokoá kichó sín. A ntá tí ch'ín sāo la kótehe ch'án. Ntá k'uén ch'án la chóntahya ch'án ninkehó x̄jeen ch'án. 30 A ntá tí ch'ín yóxin kichó ch'án la kótehe tí tjan k'án. Kjaxin k'uén ch'án chóntahya sín x̄jeen sín. 31 A ntá tí ch'ín níxin xikótehe jehe tjan ínaá. Kjaxin xikaha kayatoé sín. Kaín sín k'uén sín ninkehó x̄jeen sín chóntahya sín. 32 A ntá kjuixixín kjaxin jehe tjan ik'uén tjan. 33 A ntá tíó tsoxechón chojni tsík'en, ¿ntá nkexro tí jehe sín ts'óna ichjién tí jehe tjan kixin yato tí jehe sín kótehe tjan? —ichro sín.

34 Ntá ch'ín Jesús kjuátehe ch'án ntáchro ch'án kixin:

—Ntíhi chjasintajni tí chojni ntoa la ko ti chojni chjin tótehe sín takja kichó sín. 35 A ntá tí sín kuítekaon sín tí janhan ntá tsjacha sín tsoxechón sín ínaá la í tsoteehya sín la koí tsoteehya tí x̄jeen sín. 36 Kixin tí sín a la xitjahya ts'en kixin éxí tí sín ángel ts'ejó sín kixin x̄jeen Dios tí jehe sín kixin Dios kjuínchexechón ch'án sín. 37 Kjaxin ch'ín Moisés tíó chrónka ch'án kuènte tí nta tjeche kjuínchenoheni ch'án kixin tí sín tsík'en tsoxechón sín. Ntáchro ch'án kixin Ìnchéni Dios na mé tí Dios tinkáchónki ch'ín Abraham la ko ch'ín Isaac la ko ch'ín Jacob.‡ 38 Tí Dios i la jehya tinkáchónki tí sín tsík'en. Náhí. Tí Dios i la tinkáchónki tí sín tjejóchón, la Dios la t'ikon ch'án kixin kaín chojni la síchón —ichro ch'án.

39 A ntá iso tí sín tjako tí ley la ntáchro sín kixin:

—Jína kjuàkua la ko jína ntáchrua, Maestro— ichro sín.

† 20:28 Deuteronomio 25.5    ‡ 20:37 Éxodo 3.6

40 A ntá chrakon sín la í ninkehó kjuanchankíehya sín ch'án.

*¿Xá nkexro tí it'é tí Cristo?  
(Mt. 22.41-46; Mr. 12.35-37)*

41 Ntá ntáchro ch'ín Jesús kixin:

—¿Nkexrí kixin ntáchro sín kixin tí Cristo mé ts'axrjenixin tí ch'ín David? 42 A ntá ch'ín David ikjin ch'án tí libro Salmos la ntáchro ch'án kixin:

Ìnchéni Dios ntáche tí Ìnchéni kixin:  
“Tjak'e tjaná chjina ntihó tsétoan

43 tsjixinjian kaín xín tí sín nínkakonhan la ts-jachahya sin ts'etōan sín kixin jahvá mé tsétoan.”§

44 ¿Xá nkexrí kixin Cristo chrók'óna it'é David, kixin jehe David kuikítexín ch'án Ìnché ch'án tí Cristo? —ichro ch'ín Jesús.

*Ch'ín Jesús kjuanchia ch'án jie tí sín tjako tí ley  
(Mt. 23.1-36; Mr. 12.38-40; Lc.11.37-54)*

45 Kaín chojni tjejótinhin sín nixjehe ch'ín Jesús tí sín k'uájiko ch'án ntáchro ch'án kixin:

46 —Chrókóxakonhanrá chrókuankíehyará tí sín maestro tjako tí ley. Tóxrjínhin sín chrók'uinkáya sín ka kjinjin la ko tjinkaon sín kixin kaín chojni chrókjuikosáyehe sín tsoxeta sín ntsin la ko tjejá sín silla antsí náxrjón chrók'uejóyá sín nkaxenhen nínko la ko tjejá sín kixin jína chrók'uejó sín tí sátsji sín kia, 47 la ko kjaxin takitsjehe sín ntōe tí chojni chjin k'án. A ntá kjuixin kjuích'iyehé sín chojni ntá náxrjón nixjehe sín Dios. A ntá jehe sín antsí má sinchekjasóte sín Dios kixin xikaha kjuích'ia sín.

§ 20:43 20.42-43 Salmo 110.1

## 21

*Tí chichaon kjuanjon ijnko tjan k'án nòà*  
(Mr. 12.41-44)

<sup>1</sup> A ntá tí nkaxenhen n̄jnko ch'ín Jesús k'uikon ch'án kixin tí sín ricó kjuikao sín chichaon chr'áxenhen sín tí ntacajón tjetóxroyéya chichaon.

<sup>2</sup> A ntá kjaxin k'uikon ch'án ikjui ijnko tjan k'án nòà la ntá jehe tjan chr'áxenhen tjan yaá chichaon ntsíntsí. <sup>3</sup> Ntá ntáchro ch'ín Jesús kixin:

—La chaxín ntáxrjan kixin tí tjan k'án i nòà tjan kjánchó antsí tjete sínkí tí chichaon kjuanjon tjan kixin kaín asén tjan kjuanjon tjan, a ntá tí sín kjuanjon nchónhya la náhí. <sup>4</sup> Kixin kaín tí chichaon kjuanjon sín la chichaon síxèhe sín. A ntá jehe tjan kjónté nòà tjan na kjuanjon tjan kaín tí chichaon chrókuicháxinhin tjan —ichro ch'án.

*Ch'ín Jesús ntáchro ch'án kixin tí n̄jnko ts'itjáyan*  
(Mt. 24.1-2; Mr. 13.1-2)

<sup>5</sup> Iso sín tjejójtjo sín kixin nkexrí tsjehe n̄jnko tsík'óna xro náxrjón la ko í so nkehe tsíkjanjon chojni éxí ijnko nkehe chjéhe sín Dios. A ntá ch'ín Jesús ntáchro ch'án kixin:

<sup>6</sup> —A ntá tsi ijnko yaon tí n̄jnko tjejokomará ntihi la tsoxíka. A ntá tsokohya ninkehó xro ts'ejójkjen kichó inaá —ichro ch'án.

*Tí nkehe tsonhen tí naxa ts'itjáyanhya chjasintajni*

(Mt. 24.3-28; Mr. 13.3-23)

<sup>7</sup> Ntá kjuanchankíhi sín ch'án kixin:

—Maestro, ¿nkesá tsonhen tíha? ¿Nkexrí tsonhen tí tsonoexínni tí nkehe tsonhen? —ichro sín.

<sup>8</sup> Ntá ntáchro ch'ín Jesús kixin:

—Chrókóxakonhanrá t̄itoéhyará sit'áyahará chojni. Nchónhya chojni tsi tsontácho sín kixin jehe sín tí Cristo, tsixro sín, la ko tsontácho sín kixin: “Ijie mé tsoxiteyá t̄onhen.” Kjónté x̄ikaha tsontácho sín la chrókuítekákuenhyará tí jehe sín. <sup>9</sup> A ntá tió tsinhínrá tsontácho chojni kixin ó siín kjuanínkaon tjanj̄onko kichó sín, kjónté x̄ikaha nax̄a chróchrakonhyará kixin kaín tíha t'ichj̄ánxin ts'atsínka senó tí nax̄a tsjixixínhya ts'itj̄ayan chjasintajni —ichro ch'án.

<sup>10</sup> Nax̄a tjechrónka ch'án ntácho ch'án kixin:

—Ijnko nación la tsjanj̄onko í jnko nación la ko ijnko chjasin tsjanj̄onko í jnko chjasin. <sup>11</sup> Kjaxin imá t̄jan tsínkí nonte la ko tsq̄jinta la ko tsoníhi chojni nchónhya chjasin, a ntá nkajní nchónhya kjuachrakon jié ts'ixin ts'ikon chojni.

<sup>12</sup> Nax̄a ts'atsínkahya tíha la tsonínkakonhanrá sín tsotsérá sín sátsjikoará sín tí n̄nko tsjanchia sín jié la ko sátsjikoará sín ts'íkjahará la ko sátsjikoará nkayakon tí sín rey la ko tí sín gobernador kixin tinkachónkirá n̄ina. <sup>13</sup> A ntá tí yaon x̄ikaha t̄onhen la ts'ixin kjuachaxin kixin tsoch̄ronkará nkexro tinkachónkirá. <sup>14</sup> Tóxakuanhyará senó nkexrí tsjateherá tí nkehe tsjanchankíhará sín <sup>15</sup> kixin janhan la tsj̄anjuan kjuaxrexinkaon jina tsonixjará kixin nijnko tí sín nínkakonhanrá xitjahya tsontácho sín kixin ntoáhya tí nkehe tsjateherá. <sup>16</sup> Kixin kjónté it'ará la ko kíchuará la ko tí sín kjéhyará la ko tí sín tjórá jina mé sintakjirá sín. Jehe sín ts'óyán sín jnkojínrá. <sup>17</sup> Kaín chojni chjasintajni tsonínkakonhanrá sín kixin tinkachónkirá n̄ina. <sup>18</sup> Kjánchó x̄ikaha la nijnko kax̄ih̄i chóntha

kjárá ts'itjáyanhya. <sup>19</sup> Tí tsitoéhyará tinkachónkirá tí janhan la tsochontará kjuachón jnkochríxín.

<sup>20</sup> 'A ntá tió ts'ikonrá kíxin kuenté chjasin Jerusalén tsík'ántatjen sín soldado ntá tsonoaxínrá kíxin í séhya ts'itjáyan tí chjasin a. <sup>21</sup> A ntá tí sín tjejó sín Judea la t'ichjánxín sátsjixín sín ntiha sátsji sín jna. A ntá tí sín siín chjasin Jerusalén kjaxin t'ichjánxín sátsjixín sín ntiha la ko ti sin tjejó sín nontee sín la í xitjahya tsokjan sín chjasin. <sup>22</sup> Kíxin tí yaon ts'ixin tsjasóte chojni tsoxiteyá tsonhen kaín nkehe nixja xroon itén Dios. <sup>23</sup> Nòa tí chojni chjin tjejóyá tí yaon a la ko tí sín chóna xjanhte naxa nchekakí sín. Kíxin tí yaon a la ts'ixin kjuatjoté tí chjasin la Dios tsjanjon kjuachaxin kíxin imá tsjasóte chojni ntiha. <sup>24</sup> Jnkojínrá ts'énxinrá tí siín kjuanínkaon ntiha la ko jnkojínrá tsotsérá sín sátsjikoará sín sinchekjasótiará kaín tí í so nación. A ntá tí sín jehya judío tsjixín ókjé nación tsinkátja sín chjasin Jerusalén kíxin Dios mé tsjanjon kjuachaxin iso yaon xikaha tsonhen. A ntá chr'éxín tsontácho ch'án kíxin: “La í kohya nkehe tsonhen.”

*A ntá tió itsi ti Xjeen Dios K'óna Chojni*

*(Mt. 24.29-35, 42-44; Mr. 13.24-37)*

<sup>25</sup> A ntá tsonoaxínrá nkexrí tsonhen tí yaon la ko nkexrí tsonhen nitjó la ko nkexrí tsonhen konotsé. A ntá chjasintajni tsokohya kjuaxróxin kaín nación la ko tsochracon chojni kíxin imá tsojna ntayaon. <sup>26</sup> A ntá chojni la tsotinhin sín kíxin tsochracon sín tsjenkayáxin sín nkehe tsonhen chjasintajni kíxin kaín tí nkehe sínkáni nkajní la tsinkí. <sup>27</sup> Ntá xikaha ts'ikon chojni kíxin itsi tí Xjeen Dios K'óna

Chojni itsi ch'án chríkjan ijnko tjuj tsikao ch'án tí kjuachaxin jié kuènte nkaya nkajní. <sup>28</sup> A ntá tió tsoxrankíxin tsonhen kaín tíha chrókócháhará chrókjuaya kjára ntá chróntáchorá kixin kjínhya tjen tí nkexro tsaáxinrá —ichro ch'án.

<sup>29</sup> Kjāxin kjuíncheyóēxin ch'án í jnko nkehe ntáchro ch'án kixin:

—Tjenkayáxinrá nkexrí siín tí nta t'óna to higo la ko kaín tí í so nta. <sup>30</sup> Tió ts'ikonrá kixin tinkák'ayan kahnte tí nta, ntá tsonoaxínrá kixin í séhya ts'ixenhen nchakuen chrin. <sup>31</sup> Mé kjāxin xikaha tió ts'ikonrá kixin kaín tí nkehe sítónhen, ntá tsonoaxínrá kixin tí kjuachaxin kuènte Dios la ó chjino tjen.

<sup>32</sup> 'Mé chaxín ntáxrjan kixin kaín tíhi tsonhen senó naxa t'enhya chojni tjejó jie. <sup>33</sup> A ntá tí nkajní la ko tí chjasintajni mé ts'itjáyan. A ntá tí nkehe ntáxrjan la ts'itjáyanhya, tsoxiteyá tíha.

<sup>34</sup> 'Chrókóxakonhanrá chrókuitoéhyará kixin chrókjuichròerá kixin tí imá chrókjónterá la ko tí chrókókoanrá. Kixin tí xikaha la ntá titàya tsi tí yaon la chrók'uejochoénhyará. <sup>35</sup> Na mé éxí ijnko trampa xrínahya ts'ikjehe mé xikaha itsi tí yaon a, la ko xikaha tsonhen kaín chojni siín chjasintajni tí ts'ejóchóenhya sín. <sup>36</sup> Méxra listo chrók'uejorá la ko chrónixjehérá Dios kaín yaon chronóehérá ch'án kixin tió tsi kaín tí kjuaxikaon xikaha la ntá tsjinkitsará ch'án tsaára kixin ntá tsjachará tsochjineherá tí tjen tí Xjeen Dios K'óna Chojni —ichro ch'án.

<sup>37</sup> Ch'ín Jesús kjuák'ekjāqoxin ch'án tí njnko ntiha jnkojnko yaon, a ntá tie la sákjuí ch'án tí jnā nchek'in sín Olivo, la ntaha kuítóhe ch'án. <sup>38</sup> A ntá

kaín chojni kóchjina sín tí n̄nko jnkojnko nchítjen ḱixin tsinhin sín tí nkehe tsochronka ch'án.

## 22

*Imó kjuenkayáxin sín nkexrí tsotsé sín tí ch'ín Jesús*

(Mt. 26.1-5,14-16; Mr. 14.1-2, 10-11; Jn. 11.45-53)

<sup>1</sup> Ntá kuichjina tí yaon kia sine sín tí niotja tjikohya tí xroan t'ánkíxin niotja na mé tí kia nchek'in sín pascua. <sup>2</sup> Ntá tí nchat'á t'etoan la ko tí sín maestro tjako tí ley kjuenkayáxin sín nkexrí chrók'óyán sín tí ch'ín Jesús ḱixin chrakonhen sín tí chojni chjasin ntiha.

<sup>3</sup> A ntá ch'ín Tsochren k'uíxenhen asén ch'ín Judas, mé kjaxin it'in ch'án Iscariote, mé jehe ch'án ijnko tí teyó tí sín k'uájiko ch'ín Jesús. <sup>4</sup> Tí ch'ín a mé sákjuítsjehe tí sín nchat'á t'etoan la ko tí sín t'etoan kuènte n̄nko, ikjo kíchó sín ḱixin nkexrí tsjikaán sín tí ch'ín Jesús. <sup>5</sup> Ntá jehe sín kóchéhe sín la ko ntáchro sín ḱixin tsjenkehe sín tí ch'ín Judas. <sup>6</sup> Ntá kjuátehe ch'án sinchexiteyá ch'án ntá kjueyá ch'án nkexrí tsotsé sín tí ch'ín Jesús tí kohya chojni.

*Kjuixixín kjoneko sín tí ch'ín Jesús*

(Mt. 26.17-29; Mr. 14.12-25; Jn. 13.21-30; 1 Co. 11.23-26)

<sup>7</sup> Ntá ó kui yaon kia sine sín niotja tjikohya tí xroan t'ánkíxin niotja, a ntá t'ichjánxin ts'óyán sín tí kolélo sine sín kuènte tí kia pascua. <sup>8</sup> A ntá ch'ín Jesús k'uetuenhen ch'án tí ch'ín Pedro la ko tí ch'ín Juan ḱixin sátsji sín sincheyaxín sín tí nkehe sine sín

kuènte tí kia pascua. <sup>9</sup> Ntá jehe sín kjuanchankíhi sín ch'án kíxin:

—¿Nketí tjinkávan sincheyaxíinni? —ichro sín.

<sup>10</sup> Ntá kjuátehe ch'án kíxin:

—Tió ts'ixenhenrá chjasin Jerusalén tsoxetará ijnko chojni ntoa yámá ijnko tóa tjiá ntá. Chréhérá ch'án sátsjirá tí nchia ts'ixenhen ch'án.

<sup>11</sup> Tsontácherá tí ìnché tí nchia kíxin: “Ntáchro Maestro kíxin: ¿Nketí tjen tí cuarto tsjánjuan kjuachaxin tsoyaxíxin sineko ch'án tí sín teyó xriko ch'án tí yaon pascua?” tsixrorá. <sup>12</sup> A ntá jehe ch'án tsjakohará ch'án ijnko cuarto jié tí yóxin piso la ntiha síin nkehe t'ichjánxin, la ntaha sincheyaxíxinrá tí sineni tsonjín —ichro ch'án.

<sup>13</sup> A ntá jehe sín sákjuí sín k'uitja sín kaín nkehe éxí tsíchronka ch'ín Jesús. Ntá ntiha kjuíncheyaxíxin sín sine sín kuènte pascua.

<sup>14</sup> A ntá kui tí hora, a ntá ch'ín Jesús la ko tí sín k'uájiko ch'án kjuíji sín ntiha k'uéjótjāxin sín tí tjen tí mesa. <sup>15</sup> Ntá ntáchro ch'ín Jesús kíxin:

—Imá tjínkavan kíxin tsjasinni kia sinekianrá tí yaon pascua naxā ts'énhya janhan. <sup>16</sup> Ntáxrjan kíxin sinehya janhan xikaha ínaá tí naxā tsox-iteyáhya tíha tió tsi kjuachaxin kuènte Dios —ichro ch'án.

<sup>17</sup> Ntá kuákja ch'án tí nkehe tjiá ìnté to uva ntá chjéhe ch'án kjuasáya Dios ntá ntáchro ch'án kíxin:

—Tákjará tíhi la its'irá kaín rá <sup>18</sup> kíxin ntáxrjan kíxin xík'íkianhyará tí ìnté to uva tí naxā tihya tí kjuachaxin kuènte Dios —ichro ch'án.

<sup>19</sup> A ntá kjuixin ntá kuákja ch'án tí niotja ntá kjuanchehe ch'án kjuasáyé Dios, ntá kóchrít'ò ch'án chjéhe ch'án tí jehe sín ntáchro ch'án kíxin:



—Tíhi mé cuerpo kuèntana kíxin ts'ényákonhanrá. Mé xíkaha tsoxráxinkákonxínrá tí janhan —ichro ch'án.

<sup>20</sup> Kjaxin xíkaha kjuanjon ch'án tí nkehe tjiá ìnté to uva tío kjuixin kjóne sín la ntáchro ch'án kíxin:

—Tí nkehe tjiá tí vaso chronkaxín tí nkehe nixin tsonhen tsoxiteyá kíxin tí jnina ts'itjí tsotjuáxin tí ijiará.

<sup>21</sup> Tí nkexro sinchekjina mé tjekian tí tjen mesa ntihi. <sup>22</sup> Méxra tí Xjeen Dios K'óna Chojni its'en éxí k'uítuenhen; kjánchó nòà tí ch'ín sinchekji ch'án kíxin tsjasóte ch'án —ichro ch'án.

<sup>23</sup> A ntá jehe sín kjuankíxin sín tjanchankíhi kichó sín:

—¿Xá nkexro sinchekji ch'án? —ichro sín.

### *Ikjo sín kíxin nkexro tí imá ts'etoan*

<sup>24</sup> A ntá jehe sín mé tjo sín kíxin nkexro antsí ts'etoan. <sup>25</sup> A ntá ntáchro ch'ín Jesús kíxin:

—Tí sín reyes kuènte tí naciones imá t'etoan sín. A ntá tí chojni mé ntáchro sín kíxin tí sín t'etoan la mé chojni ch'e xra jína. <sup>26</sup> A ntá jahará xíkaha chrókjuich'erá. Íchá jína tí nkexro imá t'etoan chrók'óna éxí tí nkexro antsí ntasoá chróchóxin chrók'uítuenhen, na mé tí nkexro t'etoan chrók'óna éxí ijnko nkexro ch'exón xra. <sup>27</sup> ¿A ntá nkexro tí antsí t'etoan, á tí nkexro lámō tjetjaxin tí tjen mesa ntá sine ch'án, o á antsí t'etoan tí nkexro kuikao tí nkehe sine ch'án? Náhí. Tí nkexro tjetjaxin tí tjen mesa mé antsí t'etoan ch'án. Mé xíkaha janhan tjéncakjánrá éxí ijnko nkexro ch'exón xra tí janhan.

28 'Jahará xráxín k'uéjontaxínrá k'uíkonrá kaín nkehe náxrjónhya kònna. 29 Méxra janhan tsjánjuan kjuachaxin tsétoanrá éxí chjìna T'aná tí tétōan janhan 30 kíxin sinterá la ko its'irá tí tsjak'e mesa kuèntana tí tsétoan janhan nkaya nkajní la ko tsétoanrá sinchekitoexínrá tí ijíé kaín tí sín k'uaxrjeníxin tí teyó xjeen ch'ín Israel.

*Ch'ín Jesús chrónka ch'án kíxin ch'ín Pedro sinchemá kíxin chónhya tí jehe ch'án, tsixro ch'án (Mt. 26.31-35; Mr. 14.27-31; Jn. 13.36-38)*

31 Ntá ntáchro Ìnchéni kíxin:

—Simón, Simón, chrókónoha jaha kíxin ch'ín Tsochren kjuanchia ch'án tí jahará chrók'ótsjéyehe ch'án tí jahará éxí noatrigó. 32 Kjánchó janhan xrjanóaha T'aná kíxin jaha chrókuitoéhya tí tinkachónkia tí janhan. A ntá jaha kjónté tsjásian jie, a ntá tsokjan inaá ts'itjányanhya tinkachónkia tí janhan ntá sinchechéhé kichuára —ichro ch'án.

33 A ntá ntáchro ch'ín Simón kíxin:

—Ìnchéni, listo tjenni sátsjini ts'ikjéhekoani la jehya ts'ikjéheni ó la kjaxin ts'enkoani —ichro ch'án.

34 A ntá kjuátehe ch'ín Jesús ntáchro ch'án kíxin:

—Pedro, ntáxrjan kíxin ijie jaí naxa tsjehya kochíntōa sinchemána iníya kíxin chonhya tí janhan, tsixrua —ichro ch'án.

*Ntá ó kuichjina tí hora xikaha tsonhen ch'án*

35 Ntá ch'ín Jesús kjuanchankíhi ch'án tí jehe sín kíxin:

—Tió kuétuāhanrá sákjuirá kjuíkoahyará kabolsa la ko kjuíkoahyará tí nkehe t'inka chichaon la ko kjuíkoahyará tokate na, ¿á naxa t'itjāyan ichrén nkehe ní? —ichro ch'án.

Ntá kjuátēhe tí jehe sín ntáchro sín ḱixin:

—Náhí. Ninkehó nkehe t'itjáyanhya —ichro sín.

<sup>36</sup> Ntá ntáchro ch'án ḱixin:

—A ntá jie tí nkexro chón̄ta kabolsa la tsakja sátsjiko la ko kjaxin tí nkehe t'inka chichaon. A ntá tí nkexro chón̄tahya chica espada chrókjuinchekji ch'án tí ka t'inkáya ch'án ḱixin chrók'ueñaxín ch'án ijnko chica. <sup>37</sup> Ntáxrjan ḱixin t'ichjánxin tsoxiteyá tsona éxí nixja xroon itén Dios ntáchro ḱixin: “Éxí yóhe ijnko chojni kjuasin jie mé xíkaha ts'ikon sín ch'án.”\* Mé xíkaha kaín nkehe chrónka xroon itén Dios ḱixin tsona mé t'ichjánxin tsoxiteyá —ichro ch'án.

<sup>38</sup> A ntá jehe sín ntáchro sín ḱixin:

—Inchéni, ntihi tjejó yaá chica espada —ichro sín.

Ntá kjuátēhe ch'án ḱixin:

—Kjónté ó táhó la ó nchoxon —ichro ch'án.

*Ch'ín Jesús nixjēexín ch'án Dios tí Huerto Getsemani*

(Mt. 26.36-46; Mr. 14.32-42)

<sup>39</sup> Ntá ch'ín Jesús sákjuixin ch'án chjasin Jerusalén sákjuí ch'án ijna Olivo ḱixin xíkaha kuèhen ch'án k'uékjich'e ch'án la koí tí sín k'uájiko ch'án tinkáchrēhe sín. <sup>40</sup> Ntá kjuíji sín ntiha ntá ntáchro ch'án ḱixin:

—Nixjehérá Dios ḱixin tsjinkitsa ch'án tí jahará ḱixin tsjásinhyará jie —ichro ch'án.

<sup>41</sup> Ntá ch'ín Jesús k'uaxrjenta ch'án tí jehe sín sákjuí ch'án ijnko kjínxin éxí chrók'ue chojni xro.

\* 22:37 Isaías 53.12

Ntá kjuák'exín toch'in ch'án kixin tsonixjehe ch'án Dios. <sup>42</sup> Ntá ntáchro ch'án kixin:

—It'éni, tí tjinkávan chrókjuinchekaáni kaín nkehe náxrjónhya chrók'uatsínkani. Kjánchó jehya éxí tjinkaonni jeheni chrókónhenni. Náhí. Éxí tjinkávan jaha —ichro ch'án.

<sup>43</sup> Ntá xrínahya k'uíkon ch'án itjen ijnko ángel tsíkixín nkaya nkajní kixin tsjinkitsa ch'án. <sup>44</sup> A ntá imá tóxakonhen ch'án, a ntá antsí fuerte nixjehe ch'án Dios, ntá k'uíxin ch'án ntachjin éxí yóhe jni xikaha k'uítji k'uánótjen nonte.

<sup>45</sup> Ntá tió kjuixin nixjehe ch'án Dios ntá k'uínkatjen ch'án ntá sákjuí ch'án tí tjejó tí sín k'uájiko ch'án, ntá k'uitjaxín ch'án kixin tjejójua tí jehe sín kixin kjuachahya sín imá t'ává sín. <sup>46</sup> A ntá ntáchro ch'án kixin:

—¿Nkekuènte tjejochrinrá? T'àyará. Nixjehérá Dios kixin tsjinkitsará ch'án kixin tsjachroehyará ch'ín Tsochren —ichro ch'án.

*Itsé sín tí ch'ín Jesús*

*(Mt.26.47-56; Mr. 14.43-50; Jn. 18.2-11)*

<sup>47</sup> A ntá ch'ín Jesús naxa tjenixja ch'án ntá xrínahya kui nchónhya chojni yámá chica. Tí ch'ín it'in Judas, ijnko tí teyo sín k'uájiko ch'ín Jesús, kuítaón ch'án ntia, ntá kóchjinehe ch'án tí ch'ín Jesús kixin sineko ch'án kochíto. <sup>48</sup> A ntá ntáchro ch'ín Jesús kixin:

—Judas, ¿á ijnko kochíto ó sinchekjixian tí Xjeen Dios K'óna Chojni? —ichro ch'án.

<sup>49</sup> A ntá tí sín tjejóko ch'ín Jesús tió k'uíkon sín kixin xikaha kónhen ntá kjuanchankíhi sín ch'án kixin:

— Ìnchéni, ¿á chrókuatéxinni sín chica espada?  
— ichro sín.

<sup>50</sup> A ntá ijnko tí jehe sín kjuíncheníhi ch'án ijnko ch'ín ch'ehe xra nch'at'á t'etōan, kóchrínjin ch'án ntatsjon ch'án chjina.

<sup>51</sup> A ntá ntáchro ch'ín Jesús kixin:

— Táhó, tītōhé, ó tjen — ichro ch'án.

Ntá ch'ín Jesús itsé ch'án tí ntatsjon tí ch'ín ch'e xra a, ntá kjuínchekitōhe ch'án jina. <sup>52</sup> Ntá tuénxín ch'ín Jesús ntáche ch'án tí sín nch'at'á t'etōan la ko tí sín t'etōan kuènte ninko la ko tí sín táda t'etōan mé tí sín tsíki sátsjiko sín ch'án ntáchro ch'án kixin:

— ¿Nkekuènte k'uinkakoará chica espada la ko inta éxí chrótserá ijnko xíchee? <sup>53</sup> A ntá kaín yaon kjuak'é janhan k'uejóni kjuákoáxinrá tí ninko ntiha la ninkehó tsehyará tí janhan. A ntá jie mé tí hora kuèntará ntá kjuacha tí kjuachaxin kuènte sítié — ichro ch'án.

*Ch'ín Pedro kjuínchemá ch'án kixin chónhya ch'án tí ch'ín Jesús*

*(Mt. 26.57-58, 69-75; Mr. 14.53-54, 66-72; Jn. 18.12-18, 25-27)*

<sup>54</sup> Ntá itsé sín tí ch'ín Jesús kjuínchenteto sín ch'án sákjuíko sín ch'án ntoe nch'at'á t'etōan. A ntá ch'ín Pedro ikjín tinkáchréhe ch'án. <sup>55</sup> A ntá tí ntasin ntiha kjuaka sín xrohí síxrohe sín. A ntá ch'ín Pedro kjaxin kjuák'entaxín ch'án tí tjejó sín ntiha. <sup>56</sup> A ntá ijnko tjachjin ch'e xra tió k'uíkon tjan kixin koí ch'ín Pedro tjechjírōhe ch'án ntiha ntá komá tjan tí jehe ch'án ntá ntáchro tjan kixin:

— Kjaxin tí ch'ín i xriko tí ch'ín Jesús — ichro tjan.

<sup>57</sup> Ntá ch'ín Pedro kjuínchemá ch'án ntáchro ch'án kixin:

—¿Nkekuènte xikaha ichrúa jaha? Ni chonhya tí nkexro a —ichro ch'án.

<sup>58</sup> A ntá antsíkoá chr'éxin ikui í jnko chojni k'uikon tí jehe ch'án ntá ntáchro kixin:

—Kjixin jaha xríkoa tí nkexro a —ichro.

Ntá ch'ín Pedro ntáchro ch'án kixin:

—Náhi, janhya —ichro ch'án.

<sup>59</sup> Ntá éxi ijnko hora chr'éxin ntá nixja í jnko ch'ín chénka tí í so sín kixin:

—Tí ch'ín i chaxín xriko tí ch'ín Jesús kixin kjixin tsíkjixin ch'án estado Galilea —ichro ch'án.

<sup>60</sup> Ntá ntáchro ch'ín Pedro kixin:

—Nonahya janhan nkehe tí ntáchrúa —ichro ch'án.

Ntá tuénxín naxa tjenixja ch'án ntá xrínahya ó tsje kochíntoa. <sup>61</sup> Ntá Ìnchéni kuinkátjía ch'án komá ch'án tí ch'ín Pedro. Ntá ch'ín Pedro xraxinkaon ch'án kixin xikaha tsíchronka Ìnchéni kixin: “Naxa tsotsjehya kochíntoa sìnchemána iníya.”† <sup>62</sup> Ntá ch'ín Pedro sákjuí ch'án ntója, tsjánka ch'án xraxinkaon ch'án tí jie kjuasin ch'án.

*Kjuanoá sín tí ch'ín Jesús*

*(Mt. 26.67-68; Mr. 14.65)*

<sup>63</sup> Tí sín sákjuíko ch'ín Jesús kjuanoá sín ch'án la ko kjuate sín ch'án. <sup>64</sup> K'uikjéhe sín ka kon ch'án ntá kjuate sín ch'án ntá kjuanchankíhi sín ch'án kixin:

—Ijie la tónoha nkexro kjuatia —ichro sín.

<sup>65</sup> La ko í so nkehe ntáchro sín k'uántaxínhin sín ch'án.

*Ntá sákjuíko sín tí ch'ín Jesús nkayakon tí sín t'etoan*

*(Mt. 26.59-66; Mr. 14.55-64; Jn. 18.19-24)*

† 22:61 Lucas 22.34

<sup>66</sup> A ntá kóyaon nchakotjin la kójnkotsé kaín tí sín táda t'etuenhen tí sín judío, la ko tí nchät'á t'etoan, la ko tí sín maestro tjako tí ley la sákjuíko sín tí ch'ín Jesús nkayakon tí sín imá t'etoan. Ntá ntiha kjuanchankíexín sín ch'án kixin:

<sup>67</sup> —Ijie la chronka, ¿á jaha tí Cristo? —ichro sín.

Ntá jehe ch'án kjuátehe ch'án kixin:

—Tí tsontáxrjan kixin chaxín janhan na tsitekákonhyará. <sup>68</sup> A ntá tí chrókjuánchánkíhará ichrén nkehe la chrókjuáteehyará la ko chrók'uatjántahyarána. <sup>69</sup> A ntá jie tí Xjeen Dios K'óna Chojni mé tsjak'etjaxín tí tja chjina kuènte Dios chóna kaín xín kjuachaxín —ichro ch'án.

<sup>70</sup> A ntá tuénxín kaín sín kjuanchankíhi sín ch'án kixin:

—¿Á chaxín jaha tí Xjeen Dios? —ichro sín.

A ntá kjuátehe ch'ín Jesús ntáchro ch'án kixin:

—Chaxín janhan xíkaha ntáchrora tí jahará —ichro ch'án.

<sup>71</sup> Ntá kjo sín kichó sín kixin:

—¿Nkehe tsonhen naxa chróchrónka í so chojni? Jeheni kaín ni kuínhinni nkehe k'uaxrjexín ir'va ch'án —ichro sín.

## 23

*Sákjuíko sín tí ch'ín Jesús nkayakon tí ch'ín Pilato  
(Mt. 27.1-2, 11-14; Mr. 15.1-5; Jn. 18.28-38)*

<sup>1</sup> Ntá kaín sín k'uínkatjen sín ntá sákjuíko sín tí ch'ín Jesús nkayakon tí ch'ín Pilato. <sup>2</sup> A ntá ntiha kjuankíxín sín t'eka sín jie tí jehe ch'án ntáchro sín kixin:

—K'uitjani tí nkexro i tjachroe ch'án chojni nación kuènténi ntáchro ch'án kixin

chrókjuenkeehyani tí gobierno romano, la ko kjaxin ntáchro ch'án kixin jehe ch'án mé Cristo ch'án, na mé ijnko rey tíha —ichro sín.

<sup>3</sup> A ntá ch'ín Pilato kjuanchankíhi ch'án tí ch'ín Jesús ntáchro ch'án kixin:

—¿Á jaha tí Rey t'etuenhen tí sín judío a ní? —ichro ch'án.

Ntá ch'ín Jesús kjuátehe ch'án ntáchro ch'án kixin:

—Chaxín xikaha ntáchrúa jaha —ichro ch'án.

<sup>4</sup> A ntá ch'ín Pilato ntáche ch'an tí sín ncha'tá t'etoan la ko tí chojni tsíkikao sín kixin:

—T'itjáhya nijnko jie chóna tí nkexro i —ichro ch'án.

<sup>5</sup> A ntá jehe sín antsí itsen nixja sín ntáchro sín kixin:

—Tjachroe ch'án kaín xín chojni estado Judea kixin tí nkehe tjako ch'án. Kjuankixin ch'án kjuako ch'án estado Galilea, a ntá jie ó kui ch'án ntihi la xikaha tjako ch'án —ichro sín.

### *Sákuiko sín tí ch'ín Jesús nkayakon tí ch'ín Herodes*

<sup>6</sup> A ntá kuínhin ch'ín Pilato xikaha ntáchro sín ntá kjuanchankí ch'án á tí ch'ín i la á Galilea tsíkjixín ch'án. <sup>7</sup> A ntá kjuátehe sín kixin ntaha tsíkjixín ch'án, ntá k'uetōan ch'ín Pilato kixin sátsjiko sín ch'án tí tjen ch'ín Herodes kixin jehe ch'án mé

gobernador tí estado Galilea kixin kjaxin ch'án tjen ch'án chjasin Jerusalén tí yaon a. <sup>8</sup> A ntá ch'ín Herodes k'uíkon ch'án kjuíji tí ch'ín Jesús ntá imá kóchéhe ch'án kixin isé tjinkaon ch'án chrók'uikon ch'án tí ch'ín Jesús kixin tsíkinhin ch'án chrónka

chojni nkexrí tjako ch'án, ntá tjinkaon ch'án chrók'uikon ch'án ijnko kjuaxroan chrókjuakoxín



ch'ín Jesús. <sup>9</sup> Nchónhya nkehe kjuanchankíhi ch'án tí ch'ín Jesús, kjánchó ch'ín Jesús ninkehó kjuáteehya ch'án. <sup>10</sup> Kjaxin ntiha k'uejó tí sín nchat'á t'etōan la ko tí sín maestro tjako tí ley la ntá nchónhya jiē k'ueka sín ch'án kixin nínkakonhen sín ch'án.

<sup>11</sup> A ntá ch'ín Herodes la ko tí sín soldado kuènte ch'án kjuankíxin sín kjuikosáyehya sín ch'án la ko kjuanoá sín ch'án kjuínchek'inkáya sín ch'án ka tjete náxrjón éxí t'inkáya tí sín rey. A ntá tuénxín ch'ín Herodes k'uetōan ch'án kixin sátsji ch'án inaá tí tjen ch'ín Pilato. <sup>12</sup> A ntá tí yaon a ch'ín Pilato la ko ch'ín Herodes kjuankíxin sín tjuèhe kichó sín kixin tí senó la k'uénínkakonhen kichó sín.

*K'uetōan sín kixin its'en ch'ín Jesús*

*(Mt. 27.15-26; Mr. 15.6-15; Jn. 18.39—19.16)*

<sup>13</sup> A ntá ch'ín Pilato k'uíyehē ch'án tí nchat'á t'etōan la ko tí sín gobernador la ko kaín chojni chjasin ntiha kixin tsojnkotsé sín <sup>14</sup> ntá ntáche ch'án sín kixin:

—Jahará kjuikuānará tí nkexro i ntáchrórá kixin ntoáhya tjakohe ch'án chojni kixin chrókónínkakonhen sín tí gobierno. Kjánchó janhan kjuánchánkíha ch'án itsjé nkehe kuínhínrá ntá k'uikonrá kixin k'uitjahya ninkehó tí jiē tékará ch'án. <sup>15</sup> La ko kjaxin ch'ín Herodes k'uitjahya ch'án tí jiē tékará tí ch'ín Jesús ntá chr'án ch'án inaá ntihi. Ó k'uikonrá kixin ninkehó jiē chóntahya ch'án chrók'uenxín ch'án. <sup>16</sup> Sjintakjasóte ch'án ntá chr'éxín tsjánjuan kjuachaxin sátsji ch'án —ichro ch'án.

<sup>17</sup> A ntá tí yaon kia a la t'ichjánxín kixin ch'ín Pilato tsjanjon kjuachaxin sátsji ijnko chojni

tjehjina kixin xikaha kuènhen sín ósé. <sup>18</sup> Ntá kaín sín kjuankíxin sín k'óyako sín ntáchro sín kixin:

—¡Tí nkexro la náhí! ¡Ch'ín Barrabás mé t'atjánta!  
—ichro sín.

<sup>19</sup> A ntá ch'ín Barrabás tsík'ikjéhe sín ch'án kixin jehe ch'án la ko í so chojni kónínkakonhen sín tí chjasin ntiha la ko tsík'óyán ch'án chojni.

<sup>20</sup> A ntá ch'ín Pilato tjinkaon ch'án chrókjuanjon ch'án kjuachaxin sáchrókjui ch'ín Jesús. A ntá xíkjanchankíhi ch'án tí chojni síin ntiha ínaá.

<sup>21</sup> Kjánchó jehe sín antsí má tsen k'óyako sín ntáchro sín kixin:

—¡Tjakékanirá ch'án ntacruz! ¡Tjakékanirá ch'án ntacruz! —ichro sín.

<sup>22</sup> Níxin xíkjanchankí ch'ín Pilato ntáchro ch'án kixin:

—¿Xá nkehe ntoáhya kjuích'e ch'án? Janhan la k'úitjahya ninkehó jie chóna ch'án chrók'uenxín ch'án. Sintakjasóte ch'án la ntá chr'éxin tsjánjuan kjuachaxin sátsji ch'án —ichro ch'án.

<sup>23</sup> Kjánchó jehe sín antsí tsen kjuanchia sín ntáchro sín kixin chrókjuak'enkáni ch'án ntacruz. A ntá k'óyako sín la ko k'óyako tí sín nch'at'á t'etōan ntá kjuacha sín kjuanchia sín tí nkehe tsonhen.

<sup>24</sup> A ntá ch'ín Pilato kjuanjon ch'án kjuachaxin xikaha tsonhen tí nkehe kjuanchia sín. <sup>25</sup> A

ntá kjuanjon ch'ín Pilato kjuachaxin sátsji tí ch'ín Barrabás éxi kjuanchia sín, na mé tí ch'ín k'uikjéhe sín kixin k'uékje ch'án kjuanínkaon la ko k'uék'óyán ch'án chojni. A ntá ch'ín Pilato kjuanjon ch'án kjuachaxin kixin sátsjiko sín tí ch'ín Jesús sinchekjasóte sín ch'án éxi tjinkaon sín.

*Kjuak'enkani sín ch'án ijnko ntacruz its'en ch'án  
(Mt. 27.32-44; Mr. 15.21-32; Jn. 19.17-27)*

<sup>26</sup> A ntá tió sákjuíko sín ch'ín Jesús tsjak'enkani sín ch'án ntacruz, ntá itsé sín ijnko ch'ín tsíkjin chjasin Cirene it'in ch'án Simón, mé kjuixin ch'án nontee ch'án, ntá kjuínchekamá sín ch'án tí ntacruz tsjak'enkani ch'ín Jesús la tinkáchréhe ch'án.

<sup>27</sup> Kjaxin chréhe nchónhya chojni ntoa la ko nchónhya chojni chjin chréhe sín tsjánkamā sin ch'án. <sup>28</sup> Kjánchó ch'ín Jesús nkátjía ch'án komá ch'án tí jehe sín kixin tsjánka sín ntáchro ch'án kixin:

—Jahará chojni chjin chjasin Jerusalén, chrótsjankamahyará tí janhan. Chrótsjankará kixin tí nkehe tsonhanrá jahará la ko xjaanrá. <sup>29</sup> Kixin itsi yaon tsonáchrora kixin náxrjón tí sín chóntahya xjan la ko tí sín kjuínchekokjéhya xjan la ko tí sín kjuínchekakíhya ninkehó xjan. <sup>30</sup> Ntá tsjankixin chojni tsonáche sín tí jnā kixin tsoxrátja sín la ko tsonáche sín tjo kixin tsjavá sín. <sup>31</sup> Kjonté tí nta yoa la ó sítónhen kaín tíhi la íchá tió chróxamá tí nta la ¿nkehe tí kaá chrókónhen tí nta tsíxamá? —ichro ch'án.

<sup>32</sup> Kjaxin sákjuíko sín iyó sín tsíkjasin jie kixin ts'óyánko sín ch'ín Jesús. <sup>33</sup> Ntá tió kjuíji sín tí jnā tikítexín sín tí jnā Nta Hueso Kja Chojni, na mé ntiha kjuak'enkani sín ch'ín Jesús tí ntacruz la ko kjaxin tí iyó sín chóna jie, la ijnko la tja ch'án chjina la íjnko la tja ch'án kjon tjejóyáni sín ntacruz kjaxin. <sup>34</sup> Ntá tió kjuixin kjuak'enkani sín tí ch'ín Jesús tí ntacruz ntá nixjehe ch'án tí It'é ch'án Dios ntáchro ch'án kixin:

—It'éni, tónínkákuènhya sín kixin tí nkehe kjuích'eheni sín kixin noehya sín nkehe tí kjuích'e sín —ichro ch'án.

A ntá tí sín soldado k'óxikayēhe sín iké ch'án ch'exín sín suerte kixin tsonoexín sín nkexro tsakja tí ka a. <sup>35</sup> Kaín chojni chjasin ntiha tjejótsjehe sín kixin xikaha sítónhen la ko kjaxin tí sín t'etōan tjanoá sín tí jehe ch'án ntáchro sín kixin:

—Kjuínchekaá ch'án ókjé chojni, a ntá jie jehe ch'án chrókjuínchekaá ch'án asén ch'án tí chaxín jehe ch'án tí Cristo tí nkexro tsíkjejá Dios —ichro sín.

<sup>36</sup> La ko kjaxin tí sín soldado kjuanoá sín ch'án kóchjinehe sín ch'án kuikao sín xranvino náxrjónhya chjéhe sín ch'án chrók'ui ch'án, <sup>37</sup> ntáche sín ch'án kixin:

—Tí jaha chaxín rey kuènte tí sín judío ntá jahvá chrókjuínchekaá asán —ichro sín.

<sup>38</sup> Kjaxin ntiha ikja tí ntacruz kjuak'enkani sín ijnko ntachiso ntsí tsíkjin sín nkìva griego la ko nkìva latín la ko nkìva hebreo ntáchro kixin: “Tíha mé Rey kuènte tí sín judío”, ichro.

<sup>39</sup> Ijnko tí sín chóna jie tjenkani ntacruz k'uántaxínhin ch'án tí ch'ín Jesús ntáchro ch'án kixin:

—Tí jaha chaxín Cristo, jahvá chrókjuínkajian asán, ntá tsjixin ntá chrókjuínkajian tí jeheni —ichro ch'án.

<sup>40</sup> A ntá tí ch'ín jnko a k'uetuēhen tí í jnko ch'ín a kixin tsotáni ch'án, ntáchro ch'án kixin:

—Ntáchrohya xikaha. ¿Á chrakuenhya Dios kixin xikaha ichrua kixin kjaxin jeheni na ó tjejóttjasóteni? <sup>41</sup> Yóini na nchoxon tjejóttjasóteni

tjejótjenkani tí jie kjuasinni. A ntá tí nkexro i ninkehó nkehe jínahya kjuích'e ch'án, la ntá koí ch'án tjetjasóte ch'án —ichro tí ch'ín a.

<sup>42</sup> Ntá ntáchro ch'án kixin:

—Jesús, xráxinkávan tí janhan tió ts'ayéhé kjuachaxin tsétoan jaha —ichro ch'án.

<sup>43</sup> Ntá kjuátēhe ch'ín Jesús ntáchro ch'án kixin:

—Chaxín ntáxrjan kixin ijie jaí ts'ejóko kichó ni nkaya nkajní —ichro ch'án.

*Ntá ó k'uén ch'ín Jesús*

*(Mt. 27.45-56; Mr. 15.33-41; Jn. 19.28-30)*

<sup>44</sup> Ntá ó chjina chonkixin. A ntá k'uixin tie kuenté chjasintajni hasta las tres kónjín. <sup>45</sup> Ik'uén yaon, la ko tí ka t'inkákuènxín nkaxenhen ninko k'uichje jnkosiné. <sup>46</sup> Ntá ch'ín Jesús k'uèya ch'án itsen ntáchro ch'án kixin:

—It'éni tjen nkaya nkajní, jaha ts'ayéhé asénni —ichro ch'án.

Xikaha ichro ch'án ntá k'uén ch'án.

<sup>47</sup> A ntá k'uikon tí ch'ín capitán romano kaín xikaha kónhen ntá kjuanchehe ch'án kjuasáyé Dios ntáchro ch'án kixin:

—Chaxín tí nkexro la jína la ninkehó jie chóntahya —ichro ch'án.

<sup>48</sup> A ntá kaín tí chojni tsíkójnkotsé ntiha k'uikon sín xikaha kónhen ntá sákjuixin sín ntiha chrakon sín tjate sín ntakuin sín kixin xikaha kónhen. <sup>49</sup> A ntá kaín tí sín chóxin ch'ín Jesús la ko kjaxin tí chojni chjin k'uékinkáchónki sín ch'án tsíkjjixin sín estado Galilea ikjín tjejó sín tjejósjehe sín nkerí sítónhen.

*Sákjuíkjavá sín tí ch'ín Jesús*  
(Mt. 27.57-61; Mr. 15.42-47; Jn. 19.38-42)

<sup>50</sup> A ntá ntiha tjen ijnko ch'ín it'in José, chjasén ch'án mé Arimatea estado Judea. Kjaxin jehe ch'án ijnko tí sín imá t'etōan kuènte tí sín judío, jehe ch'án mé ijnko nkexro jína. <sup>51</sup> Jehe ch'án kjuák'echónhen ch'án itsi tí kjuachaxin kuènte Dios. Méxra kóxrjienhya ch'án nkexrí kjuích'e tí sín í so t'etōan. <sup>52</sup> Méxra sákjuítsjehe ch'án tí ch'ín Pilato kjuíkjanchia ch'án tí cuerpo kuènte ch'ín Jesús. A ntá ch'ín Pilato kjuanjon ch'án kjuachaxin. <sup>53</sup> Ntá sákjuí sín tsjinkajinxin sín ch'án ntacruz. Ntá kjuixin kjuinkajin sín ch'án ntá kjuínchek'ísímá sín ch'án ijnko ka jíé, ntá sákjuíko sín tsoxravá ch'án ijnko tòyē xráxín tsíkjich'éna ch'ín José jehó tjo la ko naxa ninkexró tsíxraváhya ntiha. <sup>54</sup> Kaín tíha kónhen tí yaon viernes kónjín. Tí yaon mé tjejóyaxínhin sín kíxin í séhya tsoxrankíxin tí yaon t'ok'éhe sín sábado kíxin kohya kjuachaxin sich'e sín ninkehó xra.

<sup>55</sup> A ntá tí chojni chjin nkáchréhe kjuíkoxín ch'ín Jesús estado Galilea kjaxin sákjuíko sín sákjuítsjehe sín tí tòyē tsoxravá ch'án la ko k'uíkon sín jína nkexrí kjuak'e sín tí cuerpo kuènte ch'án. <sup>56</sup> A ntá tío kjan sín tí nchia tjejó sín k'óyaxínhin sín kjueyá sín xroan xraxé náxrjón itsa ntoé ch'án kíxin xíkaha k'uékinkáchónki tí sín judío. A ntá k'ok'éhe sín tí yaon sábado éxí t'etōan tí ley.

## 24

*Ó xechón ch'ín Jesús*  
(Mt. 28.1-10; Mr. 16.1-8; Jn. 20.1-10)

<sup>1</sup> Tí yaon domingo, mé tí yaon xrankíxixín sem-ana tí chojni chjin na xíkjan sín ínaá tí tsíxravá ch'ín Jesús sákjuíko sín xroan xraxé tsík'ena sín. La ko í so chojni chjin sákjuíkotoxin sín. <sup>2</sup> Ntá ó kjuíji sín ntiha k'uíkon sín tí xro tsíkjàxín tí tòye la í xikahya tjen tí sákjuí sín. <sup>3</sup> Ntá k'uíxenhén sín tòye ntá k'uitjahya sín cuerpo kuènte Ìnchéni Jesús. <sup>4</sup> Ntá chrakon sín ntá noehya sín nkehe sich'e sín. Ntá xrínahya k'uíkon sín iyó chojni ntoa tjejóxin toté chjinaxón tí tjejó sín, la iké sín la tjákini tsjehe. <sup>5</sup> A ntá tí chojni chjin kjuínchek'isén kja sín tjejótsjehe sín nonte kixin imá chrakon sín, a ntá tí chojni ntoa ntáchro sín kixin:

—¿Nkekuènte xritjéyará tí nkexro tjechón tí síin tí sín tsík'en? <sup>6</sup> Tjenhya ch'án ntihi la ó xechón ch'án. Xráxinkáonrá nkehe ntáchro ch'án tí kjuák'e ch'án estado Galilea <sup>7</sup> ntáchro ch'án kixin jehe ch'án tí Xjeen Dios K'óna Chojni t'ichjánxin tsotsé tí sín chóna jie tsjak'enkanı sín ch'án ntacruz la ko tí níxin yaon tsoxechón ch'án ínaá —ichro sín.

<sup>8</sup> A ntá tí síchjin xráxinkaon sín kixin nkexrí tsíchronka ch'ín Jesús, <sup>9</sup> a ntá tió kjanxin sín tí tsíxravá ch'án ntá chénka sín tí tejnko tí sín k'uék'ajiko ch'án la ko kaín tí í so sín. <sup>10</sup> A ntá tí sín sákjuíchenka tí sín apóstol la mé tjan María Magdalena la ko tjan Juana la ko tjan María ìné ch'ín Jacobo la ko tí í so chojni chjin. <sup>11</sup> A ntá tí sín apóstol kuínhin sín éxí ijnko nkehe chaxínhya tí nkehe chrónka tí jehe sín ntá kuítekakonhya sín.

<sup>12</sup> Kjánchó ch'ín Pedro k'uaxrjexín ch'án nchia tinká ch'án sákjuítsjehe ch'án tí tsíkjixravá ch'ín Jesús. Ntá kjuíji ch'án k'uíkon ch'án tí nkaxenhén

tòye k'uíkon ch'án kixin jehó tí ka tsík'ísímá ch'án ntaha tjen. Ntá kjan ch'án tí nchia tjen ch'án chrakon ch'án kixin xíkaha tsíkónhen.

*Tí ntia Emaús sákjuí sín la kjuíjichréhe Ìnchéni  
(Mr. 16.12-13)*

<sup>13</sup> A ntá tí yaon a iyó sín sákjuí sín ijnko chjasin ntsí it'in Emaús, mé kjínxin tejnko kilómetro tí chjasin Jerusalén. <sup>14</sup> Tinkákjo sín kichó sín kixin kaín tí nkehe tsíkónhen tí chjasin Jerusalén. <sup>15</sup> A ntá nachrohe nixja sín tinkákjo sín, a ntá ch'ín Jesús kóchjinehe ch'án tí jehe sín sákjuíko sín ch'án. <sup>16</sup> Kjónté k'uíkon sín ch'án la kjuanjonha Dios kjuachaxin kixin chrókjuatsōan sín tí jehe ch'án. <sup>17</sup> A ntá ch'ín Jesús kjuanchankíhi ch'án sín ntáchro ch'án kixin:

—¿Nkehe tí tinkakjórá tí k'uinkará ntia?  
¿Nkekuènte kixin t'avará? —ichro ch'án.

<sup>18</sup> A ntá ijnko tí jehe sín mé it'in Cleofas, mé kjuátehe ch'án kixin:

—Kaín chojni ó nohe sín nkehe tí tsíkónhen chjasin Jerusalén. A ntá jaha kjaxin kjuák'e ntiha la ¿á jahvá noahya nkehe tí tsíkónhen tí yaon a ní? —ichro ch'án.

<sup>19</sup> A ntá jehe ch'án kjuanchankíhi ch'án tí jehe sín kixin:

—¿Xá nkehe tsíkónhen? —ichro ch'án.

Ntá chénka sín ch'án kixin:

—Tí nkehe tsíkónhen ch'ín Jesús tsíkijxin ch'án chjasin Nazaret. Jehe ch'án na ijnko nkexro k'uéchronka itén Dios, na mé kjuakoxin ch'án kjuachaxin kuènte nkaya nkajní kaín tí nkehe k'uékjich'e ch'án la ko kaín nkehe k'uéntáchro



ch'án mé xikaha k'uikon Dios la ko k'uikon tí chojni. <sup>20</sup> A ntá tí nchat'á t'etoan la ko tí sín gobierno kjuínchek'áyéhe sín ch'án kixin its'en ch'án la tsjak'enkani sín ch'án ntacruz. <sup>21</sup> A ntá jeheni k'uejóchónhenni kixin jehe ch'án chrókjuinkekaá ch'án tí sín Israel. A ntá jie ó chóna iní yaon xikaha kónhen. <sup>22</sup> A ntá iso chojni chjin kjaxin k'uékinkáchónki sín ch'án kjuínchechrakon sín tí jeheni kixin jehe sín tsíkjijsjehe sín tí tsíxravá ch'án imá nchítjén <sup>23</sup> la mé tsík'itjahya sín tí cuerpo kuènte ch'án, ntá kjan sín chrónka sín kixin tsík'ikon sín iyó sín ángel chrónka sín kixin ch'ín Jesús la tjechón ch'án, ichro sín. <sup>24</sup> Ntá tuénxín iyó tí sín k'uájikoni kjaxin sákjuitsjehe sín tí tsíxravá ch'án la kuik'itja sín éxí chrónka tí chojni chjin, kjánchó ch'ín Jesús la k'uikonhya sín —ichro tí yaá sín a.

<sup>25</sup> Ntá kjuátēhe ch'ín Jesús ntáchro ch'án kixin:

—Lontirá jahará la tjokahya kuítekáonrá tí nkehe k'uéchronka tí sín profeta k'uéjó ósé. <sup>26</sup> ¿Xá t'ichjánxinhya chrókjuasóte Cristo senó ntá chrók'uáyéhe ch'án tí kjuachaxin chrók'uetoan ch'án? —ichro ch'án.

<sup>27</sup> Ntá kjuankíxin ch'án chronkaxín ch'án nkexrí t'axrjexín kaín tí nkehe nixja xroon itén Dios kixin nkehe tsonhen tí jehe ch'án la mé kjuankíxixín ch'án chronkaxín ch'án tí nkehe tsíkjin ch'ín Moisés la ko kjuintaxín chronkaxín ch'án tí nkehe tsíkjin tí í so sín profeta.

<sup>28</sup> Ntá kjuíji sín tí chjasin ntsí a, a ntá ch'ín Jesús tsjehe ch'án éxí naxa sáchrókjui ch'án kjín. <sup>29</sup> A ntá jehe sín mé chronóēhe sín ch'án kixin ntahó chrókuitohe ch'án, ntáchro sín kixin:

—Titoha ts'ejóni ntihi kixin ntá ó kóntó la ó ts'ixitie —ichro sín.

Ntá ch'ín Jesús la k'uixenhen ch'án nchia kixin tsitoko sín ch'án. <sup>30</sup> A ntá tjejótxaxinko sín ch'án tí tjen tí ntamesa, ntá ntiha xranjon nkehe sine sín, ntá kuákja ch'án tí niotja la kjuanchehe ch'án kjuasáyé Dios la kóchrít'o ch'án kuákja tí jehe sín. <sup>31</sup> Ntá tuénxín xraxinkaon sín ntá kjuátsoan sín tí jehe ch'án. Ntá tuénxín k'uitjáyankoá ch'án. <sup>32</sup> Ntá jehe sín itjo sín kíchó sín ntáchro sín kixin:

—¿Á chaxínhya chéhe asénni tí kuikæoni ch'án ntja kixin chronkaxín ch'án nkexrí t'axrjexín tí itén Dios tsíkjin sín ósé? —ichro sín.

<sup>33</sup> Ntá tuénxín k'uínkatjen sín kjan sín chjasin Jerusalén. A ntá ntaha k'uitja sín tí tejnko sín jnkokoá tjejó sín la ko tí í so sín. <sup>34</sup> A ntá tí sín ntiha chrónka sín kixin:

—Chaxín tjechón Ìnchéni la mé ch'ín Simón tsík'ikon ch'án tí jehe ch'án —ichro sín.

<sup>35</sup> Ntá jehe sín kjaxin chrónka sín nkehe tsíkónhen tí ntja sákjuí sín kixin nkexrí kjuátsoanxín sín tí ch'ín Jesús tí kóchrít'o ch'án niotja kjuanjon ch'án.

*Titàya k'uikuèn sín ikui ch'ín Jesús  
(Mt. 28.16-20; Mr. 16.14-18; Jn. 20.19-23)*

<sup>36</sup> A ntá jehe sín naxa tjejótxo sín káin tí nkehe tsíkónhen, a ntá xrinahya ch'ín Jesús kjuák'e jnkosiné tí tjejó sín, nixjehe ch'án tí jehe sín ntáchro ch'án kixin:

—¿Á kjuaxróxin tjejorá? —ichro ch'án.

<sup>37</sup> A ntá jehe sín la imá chrakon sín kjuenkayáxin sín kixin k'uikon sín ijnko xrinto chojni.

—Ách'e kjuachani —ichro sín.

38 A ntá ntáche ch'ín Jesús tí jehe sín kixin:

—¿Nkekuènte chrakonrá? ¿Nkekuènte xikaha tjenkayáxin asánrá? 39 Tsjehérá tjaná la ko totená kixin chaxín janhan. Itserána la ko komárána, kixin ijnko xrintoe chojni chóntahya nto la ko chóntahya hueso éxí t'ikonrá kixin chonta janhan —ichro ch'án.

40 A ntá xikaha ichro ch'án ntá kjuako ch'án itja ch'án la ko toté ch'án. 41 Ntá kjónté xikaha k'uikon sín la naxa kuítekakonhya sín kixin chéhe sín la ko chrakon sín. A ntá ch'ín Jesús ntáchro ch'án kixin:

—¿Á chontará ichrén nkehe sineni ntihi ní? —ichro ch'án.

42 Ntá chjéhe sín ch'án it'o koche tsíchjántaón xrohi la ko ijnko t'o katjé kotsjenta tjiá tsjen. 43 A ntá jehe ch'án kuákja ch'án kjóne ch'án k'uikonxín kon sín. 44 Na ntá ntáchro ch'án kixin:

—Kaín tí nkehe k'uátsínka tí janhan mé k'uéntáxrjan tí naxa k'uék'ejóni senó; kixin t'ichjánxin tsoxiteyá kaín tí nkehe chrónka tí ley tsíkjin ch'ín Moisés la ko tí nkehe tsíkjin tí sín profeta la ko tí nkehe ntáchro tí salmo kixin nkexrí tsona janhan —ichro ch'án.

45 Ntá kjuanjon ch'án kjuachaxin kixin tsienxín sín tí xroon itén Dios tsíkjin sín ósé. 46 Ntá chénka ch'án sín kixin:

—Mé xikaha nixja tí xroon itén Dios kixin tí Cristo la t'ichjánxin ts'en, la nixin yaon t'ichjánxin tsoxechón ch'án. 47 A ntá t'ichjánxin tsjakoxin sín ihnié ch'án tsjankixixín sín chjasín Jerusalén la ko chrókuinhin chojni kuenté chjasintajni kixin chrókuítóhe sín ijíé sín chrókuitekaon sín tí jehe ch'án kixin jehe ch'án mé chrókjuincheyaon tí ijíé

sín. <sup>48</sup> A ntá jahará mé tsochronkaxínrá kixin xíkaha k'uikonrá kaín tíha. <sup>49</sup> Ntá tsochr'an janhan tí Nchakuen T'aná éxí tsíntáchro ch'án. Kjánchó chjasin Jerusalén ntahó titohará tsoxiteyájia ts'ayéhérá kjuachaxin tsixin nkaya nkajní.

*Ch'ín Jesús sákjuí ch'án nkaya nkajní  
(Mr. 16.19-20)*

<sup>50</sup> A ntá ch'ín Jesús sákjuíko sín ch'án k'uaxrjexín sín chjasin Jerusalén sákjuí sín chjasin Betania. Ntá kjuàya ch'án tja ch'án kjuíncheyaon ch'án tí jehe sín. <sup>51</sup> A ntá kjuixin kjuíncheyaon ch'án sín ntá k'uaxrjenta ch'án tí jehe sín ntá sákjuí ch'án nkaya nkajní. <sup>52</sup> A ntá jehe sín k'uíkon sín xíkaha, a ntá xraxinkaon sín ch'án, ntá kjan sín chjasin Jerusalén chéhe sín. <sup>53</sup> A ntá kaín yaon tjejó sín nkaxenhen nínko tjanchehe sín Dios kjuasáya. Amén.

**Tí Nuevo Testamento cuènte Inchéni Jesucristo  
C'óna Nquìva  
New Testament in Popoloca, San Juan Atzingo**

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

**Copyright Information**

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Popoloca, San Juan Atzingo

**© 1982, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 4 Mar 2023 from source files  
dated 29 Jan 2022

b9b09122-b3f6-59f0-9594-749907b32b5b